

D. E. 171

IACOBI SA

doleti de laudibus

Philosophiæ

Libri duo.

Novo degli Eredi del. prof. P. D'Brole.

VIRTUTE DVCE,



COMITE FORTVNA.

LVGDVNI APVD SEB.
GRYPHIVM,

1538.

NICOLAUS BORBONIVS
VANDOPERANVS AD IACO-
BUM SADOLETVM
VIRVM ELOQVEN
TISSIMVM.

*Quum studium Sophiæ, quid sit, quid nō sit agendum,
Monstret, ut ad ueras perueniamus operes:
Hoc totis quur non omnes amplectimur ulnis?
Quur, quæ uulgus amat, malumus illa sequi?
At iam tandem utinam resipiscant secula nostra,
Iudiciūq; probent, o SADOLETE, tuum.
Esse magis brutos homines ego iudico brutis,
Quos tua non fando flexerit alma Charis.*

IDEM BORBONIVS
AD LECTOREM.

Ἦνιδ' ἀγνοῦσά σοι τὸ πῶς ἐγκώμιον
φιλοσοφίας, μάλλον δὲ εἰδὼς πνεῶν,
τὸ ἐγραψίμῳ σοι ὁ κῆν' ὁ Σαδδολῆος μέγας,
ἀντὶ τοῦ θεῶ, ὁ τεχνίτης ἐξείρεται.

IACOBI SADO

LETI AD MARIVM MAFFEVM

Volaterranum de Philosophia liber
primus, qui inscribitur

PHAEDRVS,



In quo accusatio Philosophiæ
continetur.



MNIS, MARI
Volaterrane, quæ
ad bene beatę ui-
uendum pertinet do-
ctrinæ institutio, du-
cta primū mihi quis-
dem à Philosophiæ
præceptis uidetur es-
se: atq; ab eius facul-
tate disciplinæ, quæ
in cōtemplatione re-

rum naturalium, & moribus ad uirtutem fingēdis,
constituendisq; cernitur. Pōst autem his literis, quæ
quemadmodum sunt, sic etiam uocantur sacre: in
quibus uera Dei percipitur cognitio, cū aucta &
corroborata, tum ad extremum ex uarijs fluctibus

a z iactatio

iactionibusq; uitæ, quas nostra imbecillitas fert,
ad stabilem certamq; spem immortalitatis conuer-
sa, atq; translata. Ac nos, qui (ut tu ipse optimus te-
stis es) harum artium utranq; adamauimus semper,
& nunc quidem iam in alteram hanc, quæ nostræ
& personæ propria est, & religionis, tanquā in por-
tum uela deflectere, & pleno cursu contendere cogi-
tamur: adhuc tamē in Philosophia magis exercita-
ti, quod in illa plurimum operæ, & quantum ab oc-
cupationibus publicis, quæ nos diu & multū distri-
ctos tenuerunt, disiungi licuit, antè actæ ætatis con-
sumpsimus: duximus non alienum nec nostra dis-
gnitate, nec eorum, quos ad uirtutis studium atque
amorem genuit ipsa natura, utilitate, nos facturos,
si quæ de hominibus doctissimis, Græcis præfer-
tim, quorum in hac laude sine ulla dubitatione ex-
cellit industria, accepta à nobis fuissent, ea Latino
sermone conscriberemus: primumq; gratia hac de-
bita ea quidem & merita Philosophiæ reddita, toto
deinde pectore, ut dicitur, maturescētibus etiam an-
nis ad illam cœlestem scientiā incumberemus. Atq;
hoc ita agere id studiosius etiam sumus meditati,
quod in hoc tempus Latinis quidem literis deside-
rari uidetur Philosophia: nō quīn & apud ueteres,
& nostra etiam, ac patrum auorumq; memoria ex-
titerint docti uiri, qui eam uelut incertis sedibus per-
regrinantem & uagam, & maxime quidem posteaq;
iecta ē Græcia est, in hanc urbem adsciscere & po-
tuerint,

tuerint, & partim etiam conati sint: sed ita ferente casu quodam bonis artibus infesto, & qui uoluerunt uarijs plerunque rationibus impediti, in medio spatio resisterunt: & qui potuerunt non ferè sunt ad eam uoluntatem adducti. Ita illa necessariò penes barbaros morata, tanquam iuris nostri morisq; expers, caruit honore & nomine ciuitatis. Ac ut illū omnis doctrinæ & eloquentiæ parentem potissimum nominemus, Marcus Tullius Cicero etiam professus fuit hoc se populo exhibiturum, ut Græcè tum loquentem Philosophiam ad Latinam sermonis consuetudinem adduceret: quem ego unum maximè statuo incredibili quadā magnitudine ingenij, quæ & omnes longè uicit superiores, & posteris spem penè sui imitandi ademit, cumulatè quod susceperat præstare potuisse: Verum siue infinitis nouæ Academicæ (sic enim appellabatur orta ab Archesila, à Carneade confirmata disciplinæ ratio) disputationibus impeditus, quarum illa contra omnia dicèdo nunquam terminauit modum: siue quòd propinquo & celeri cum suo, tum Reip. fato, illius per uim nefariam fuit interrupta industria, minus aliquanto nobis præbuit, quàm aut optaremus, aut ab illa diuina mente potuit expectari. Morale paritè Philosophiæ psecutus est, eamq; carptim separatis quæstionibus: in physicis quidē nihil attigit: nec uerò de ea parte, quæ ad differendū tota est, literā omnino fecit ullam. Quòd si ille tum hoc conatus est, in quo illi

nō animus aut ingeniū, sed ex parte quadā fortuna defuit, ut Philosophiā ē lingua nobili, & in primis memorata transferret in Latīū, aliquantūq; ei splendoris & dignitatis se adiūcturū à Romana facundia existimaret: quid nos tandem, & nobiscum unā cæteros omneis, quibus cordi Philosophia est, agere conuenit: aut quanto elaborare studio, ut tendentē nobis ultro manus, fidemq; & opem nostram implorantem, pro sua parte & facultate quisq; à barbarorū inscitia & moribus in Latinitatem uindice-
mus: Etenim quid est quod æquo minus queat animo ferre quisquam institutus liberaliter, quā caput artium optimarum, ornatricem uniuersæ uitæ Philosophiam possideri ab ijs, qui ut acutē forsitan aliquando moueri uideantur ad disserendum de ea, inaniter tamen & id agunt, & orationem afferunt ineptam, & horridam, turbantem cogitata tū deblatterantium ipsorum, tum eorum qui audiunt: nihil ut ex ea proprium, nihil ut dilucidē significās percipi possit: Ex quo factum est, nō ut in exquirenda ueritate, quod est unū munus Philosophiæ maximè proprium, sed ut in uerborū, & inanum quæstionum inutilibus cōtrouersijs omnis iampridem ab his suscipiatur cōtentio. Sed ut in ueteri prouerbio est, Balbi balbos, sic istos sui & agnoscunt, & probant. At nos, quibus expetenda illa semper, & præcipuè colenda uisa est, quæ sapientiæ cum eloquentia naturalis est societas, quicq; mentis simula-
chrum

chrum ducimus orationē, ut ex huius forma & pulchritudine, illa quoq; quæ intus est spectari animi dignitas & elucescere foris possit: demus operam, si modo assequi possumus, ut Philosophiam iam pridem laborantem barbariæ nomine Latinis literis illustremus. Quod profectò adnitemur, eo ingressi animo, ut nisi uitam uis aliqua peremerit, aut auiditas maior occupauerit, omnem ipsam Platoniciā, & Aristotelicam formam disciplinæ nō interpretis munere, sed ordine & iudicio nostro nostris hominibus tradere parati simus. Quod maiore etiam cū spe, lætitiāq; aggredimur, quòd intelligimus non solum in Italiā, quæ semper omnium bonarum artium parens iure existimata est: uerū etiam trans Alpes in Gallijs, Germanijsq; quàm multi iam existant, qui se ad politiores dedant literas: quicq; hæc ipsa, quæ nos reprehendimus, minimè probanda putent: etiam insectentur eorum infantiam, qui audeant præclaras è Philosophia sententiās, sermonis ruditate tanquā cœno aliquo inquinare. Qui quidem tali ingenio præditi, barbari certe non sunt. Non enim quos à nobis aut montiū excelsitas, aut latitudo æquorū disiunxit, sed quā cum uerè religionis cultu non peragrauit humanitas, & artium amor ingenuarū, ea certa & sola est barbaria. Atqui horum ope atq; auxilio, aliorūq; multorū, quos similiter ad iudicandum, agendumq; idoneos ingenij dotibus natura ipsa subornauit, si plures in hanc præclaram

præclaram uoluntatem consenserint, haud diffidentum sanè est, quin celeriter è sordibus omnibus se emerfura Philosophia, & dignitatem ad quam spectat, obtentura esse uideatur. Quibus cum aut nostra communicabitur laus : aut si prior nostra fors in hoc certamen exierit, non dubium est futuros, qui eandem petessant gloriam: à quibus non certari modò nobiscum, sed uinci etiam nos æquo pati animo sumus parati. Quippe qui non tam singularem nostram laudem, gratiamq; deposcimus (et si ne ea quidem, cum bonorum consensu recte factis tribuitur, à præstantibus animis repudianda est) quàm bene de ciuibus nostris promereri studemus. Quòd si in eis actionibus, quas huius optimi ac maximi principis beneficio cum aliqua autoritate tractauimus, innocentiam & fidem probauimus nostram, nostraq; foris acta consiliaq; omnia non ad priuatos quæstus, sed ad beneuolentiam hominum nobis omnibus officijs conciliandam, & ad communem bonorum utilitatem spectauerunt: erit hæc iam intra domesticos parietes cum cura præstantior, tum labor etiam multis utilior, si qui nostris hortationibus uel excitati, uel firmati, nihil sibi magis expetendum in uita, quàm uirtutem & abstinentiam, & studium ueræ sapientiæ duxerint. Sed quoniam antequàm è Philosophia quicquā, de ipsa Philosophia aliquid est dicendum: eiq; iusta & debita laus tribuenda, sine qua nihil quicquam uerè esse laudatū potest

potest: cum præsertim non desint qui petulanter in eam quacumq; de causa, etiam hoc studiosius inuehantur, quod se putent ea re gratiam à uulgo & ab imperitis hominibus inituros: uisum fuit faciundū, ut eam ederemus eius defensionem, quam habuimus Mari, nos quidem aliquot ab hinc annis in Iacobi Galli suburbano, cum à T. Phædro affine tuo, homine (ut meminisse facile possumus) cum docto & copioso, tum parato ad laceissendum, respondendumq;, esset uituperata. Nam cum Floralibus manē ad Gallum in hortos, quos ille uir, ut tute scis, in omni uita politissimus, in campo sceniculario secū dum Adriani molem sibi ferē communes, & doctis omnibus parauerat, conuenissemus ego & F. Citra rius, homo cum studiorū similitudine mecum, tum multis amicitiae officijs coniunctus: offendimus ibidem, qui paulò nos anteuenerat, cum ipso Gallo fermocinantē T. Phædrum. Igitur congressi amicē & comiter, salute data acceptaq;, in hyppedromo (id erat decumano limiti nomen) manus complexi inter nos, ut mos amicorum est, inambulare coepimus. Tum G A L L V S: Quid nam hoc esse dicam, inquit, nobis à natura datum, ut tantum boni in eorum, quos familiariter diligimus, congressu & colloquijs experiamur esse, ut sine ijs nullam integram uoluptatem ad animum nobis accedere sentiamus: uelut mihi nunc accidit, qui etsi hoc loco uehementer delector, quod & amœnus satis est, & solent uni
b cuique

cuique sua, in quibus quis elaborauit, ualde iucunda existeret: tum autem hac hodierni diei tranquillitate aëris & nitore cœli exhilarari animos necesse est: nec solum nostros, sed cæterarum etiam animantium. Siquidem, ut à Vergilio scriptum est, Vertuntur species animorū, & pectora motus. Nunc alios, alios dum nubila uentus agebat, Concipiunt: unde etiam uolucrum cantus, & lætitiā pecudum, & insolitam quandam in animis dulcedinem ait exoriri. Requiebam animo tamen nescio quid: neque tam animaduvertebā primò quid illud esset, quod mihi abesse quasi uideretur, quàm posteaquàm uos aduenistis: sentio nunc demum meam expletam, cumulatamque esse lætitiā: ita ad societatem illam ad quam à natura facti sumus, qua homini ad hominem naturalis est applicatio, accedit ista ex delectu amicitiae incredibilis quædam iucunditas: quam qui non norunt, ij mihi uidentur ex alieno quodam genere homines esse, non tam mente præditi, quàm forma humana. TVM PHAEDRVS: Recte sanè loqueris Galle: repugnat enim hoc naturæ, ut qui sint, quos tantum in rebus humanis bonū non afficiat: & tamen experimur interdum nonnullos, qui ita aut animo sunt agrestes, aut moribus ad omnem inhumanitatem assuefacti, ut non modò neminē eximie charum habeāt, sed æquē oderint omnes, tanquam communes cunctorum inimici: Sicut de Timone illo Græcæ loquuntur historiæ: quem etiam ferunt,
cū

cùm haberet secum in ccena similem sui prorsus, & inhospitalitate (non enim mihi nunc succurrit, quo alio nomine appellem *μικανδρωπία*) & moribus Apemantum: atq; ille ea solitudine delectatus, dixisset, Pulchrum hercule nostrum hoc conuiuium, o Timon: respondisse, Atqui pulchrius multo futurum erat, si tu non adesses. Tales ergo nonnulli, sed contra naturā tamen: atq; ut hoc fortasse rarius, sic utinam non multa quotidie in nobis ab eadem natura optimè inchoata, consuetudinis uitio deprauarentur. Sed de se, ut uolet quisq; nos, qui liberaliter sumus eruditi, de nobis ipsis ita sentiamus, ut uitam sine conuictu & consuetudinibus amicorū nullam ducamus esse. Atqui Galle, inquit C I T R A R I V S, quantum tu bonorum amicitiae, omnīq; humanitati tribuendum statuas, res ipsa palām facit, necq; indiget id nostra ullius oratione: nemo est enim qui non oculis cernat, quanti sint ad te hominum, aliqua ingenij laude splendentium, concursus fieri soliti: atq; ut ornatissimorum hospitem & amicorum quotidianis conuentibus floreat domus tua. Quod profectò haud ita foret, nisi tu, si quisquā alius unquā, honestissimorum, optimorumq; amicitia, ac familiaritatibus delectarere. Verū quod est modò à Phædro nostro dictum, rarius ulu hoc uenire, ut quis amicitiae dulcedine non tangatur: utinam id quidem ita esset, atq; ea una esset in causa, quae ab eo exemplo etiam Timonis commemorata est, naturae

quædam quasi feritas : sed latius patet hoc malum, & quod maximum uenenum fidelis beneuolentiæ est, simul ut quis nimium sibi deseruit, ita minimè fidem in amicitia tuetur. At huiusmodi hominum innumerabilis est multitudo. Quis enim est studiosus pecuniæ præsertim, & cui (ut Terentianis uerbis utar) nihil præter lucrum dulce sit, qui ullum uel tenuem possit habere gustum huius ex amicitia iucunditatis, quam tu modo Galle narrabas? quicquid sublata utilitate, quæ contineat necessitudinē, non continuo nuncium remittat amicitia. Plena horum uita est, rarumque illud potius, ut cui cognita appetitaque sit simplex illa, & uera, & per se, suaque sponte amabilis ex amicitia uoluptas, quæ ab amico profiscitur, & in eo ipso uertitur, nihil quærens extrâ, nec cupiens, cuius amor fructus maximus, uirtus optima conciliatrix est. Sed quò rarius istud, hoc præstantius. In quo genere, optimo te excellere iure, Galle, fecisti tu quidem omnibus iam fidem. Nam, ut ille, quicumque hostem feriet, is mihi fuerit ciuis : sic tu amicos ex una uirtutis commendatione continuo probas : non ex eis ad te uti referas aliquid, sed ut sibi illi nihil magis promptum esse intelligant, quàm te, domumque tuam, operam, gratiam, pecuniam, auctoritatem : quæ cunctis etiam hoc gratiora ex te accidunt, quòd tua ista incredibili humanitate condiuntur : quam tibi in uerbis quidē & uultu, omni que corporis motu insculpsit ipsa natura.

natura. Sed ea factis, & in experiundo fit illustrior. Itaq; es afflictus, ut non magis unum unus, quàm te diligāt uniuersi. Quam ob rem, quod paulò antè dixisti, nullā te integram sine congressu amicorum percipere uoluptatem, & de eo tibi assentior: & (ut pro cæteris etiam loquar) experimur idem in nobis omnes erga te aliquanto etiam uberius. Sumus enim hac tua fruenda humanitate, hoc ingenio, his optimis & suauissimis moribus, in mutua nostra beneuolentiā propemodū beati. T V M G A L L V S: Gaudeo sane Citrari, inquit, præclaro hoc, quod mihi tribuisti, uel iudicij tui, uel, ut ego potius interpretor, amoris testimonio. Atqui, inquit P H A E D R V S, Galle, utrūq; est, & iudiciū, & amor. Sed quādo de amicitia aliquid omnes, quid Sadoletus? E T E G O: Quid inquam Phædre: nisi me uehementè hoc uestro sermone esse delectatū: ac sentire quidē uobiscū unā, nihil esse in uita præstabilius amicitia: quæq; in Gallo nostro laudibus extulit Citrarius, uerissima confiteri. Sed quod unum uel præcipuum ab eo uideo prætermisissum, id à me referri, & cōmemorari debere puto: non enim natura solum, & propensione animi quadam, aut fortuito euentu lapsus in hanc rationem Gallus, ad liberalitatem, & beneficentiam, ueritatemq; amicitiae totum se contulit: sed aliquāto magis accepit à Philosophia, ut ista eadem recto iudicio & cōstanter ageret, in quo quidē uno est posita uirtus. Nouit enim quēadmodū

de statuis Dædaleis à doctissimis proditum est, eas cum præclaro opere perfectæ, & eximie pulchritudinis existerent, nisi tamen arctissimis uinculis constringeretur, dilabi facile, & perfugere solitas, quod earum incerta esset, & lubrica possessio: sic optimū quenq; morem, nisi ratione & præceptis Philosophiæ fuerit confirmatus, stabilem sua sponte non esse. Est igitur ad hæc Philosophiæ studia, in quibus à prima adolescentia admodum se exercuit, longo interuallo nunc reuersus, & quidem animo maiore quàm uos fortasse suspicamini: quod ego nosse possum propter quotidianum usum, quo cum eo assiduus sum. Quanquàm illi quidē haud ita multū ad legendum ocij à forensi opera relinquitur: sed est totus in quærendo & percontādo; me quidem, quē in his literis maximè uidet occupatum, audiēdi aliū quid uidelicet, & disputandi causa, sæpissime ut lacescat: Quod ego pergratè accipio, uel quod obsequor studijs optimi & amicissimi uiri, uel quod illius acuto, & acri ingenio meum quoq; ad discendū excitat ingenium. Hoc loco PHAEDRVS, ut erat natura uehementior, & Philosophiæ multis iam signis habebatur insensus: Præclarā mehercule laudem, & in primis commemorandam, qua te isti afficere conantur, Galle, cum te tanquā puerum nobis lē sub pædagogo, sic à Philosopho aliquo admonitum, nihil nisi ex præscripto rectè agere posse uolunt; ac ne quid desit, manum etiam sub ferula, ut dicitur

citur; indignum illud quoq; quòd uirtutem in una statuunt Philosophia: Quo quid dici impudentius potest; quādo enim Philosophiæ quicquam omnino fuit cum uirtute, cum amplitudine, cum dignitate commercij; aut quos ex eius ipsius sinu prodire conspiciamus ad ullam rem gerendam aptos, quæ quidem digna sit uiro? Immo uerò tu, inquit, esto nobis Galle & naturali uirtute, & tuo ipsius consilio institutoq; talis, qualē te esse cernimus omnibus eis animi dotibus instructum, quæ magno homini conueniunt: Sitq; tua ista propria, & peculiaris laus, non Philosophiæ, quā summus ille uir tuus nouus hospes & amicus P. Bēbus, cuius tanta fertur apud omnes uirtutis & literarum gloria, iure sanè in te contulisse mihi uisus est, cum ita diceret, urbem hanc tot antiquorum monumentis, tanta etiam nunc horum temporum magnificentia ornatam: sibi tamen maiorem atq; ornatorem fuisse uisam, quòd te in ea ciuem esse cōtigisset. Hoc de te fīle ita ut sentiret, non tu, opinor, promissa barba es affecutus, nec tunica pulla, nec trito pallio, nec inepta, & intempestiua loquacitate, sermonibus per omnes circulos cōferendis: longè enim hæc aliena graui uiro, Philosophis uerò quotidiana sunt: sed liberalitate, & prudentia, & quòd cum te multi fortuna & copijs in hac urbe antecedāt, nemo est tamē, qui ad bene de probis & doctis hominibus merendum te uno sit propensior: Nam quod ad Sadoletum attinet, quem ego
& amo

& amo mediūsfidius, & florentem eſſe cupio, non poſſum non moleſtia affici, cū illum uideo ſubducentem ſe amicorum & familiarium cœtibus, in hac ſqualente & ſordida Philoſophia tabernaculum penē uitæ ſuæ collocāſſe, doleoq; meā tam parui apud eum fuiſſe auctoritatem, ut ipſum ab hoc errore nequiuerim adhuc ad cōſilia grauiora retrahere. Atq; ad me conuerſus, In mentem uenit mihi, inquit, ea proferre aduerſus te, quæ in Euripide Zethus ad Amphionem fratrem protulit, quorum equidem ſententiam, nō numerum recorder: Negligis o frater, inquit, ea quæ te oportet diligere, naturāq; animi tui ſuapte ſponte nobilem, puerili quadam concinnas forma: & neq; in iudicijs commodè loqui ſtudium tibi eſt, inq; ijs cernere quod æquum idoneumq; ſit: neq; alios iuuare conſilio potes tuo. Ac de tuo quidem, inquit, ingenio quid ſentiam, mihi ipſe conſcius ſum: quantū autem te diligam, tu optimus es teſtis. Sed quod tibi ſoli ſeorſum ſæpe dixi, in quo fruſtra à me conſumpta opera eſt, idem nūc his audientibus ut dicam, moneamq; te aliquot annis minorem natu audacter, idem amor me cogit. Vereor enim, uel potius formido certò, ne iſtā tuā ingenij animiq; indolē, qua te ad grauiores res tractādas idoneum ſemper iudicaui, hoc Philoſophiæ ſtudio penitus corrūpas: in quo ſi eſſet ipſo aliqua fortāſſe liberalis oblectatio: quæ tamen in tanta uanitate illius ſcientiæ eſſe quī poteſt: tibi tamen uidendum

dum arbitrarer in ciuitate tam occupata, in qua honores & præmia non otiosis, sed industrijs hominibus proponuntur, quî factum tuum probari illis posset, qui scirent de uita cuiusq; & institutis iudicare. Inquiritur enim in uitam tuam, mihi crede, curiosius quàm tu fortasse existimes: Nam cum à primo commoues animos multor: expectatione quadam, nunc te uelut inertia defedis, non possunt nō mirari homines, idq; non reprehendere: cum in popularibus studijs, & his quæ frequentia ac celebritatis sunt, siue in foro malis, siue ad principes uiros, uindicare te in aliquam laudem possis: illa tamen, quæ silentij, & solitudinis sunt, malle persequi. Quorum profectò opinioni & iudicijs inferuias oportet, si aliquo numero esse optas, aut si eam uerè assequi uis, quam tibi falsò promittit Philosophia, sapientiam: ne ue te in tenebris abdas, cum facile in hominum oculis queas, & in luce consistere. Quæ cum ille dixisset aliquanto commotius, quòd eum ad hanc rationem concitationemq; dicendi & uoce, & motu corporis, & animo flagrante ac subito natura formauerat, summumq; illi præterea ingeniū, summum in pronūciando lepōrem addiderat. C I T R A R I V S, O' amœnum diem hunc, inquit, & mihi diu, ac Gallo desideratam opportunitatē, aliquid quando te Phædre in uniuersam inuidentem Philosophiam audiendi: Equidem interfui sæpe, idq; locis pluribus, cum carperes Philosophiam: in quo

ego potissimum attendere solitus sum acumen ingenij tui, & facetissimis dictis delectari. Sed de ea tota quid haberes dicere, percontandi ex te, cum id maxime auerem, ante hunc diem facultas non est data: quam nunc oblatam libentissimis nobis, nostra fuerit culpa, si amiserimus: aut si non ex te omnia, quae uolumus de tuo in Philosophiam animo ac iudicio, audiendo fuerimus consecuti. Imò, inquit GALLVS, & hic locus maxime aptus est, & tempus idoneum: nec est quicquam, in quo iucundius hunc consumamus diem: quam ob rem da hoc nobis Phædre, ut te de uniuerſa Philosophia quid sentias audiamus. AVDIETIS, inquit: sed hac conditione, si omnibus sum facturus gratum. HIC EGO aridens, Mihi ne, inquam, esse gratum potest, in tantum discrimen uenire Philosophiam? Quid ita, inquit CITRARIVS, non tu eam dicere es solitus ueritatis patrocinio sat tutam esse? SI QVIDEM, inquam, ueritate, non eloquentia causa pendetur. Pendetur, inquit GALLVS, & bono es animo: non enim hinc imperite multitudinis concilio, ad quam in inuidiam facile, & in suspicionem Philosophia adducitur: Sed auium concentus, & florum tanta hæc uarietas ac copia, huius orationi coronam factura est. ATQVI, inquam, Galle, huius orationi (siquidem ea in uituperanda Philosophia futura est) auium iste concentus obstrepat sane uelim. An non tu hosce flores, qui tantam nunc odorum

rum amcenitatem naribus nostris aspirant, & mox auritos, & postea etiam uocaliores fore putas, quàm esse posset ipsa illa, de qua nunc dicebas imperitæ multitudinis concio? S A N E, inquit, hoc est quod ego gaudeo : intelligo enim præter uoluptatem, quam audiendo percepturus sum, huius mei præterea suburbani pretio permultum accessurum esse, quod quidem disputatione uestra hac celebratius multo futurum est, quàm aut peregrinis arboribus, quæ in hunc ipsum locum undique accersitæ sunt: aut nobilitate eius picturæ, qua est superior porticus exornata. Q V I N tu, inquit Phædrus me insituens, ueritatem finito uenire in certamen, tumet silentium teneto, A G E A G E, inquam, Phædre (uis deo enim te in procinctu esse, pugnae audium) illud moneo, parcus : ne si uno hoc prælio penitus Philosophiam obtriueris, non habeas deinde quicquã, in quod ita studiosè, & libenter inuehere. N V L L V M est periculũ defore, inquit ridens, dum quidem tu extiteris, qui ab ea auelli nulla ratione potes. Quod cum dixisset, omnes ad audiendum animos ereximus. T V M I L L E, Videntur mihi, inquit, Prisci illi ueteres, qui primi semetipsos sapientes, & artem eam, quam profitebantur, sapientiam appellauerunt, aut callido consilio quæsisse in uulgius celebritatem : aut errore quodam puerili decipi fuisse. Etenim si cum scirent, & intelligerent ipsi, inanem eam esse, quam habebant in manibus, sciens

tiam : appellatione tamen præclara illam adducere in honorem studuerunt , cæterisq; persuadere id, quod ipsis neutiquam de ea erat persuasum. Astuta illorum ratio , & callidum in primis consilium fuit: sed ita, ut seculi illius ingenijs nihil iudicarent esse rudius. Sin autem & eandem ipsi fidem habuerunt de sapientiæ disciplinâ, & cæteris facere conati sunt, puerorum mihi morem uidentur fuisse imitati : ut enim pueri imagunculas sæpe nacti ligneolas, aut è cera : easq; charius amplexi, ueste atque auro exornant, Deorumq; quorum libitum fuerit, imponunt eis nomina : demumq; longius prouecti credulitate puerili, quasi rem seriam agentes, rei ludicræ diuinos honores tribuunt: Sic Philosophi isti uestri (me autem intuebatur loquens) quos solos penes est sapientia, quicq; eam ipsam ab sese unis peti atque ad disci uolunt, tantò pueris leuiore, quanto illis ætas ludum suum concedit, his alienum stultitia : inane disciplinæ simulachrum splendidissimi nominis appellatione honestauerunt: Quo non possunt quidem non allici aliquando & inuitari nonnulli, ut insistant aliquantum, cupiantq; interiora cognoscere. Quòd enim sapientia nec in cælo, nec in terra quicquā est præstantius, iccirco ipso nomine commoti, accenduntur ad cupiditatem aliquam cognoscendi. Sed si qui lautiore paulò ingenio ingressi fuerint, maturè ut abalienentur. Ex quo illud Neoptolemi apud Ennium, Philosophandum sibi esse, sed paucis: nam omnino,

omnino, haud placere. Credo homini militari ex bellica uirtute ueriores meditati gloriā, conueniēs fuisse uisum, quid isti profiterentur, agnoscere; quæ uerò minutius superstitiosiusq; tractarent, & in quibus frustra contererēt ætatem, ea ceu uerę sapientiæ repugnantia penitus despiciere atq; contemnere. Et nimirum magna, eximiaq; professi, in minimis ferè uersantur. Quòd si splendore nominis remoto, rem ipsam introrsum magis aspexeris: totamq; istā artē, quæ se magistrā tradendæ sapientię profitetur, in manus sumptam diligenter expendere: nō tu in ea quidem sapientiam ullam, quæ sit uerè & solidè sapientia, sed imaginem potius inanem quandam prehenderis sapiētiæ, sine corpore, sine mēte, ipsius illius sapiētiæ operibus atq; muneribus sola uoce resonantem. Nam cum rerum gerendarum sit sapiētia, imperij gubernandi, dignitatis ac potentiæ sibi comparandæ, Philosophia pro his maximis, maximēq; expetendis rebus, tanquam immunitatem laborum in beneficij loco illi tribuens, eam in uerbis pensitandis, & argumentorum conclusiunculis arte astringendis, rebusq; ijs, quæ nihil pertineant ad nos, accuratius indagandis, festiuo opere occupat: ut suarum uirium & grauitatis oblita, à coetu hominum, atq; ab regendis ciuitatibus, ad solitudinem, inertiamq; traducatur. Atq; huic arti tamen sapientiæ nomen est datum: in quo primum istorum est arrogantia reprehendenda. Quis enim illis hoc cō-

celsit: aut quo nam iure fuit ab ipsis usurpatum, ut
 artem suam, cuiusmodi ea cunctis sit (nondum enim
 de hoc disputo, post uidero) in ipso statim ortu atque
 initio, inscriberent Sapientiam: cumque necdum pla-
 ne perspectum, cognitumque esset, hominum ne ui-
 tae utilis futura esset illa, nec ne esset, tamē tanquam
 ratio absque ea recte, ordineque uiuendi cunctorum iam
 confessione constare non posset, ita summum rerum hu-
 manarum titulum illi praescriberent: Verum fuerit hoc
 uitium superiorum illorum, & qui septem dicti sunt,
 quos tradunt cunctos in Graecia Delphis primum
 conuenisse, Athenis praetore Damaso: iterum deinde
 de Corinthi, cum eos Periander Corinthiorum ty-
 rannus hospitio accepisset, circiter quadragesimam
 quintam olympiadem, quo tempore Romae L. Tar-
 quinius Priscus regnum obtinebat. Atqui hi isti ipsi,
 si sua sententia se appellauerunt sapientes, indulse-
 runt sibi profecto, quam par erat, uehementius. Sin
 autem populorum suffragio uocati sunt, habent ex
 gregiam sui cognominis, & quo iure gloriuntur, au-
 toritatem. Siquidem ad imperitos & stultos dela-
 tum fuit de sapientibus iudicium, etsi uideo non istos
 solum, sed alios complureis, si fama & opinione uulgi
 sapientia censeatur, nulla illustri de causa passim ha-
 bitos sapientis: simul ut quis enim in illa rude indo-
 ctisque uetustate uel dixerat aliquid, uel egerat cons-
 cinnius, ita ascribebatur ad numerum & nomen sa-
 pientis. Quo ex genere maternus auus Thesei Pit-
 theus,

thêus, cum uersibus pangendis sententioſas quaſdā complecteretur, in primis iudicatus eſt ſapiens. Lycurgus uerò eundem nominis honorem iuſtius eſt aſſecutus: quòd enim conſuſam & perturbatā, ac (ut Herodoti utamur uerbo) *κακονομοῦντα* Lacedæmoniorū Remp. legibus latis conſtituerat, ferēdisq; laboribus, & periculis alacriter adeundis, ciues ad fortitudinē, & ad omnia belli munia apprimē erudierat, comparata ſibi autoritate & gloria, ſapiens meritò exiſtimatus eſt. Sed ut ab hoc magno ſanè uiro abeamus, quid cuiq; eſſe tunc potuit in ſapientia nomine glorioſum, cum Homerus, cuius dicta pro decretis habēda ſunt, etiā fabris attribuat ſapientiam? Ac ne quis illorum ſeptē, quos & nos nūmum iam ſæpe in mediū adducimus, & negat Di cearchus autor haud ignobilis, nec Philoſophos, nec ſapiētes fuiſſe, ullam alio ex genere putet fuiſſe ſapientiam, quā eam, quæ dicta in Pittheo: Pri mūm poētæ pleriq; iſq; adeò perfrigidi: deinde argutulis quibuſdā, ut ſibi uidebātur, ſentētis, multitudinis plauſum captantes. Quid enim Chiloni Lacedæmonio (ut de eo potiſſimū loquar) tria ne dicta ſapientia laudem aſſerre debuerunt? At ea in foribus templi Delphici ſunt inſcripta. Quid tum? nō enim qui inſcripſit, aut qui inſculpſit (opinor) faber ſapientior fuit? NE QUID NIMIS: rectè hoc quidē, & ſibi ille admodū cōſtitit: pauciſſima enim locutus, multam ſibi parauit ſapientia ſamam. Sed
quid

quid illis sapiētibus fiet, qui suis libris, atq; scriptis omnia referferunt? N O S S E uerò S E Q V E N S Q V E, quam uim habeat, si ab hoc communi atq; usitato sensu abieris, ipso illo interprete qui edidit, censeo esse quærendum. Nam illud quidem inopinatū ac nouum, & nescio unde erutum: nemini enim unquam in mentem uenire potuisset: C O M I T E M E S S E A E R I S A L I E N I M I S S E R I A M: Quid? hiccine solus uadimonium deferere coactus fuerat, eiusque bona proscripta fuerant? Sed quoniam in singulis non est immorandum, & unius tamen exemplo cæteri noti esse possunt, ratio cōcludenda est, Sapientium nomen, ab ipsis usurpatum, plenum arrogantiae esse: à populo delatum, inanitatis. Correxerat errorem hūc ueterum Pythagoras, imminuitq; inuidiam nominis, quod primus Philosophiam pro sapientia instituit appellari. Is in illa sua peregrinatione, in qua, ut de Vlysse scribit Homerus, multarum gentium mores & instituta perspeculatus fuerat, cū peragraret in reditu ueterem Græciam, atq; illo itinere uenisset Sicyonem, ibiq; cum Leonte Sicyoniorum tyranno congressus, interrogatus ab eo esset, quem nam ipsum se profiteretur, num sapientem? respōdit soli Deo congruere nomen sapientis: se uero Philosophum esse: hoc est, studiosum, & cupidum sapiētiae. Graue responsum & dignum moderatissimo uiro, nihil sibi arrogauit, nihil sublatius de se locutus est, tantū

tantum eam cupiditatem, quæ cuncto generi humano è natura insita est, sapientiæ adipiscendæ, in se aliquanto fortassis acriorem inesse significauit. Plebena igitur grauitatis oratio: neque ipse non idoneus, cuius auctoritatem cæteri sequerentur, si in eadem porro sententiâ constitisset, neq; dissensisset postea à sese, cæterisque rebus non iam se moderatum & grauem, sed flagrantē ambitione importuna præbuisset. Nam quid illa iactatio popularis, & Græciæ omnibus in locis, ubi coetus celebrari erant soliti, sui ostentatio? Quid nudatio femoris aurei Olympiæ, cum ad ludos solenneis cuncta adesset Græcia? aliud in eo indicant, quàm speciosum illud sapientis nomen, quod ipse paulò antè ab hominibus cunctis abiudicarat, & Deo uni tribuendum censuerat, cum conaretur apparere ipse Deus, usurpare illum confessione reliquorum, & ad semetipsum uertere, tanquam præstigijs quibusdam, uoluisse? Quamquam femoris quidem aurei illa nudatio, ignarum forsitan uulgus commouere: ijs, qui hominem nouerant, meminere: ex aurificina paulò antè ad Philosophiam egressum, miraculo esse non potuit. Quid quòd ad Italiam se contulit, & Metaponti sedem, ac domicilium statuit fortunæ suarum? qui cōueniebat homini Samio, præsertim cum plus honoris, quàm satis opus esset, in germana Græcia paribus illius haberetur? Sed, opinor, occupatis ibidē populorū animis opinione, & fama superiorū sapien-

d tium,

tium, cum eum, quantum assequi posset, celebritatis poeniteret; nouas illum sedes, & uberiorem segetem suæ propagandæ laudis, uacuis etiam tum à Philosophia harum gentium animis, in Italia quæsiuisset. Quibus in locis disciplinæ sectam eam cōdidit, quæ Pythagorica est appellata, magistra illa taciturnitatis. Hoc confiterer commodè, si ut in addiscendo, sic etiam ad docendum adhibitum silentium fuisset: hu-
ius enim molestiæ parte iam careremus. Porro apud eum mos iste tenebatur, ut qui se huic dicassent disciplinæ, obmutescerent integrum quinquennium, docerenturq; primò cōmunia quædam, uelut elementa artis: deinde secretiora & quasi mystica: neq; id à magistro: ille enim abditus & semotus ab oculis, nemini se communicabat: sed responsis, & tanquam oraculis erudiebat iuuentutem, donec tandē perspecto ingenio, moribusq; probatis, qui iudicati fuerāt digni, admittebantur ad conspectum magistri, commerciumq; sermonis. Quod qui assequebantur, confestim domum ad necessarios suos literas, nuntiosq; gratulandi causā mittebant, tanquā eximium quiddam & optandum adepti. Hanc uitæ, morisq; eius insolentiam secuta illa arrogātia est, quod unus ferè Philosophorū omnium dictum & autoritatē suam sanctam haberi instituit pro ratione. Vnde enim celebre illud *αὐτός ἐστιν*, quod usurpare soliti erant, qui tuebantur Pythagoream sententiā, si quando (ut fit) in disputādo premerentur, ut delitescerent in sapientis

piensis magistri autoritate & nomine: At hoc ne tyranni quidem in oppressis ciuitatibus facere soliti sunt, cum quid de pristino statu uolūt dimouere, ut non aliquam proponāt causam & rationem uoluntatis suæ. Sed de egregijs autoribus tanti nominis, artisq; huius appellatione ac titulo, dicta hæc sint. Quæ una si disciplinam profitetur sapientiæ, ridiculè arrogans est: sin studium duntaxat, & cupiditatē, sicut ipsa uis uocabuli declarat, nihil habet eximium præ cæteris, nec quo tantopere gloriatur præter cæteras. Quis enim est quocunq; ex studio, quacunq; ex disciplina, qui non maxime cupiat sapientem esse se; aut cui quicquam omnium rerum uideatur sapiētia esse diuinius? Illud nunc uideamus, quæ autoritate prodierit in lucem, fueritq; iam inde ab initio accipientibus commendata: est enim profectò aliqua ex origine etiam & generis stirpe censenda nobilitas. Vt enim in editione in lucem, ac procreatione liberorū, nisi parentum distinguant nomina, & gentes, pares principio censeantur esse clari obscuris, ingenui seruis: propterea quòd nihil nunc desumum oriens, habere potest ex sese in populum nobilitatem: Ita Philosophiæ prima commendatio à suis inuentoribus, & tanquam parentibus, repetēda est. Vtris igitur tandem tanti inuentionem boni assignatis? Græcis, an ne Barbaris? Video magnum esse certamen: habetq; pars utraque fortes aduocatos: ueruntamen ipsorum etiam confessione Græ-

d : corum

corum superiores Barbari. Itaq; & Aegyptij suum Osirin iactant: Vulcanumq; Nili filium aperuisse Philosophiæ principia annis prope innumerabilibus, antequàm in Græcia de his ipsis rebus mentio ulla haberetur: & Gymnosophistas apud Indos, Druidas apud Gallos, uel ipsa teste Græcia, magnâ sapientiæ famam uideo consecutos. Druidum quidem nomen in summa ut tum habebatur diuini humaniq; iuris notitia, non solum Græcis literis celebratū, sed & ipsi Græco uocabulo Semnothei sunt appellati, propter scientiam colendorum Deorum uis delictet, & celebritatem religionis: atque iisdem de rebus occultissimis primi non pauca ad cognitionem hominum attulisse existimati sunt: magno sanè munere insigniq; beneficio, tanquàm parum multa essent in oculis omnium posita & in conspectu, quæ ingenium, diligentiamq; requirerent. Prædicant Zalmoxin Thraces, quem ex abdito specu responsa sapientiæ percontantibus edentem, nuncq; uelut euasnescentem ab hominum oculis, rursus autem sese in conspectum dedentem, inducti, deceptiq; præstigijs, diuinitatis honore donarunt populares: itaque & sacrificia illi solennia habita, & epulæ institutæ sunt. Athlantem laudibus Lybes ferunt: ob imitationem enim cœlestium circulorum in sphaera lignea relata, quodam quasi sapientiæ præmio, ipsius humeris cœlum sustineri nimium simplex illa memorauit antiquitas: ut illum suæ artis, si modò sapit quicquam,

quicquam, necesse sit poenitere, siquidem ob eam tanto oneri ferundo perpetuo addictus est. Ochum habent Phœnices autorem sapientiæ suæ: at Phœnicias Græci, neque hi solum, sed gentes ferè omnes: literarum enim usum, sine quibus nimirum sapientia non constat, omnium consensu Phœnicibus acceptum latũ fuisse legimus: iidem isti, quod quidem sapientiæ partem aliquam attingit propius, ad maritimos cursus dirigendos, atq; ut non iam fortis esset, sed consilij nauigatio, minorem Vrsam notauerunt, eandem Cynosuram, qua fidunt duce nocturna Phœnices in alto: quæ hoc etiam certior dux est nauigantibus, quod gyro interiore breui conuertitur orbe. Quid dicam de Chaldæis, Magisq; quorum alteri spectandis syderibus, & cœli conuersione intuenda cum statos illic, solenneisq; motus deprehendissent, solisq; & lunæ, cæterorumq; errantium ordines, concurSIONES, momenta perpēdissent, quæq; quo ue die in cœlo euenire necesse esset, aliquanto antè prædicerent, scitum quiddam in uita comperisse uisi sunt, idq; populare, atq; plausibile. Sed illud in ea arte cæteris fallax, ipsis illis fructuosum, quod per uanissimas prædictiones fatalium euentorum, animis imperitorum superstitio implicatis, uiam sibi ad quæstum inuenerunt, & ad dignitatem. Magi porò iam inde à principe illo Zoroastre eadem penè uia ad similem honorem in Persis sunt euecti: sacris enim & ceri-

monijs Deorum procurandis, cum de naturalibus quoque principiis nonnulla differerent, adiungerent præterea diuinationē ex alio certo genere, ac Chaldaei, animos & regum & gentium illarum, captos admiratione sui, tenuerunt. Atqui ab his, quos memoraui, alijsque præterea quam multis, quos nostra nunc prudens prætermittit oratio, antiquitus proditum est, fuisse orta Philosophiæ principia: barbarique omnes ferè, qui in huius laudis contentionem uocati sunt: quorum si inuentum sapientia ista uestra est, atque ab eis, tãquam à principibus, autoritas est huic arti tribuenda: Primum quò nam abierit Græciæ infinita illa & intolerabilis gloria, omnia sibi uindicantis, & quæ omnium artium laudatarum initia, progressus, fines cum ab sese ortos, tũ apud se perfectos uult: Deinde (faueo enim ego quoque hoc loco quidem Græcis) esto, sit tanti, quanti esse uos uultis Philosophia: Quid aut elegas ab indoctis, aut humanum à feris, aut politum à rudibus, aut denique eximium & nobile à barbaris posuit proficisci? Si uero Græciæ ascribendus est iste honos, id quod mehercule malim, si per ipsos liceat, ac nisi domesticis testibus, ijsque admodum probatis lis secundum aduersarium detur: erit aliqua fortassis in origine Philosophiæ commēdatio propter ingenium famamque Græcorum: sed tamē per exiguè, atque infirmè à paucis positum est, primis harum rerũ inuentoribus Lino memoratas esse Thebas

bas, Musæo Athenas, qui etiam primus Decorum generationes fertur tradidisse: quod equidem miror filio datum, cum Eumolpi patris institutū Athenis fuerint mysteria. Attamen siue his, siue illis hoc tantum humano generi munus ferēdum acceptum est, cum illud dicetur, quod tamen etiam antè dictū est, coarguēdam esse eorum temeritatem, qui artem nouam atq; incognitam in lucem modò prodeuntem rei ciuile titulo nuncupauerunt, in qua peruestiganda, atq; in constituendo ecquidnam sapientia sit, ecquid in se contineat, tot postea est seculis, tantis & ingenijs, & studijs elaboratum: tum idem hoc istis ipsis, qui huic arti tantum tribuunt, testibus confirmabitur, quòd in progressu reprehenderunt ipsi sese, tumoremq; & elationem nominis aliquanto uerecundius usu ipso & tractatione admoniti, in Philosophiæ appellationem subsidere uoluerunt. Quòd si illi hoc fecerunt medio in cursu, cum rem eam, quam assidue tractabāt, habere iam notiores coepissent, ut imminuerent aliquid de prioris appellationis grauitate, & nomine: nobis non licebit in ipsa penè calce consistentibus, & iam planè edoctis, quàm puerilis ars tota ista Philosophia sit, diripere illi quod reliquum est autoritatis: eamq; haudquaquam sibi debiti honoris insignibus nudatam, è suggestu, sedēq; principum, in scholarum angulos, & homunculorum inerticulorum discepciones eijcere: quæ præsertim tam sit auida, & helluatrix,

ut

ut nullis certis finibus contenta, in omnia omnium conetur inuadere. Præclarum quibusdam uidetur esse cœlestia cōtemplari : arrogat hoc sibi in primis Philosophia: Moderari politias: ne in hac quidem parte cuiquam relinquit locum : Scire agere uitam prudenter, & nauiter: hoc uerò præcipuum ait esse munus instructi ab sese sapientis: Aptè, & congruenter temporibus loqui, unumq; facundia excellere inter multos : huius quoq; siue artis, siue peritiæ, uiam à se prædicat, & rationem esse petendam. Sunt etiam subtiliores, & minime populares artes, sciens tiæq; mathematicorum, in quas temere irrumpat. Quæ (malum) ista tanta cupiditas, quæ impudentia est: Quoquo modo certè ea non ferenda: suiq; tandem aliquando huic procaci Philosophiæ sunt constitutendi termini, ne ad libidinem euagetur, depascaturq; omnia omnium: ne uel ex alienis opibus intumescat: in quo tamen quantus (ô Dî) error est eorum, qui illi omnia in sinum student congerere: dum enim eam in omneis regiones, orasq; disciplinarum deductam esse cum imperio uolunt, stabile ei nullam relinquunt sedem, ubi tanquam in paterno regno, & auito dominetur: sed semper illi cum hospite litigandum sit: quam nos litem sic dirimamus, si placet: Si una quæq; ars suum & certum habet nomē, quo appelletur, separatimq; & seiunctè denotetur à cæteris, neq; potest unius certæ artis duplex æquè esse nuncupatio: non erit Astrologia Philo

Philosophia, non Geometria, non Musica, non Arithmetica: habent enim singulae hae scientiae appellationes suas, in quibus & sua cuiusque artis uis, facultasque comprehenditur, & à cæteris ea seiungitur. Itaque si Erasistratum suae artis & professionis nota iudicare uoluerimus, appellabimus (opinor) medicum, & Hipparchum astrologum, & Aristoxenum fortasse musicum: Philosophi autem nomen ab unoquoque horum segregabimus. Si uero ad proprias artium cunctarum appellationes commune omnibus nomen accesserit Philosophia, iam non magis fuerit in Astrologia sapiens Eudoxus, quam in statuaria arte Phidias: nec minus sapiens pictor Apelles, quam Philosophus Plato. Quod idem in reliquas etiam uulgares, & mechanicas artes, uel Homero teste, deductum, efficit id, quod antea dixeramus, ridiculam esse horum professionem, qui sibi soli doctrinam arrogant sapientiae. Quare si sententiam tueri & existimationem uolunt suam, tanquam eximium quiddam minimeque uulgare adepti: contrahant Philosophiam necesse est intra fines suos, neque eam liberè ita depopulari sinant aliena: ne si aditum ad prætorem sit, improbitatis damnetur: alienoque cum ignominia reddendo, suas ipsa etiam fortunas, si quas modò habet, multae nomine abijciat. Subijcere igitur Philosophiae, siue mauultis sapientiae, certam rem & propriam, quasi materiam quandam oportet, in qua sola ipsa dominetur, neque

e in ea

in ea admittat consortium reliquarum. Quæro ergo, quam? Hic tibi aliquis uerborum credo amplitudine nos deterrere posse postulans, Philosophia est, inquit, rerum diuinarum humanarumq; scientia. Agnosco sonitum, pompamq; uerborum: certi in re nihil uideo. Quis hunc non irrideat tanto cum strepitu tam tumidè se inferentem? Ecce alter de transuerso festiuam affert collectionem: Si ut quis in quaq; arte excellit, inquit, in ea ipsa arte sapiens perhibetur: uerbi causa Phidias, si in suo opificio summus est, in eo etiam est sapiens: item in pictura Apelles, in fundendo ære Lysippus; sapientium nomen propter egregiam in arte sua cuiusq; præstantiam sunt meriti: quod idem ualet in reliquis: erit ipsa per sese simplex & absoluta sapientia, rerum in mundo præstantissimarum scientia. Huic cyathus mulsi dandus fuit: ualde enim credo laborauit, ut quid deniq; esset sapientia, haberemus exploratum. Num non uidetis ex his quidem definitionibus nihil afferentem quod clarè & dilucidè de se polliceatur, falsæ modò in populum opinionis aucupatricem esse Philosophiam? Verùm his omisis, requiramus potius terminos, quos peregere ij, qui in ea auctoritatem sunt consecuti: Platonem dico, & Aristotelem: hos enim uideo à uobis in toto genere hoc constitui principes. Hi ergo partitionem Philosophiæ trimembrem esse uoluerunt, ut triplex eius munus esset, trina functio: una pars in rerum cœlestium

stium contemplatione, causis, effectibusq; naturæ indagandis uersaretur: Altera mores, leges, instituta, uirtutes, uitiâq; hominum constitueret: Tertia differendi rationem, dijudicâdiq; quid uerum esset in disputando, quid falsum, quid consentaneum, quid repugnans contineret: ita in treis partes omnis diuisa Philosophia est, Naturalem, Moralem, Dialecticam, quam eandem, si Latinis malumus uti, quàm Græcis (etsi Græca quoque ipsa nomina iam in consuetudinem nostram adsciuimus) rationalem forsitan rectè possumus appellare, quod idem est & Logicam. Hac diuisione constituta congregiamur propius, atq; ita ut ne uibrare arma tantummodo, & quosdam edere motus, sed ut manum etiam conferere, & præliū uideamur inire uoluissē: singulasq; hæc partes, quid unaquæq; earum ad sapientiam ualeat, consideremus: ut si uniuersæ artis inutilitatem & ignauiam quodammodo (sic enim dicendum est) potuerimus demonstrare, multorū animos hoc errore liberatos à superstitiosis & inanibus curis, ad illustres & serias occupationes transferamus: nisi quid ad hæc uos. QUID nam? CITRARIUS inquit, nisi nos in magna audiēdi expectatione esse: ut experiamur, Phædre, tua ista singularis eloquentia num queat in maxima causa stabilem & fixam multorum de Philosophiæ uirtute labefactare opinionem. Nec tamen ego is sum, qui bellum illi habeam indictum: nec tam reprehendendâ & abij-

ciendam Philosophiam, quàm modum in ea quær-
rendū puto: in quo sentio, Phædre, aliqua ex parte
tecum, proboq; Neoptolomij sententiã, quæ mihi
cum Sadoletto meo una est dissensio. Ille enim (ut ui-
des ipse) operam omnem in ea locari, & nihil agi
aliud in uita rectum putat. Sed tu perge quæso, &
in hanc partem potius incumbe tamen: nam qui
amplius æquo collaudent Philosophiam, nimium
sæpe multi, & mihi molesti sunt. A T Q V I, inquit
G A L L V S, mihi contrà modò mirari ueniebat in
mentem, cùm Philosophiã uenerer etiam summos
pere, non solùm diligam, quî possem non æquis aus-
ribus modò, uerum etiam studiosè audire eam uirtus
perantem Phædrum. Sed profectò sic est, ut dicitur:
Nil tam iniquum, quod non dicendo æquum uideri
queat. Cum enim tantus in hoc homine lepos sit, ut
me illius quidem semper, sed & alios omneis sæpe
mirabiliter delectet oratio: tum uis ingenij tanta,
ut in quam se cunq; incitet partem, aliorum secum
studia pertrahat, & uim quodammodo afferat sen-
sibus audientium: itaque uereri iam ipse cœpissem,
ne quid de mea pristina uoluntate erga Philoso-
phiam dimitterem, nisi me confirmaret expecta-
tio defensionis, quam Sadoletus noster est habi-
turus: quod ipsum illi quidem non difficilius fus-
turum est, quòd tecum nunc non adest is, qui esse
semper unà solet, nec à te unquam, Phædre, di-
scedere, alterum lumen urbanæ, huius facundiae

Camil

Camillus Porcius. H I C E G O, Hoc, Galle, inquā,
 quòd mea fiducia te ipsum cōfirmes, uide ne in frau-
 dem potius te deducat: namq; ego quis sum? aut
 quid possum per me deniq;? Sed si quid fuerit,
 quod utinā aliquid sit, bonitas causæ suppeditarit
 mihi facultatem aliquam respondendi: & tamen
 Phædrum nostrum paratiorem esse uideo, quàm
 expectaremus: quam enim sibi accusandam & re-
 fellendam assumpsit Philosophiam, ab ea ipse arma
 uidetur mutuatus, quæ in illam ipsam demum ora-
 torijs uiribus, & neruis intorqueat. Equidem uellē
 Marius Volaterranus adesset, amicissimus omniū
 nostrum, homo cū acerrimū ingenij, tum omni
 quidem ille liberali doctrina, sed in his Philosophię
 studijs in primis exercitatissimus: quē nos omnes
 audiuius sæpe quacuncq; esset de quæstione pro-
 positum, in utramuis partem differētem ita copiosè
 atq; amplè, ut quemadmodum de Carneade di-
 ctum reliquit Cato, quòd non posset eo dicente dis-
 cerni quid uerum esset, & quid falsum: quòd incre-
 dibili quadam ingenij & orationis copā audientiū
 mentes obruebat. Sic huius sit & sublimibus senten-
 tijs, & acutissimis argumentis referta disputatio: in
 extenuando uerò, & amplificando, tanta uis, ut ni-
 hil illo laudante humile, nihil uituperante uideatur
 excelsum: haud sanè ille nunc pateretur desertam,
 & oppugnatam iacēre Philosophiam: præsertim in
 eam impetum faciente Phædro, quo cum ille sem-

per fuit cunctorum opinione quasi comparatus: summum in utroque ingenium, summa eruditio, salis & facetiarum ubertas par: uerum ille Philosophiæ aliis quantum & studio, & amore coniunctior: Phædrus hanc popularem orationis laudem magis est secutus, quæ nunc fretus, si ipso iudice populo uti posset, nec ille causam (ut ego arbitror) parum æquam, haud difficiliter obtineret. Sed bene agitur cum Philosophia, quod à populari disceptatione remota est. Quamobrem ede nobis Phædre ea, quæ aduersus eam nunc primum tu quidem, neque leuiter, sed & diu antea, & perque accuratè es meditatus. T V M I L L E, Faciam equidem, inquit, atque hoc tibi studiosius nunc morem geram, quod sis in me tu postea aduersarius lenior: nec tamen mihi interdictum putabo, quin si ad paucos iudices me perculeris, ad populum mihi parata sit prouocatio. H I C cum arrissemus, V I D E T V R, inquit, ordo rerum & natura postulare, ut prius describamus sapientiæ formam: quæ, mea quidem sententia, cum aptior ex se ipsa sit, tum ad uitam splendide & cum laude degendam accommodatior: qua posita, facillimum postea fuerit, qui ab hoc signo, tanquam nauigantes ab Arctico polo, aberrauerint, eorum errorem insipientiamque coarguere. Quoniã igitur sapientem esse uolumus, non qui in solitudine, neque cum paucis ineptis, sed qui in coetu, concilijsque hominum uitam agat: communesque cæterorum uoluntates & studia

studia secutus, referat ad sese omnia, quæ quidem sint expetenda, siue adeo quæ expetantur: expetitur enim idem, & expetendum est, quod opinione plurimorum iudicatur dignum, ut in eo adipiscendo omnis cura industriaque ponatur: erit sapientia, earum rerum comparandarum scientia, quæ ab eo genere hominum, quo cum uerferis, & æstimentur plurimi, & maxime expetantur: hoc definitione breuius comprehensum, oratione est dilatandum. Tria sunt (ut mihi quidem uidetur) in quibus omnis humani consilij desyderijque, & ratio uertitur, & appetitio: eaque ueteri etiam prouerbio notata, quo sic distinguitur: Optimū esse bene ualere, honorari pulcherrimum, iucundissimum frui eo, quod quis maxime cupiat: ita salutis, gloriæ, iucunditatis præclara esse uidetur & expetenda adeptio: nec uero quenquam esse omnino omnium mortalium reor, qui non hæc sibi cuncta adesse maxime uelit. Sed uoluntas nullam habet laudem: libera enim est omnibus, & tardis iuxta, solertibusque communis. Scire autem inuenire sibi ad potiunda hæc aditum: & cum uniuersa in hoc certamen tanquam in cursum, aut lucum descendat multitudo, præripere unum cæteris palmam adipiscendi, aut certe inter paucos suū locum & partem obtinere: hoc iam proprium illius sapientiæ est, cuius nos iudicationem non uni, aut alteri, sed frequentissimo consilio permittendam statuimus. Nam si quis singulari quadam opinione præditus,

præditus, diuersus longè à populi iudicio, aliam sibi nescio quam nocturnis lucubrationibus in silentio & cubiculo effingit sapientiā (ut nunc taceamus alienam cum quandam & deuiam, longèq; aberrantem à communi prudentia, ac plenam uanitatis sequi rationē) quid, quæso, aliquid is ut efficiat, quàm erit amplum illud atq; magnum, in quo neminem ille omnino æmulum, nullum riualem est habiturus? An ignoramus contentione certantium, ac ueluti licitatione quadam, augeri rerum precia, atq; æstimationes? certoq; indicio esse iacere eas res, & penitus abiectas esse, in queis nulla inter se contrà licentium studia conflictantur? At hoc minime uult sapiens: uerùm quod maximi & est, & habetur, in eo maxime conatur excellere. Ad multitudinis igitur iudicium acta sua præcipue consiliaq; accomodat. Vt enim habitum corporis, atq; uestitum: ut ædificationis formam, domiciliorumq; ut lauandi, cœnandi, loquendi morem: sic actiones, & consilia totius uitæ ad populi iudicia flectere, dirigereq; debemus: porro illa temporibus reguntur. Est ergo primum sapientis munus seruire tempori, & semper in eo, quodcūq; plurimi fuerit, præcipuas suas partes, & principem autoritatem esse, postulare. Iam ne cernitis totius sapientiæ intelligētiam, quam Philosophi suam esse uolunt, populum sibi potiore iure uendicare? Et sanè æquius multo est, unum cōcedere sententijs plurimorum, quàm unius plurimos.

mos. Desciscere autem ab opinione & decreto multitudinis, aut arrogantiae est non ferendae, aut leuitatis irridendae. At populus nunquam diu in eadem sententia permanet. Quid tum? Turpe est sapientiae uariare decreta. Quid tu postulas sempiterna esse haec, quae generata sunt mortalia? ut enim Valetudo non ex eisdem semper, sed ex alijs, & alijs retinetur cibis: sic sapientiae consilia non perpetuo una sunt, sed ad tempus se accommodant, & ad fortunam, cuius praecipuum est, in humanis rebus posse dominari. Nec tamen etiam si non semper sibi multitudo in eadem opinione constans est, sed aliò aliàs, & tanquam fluctu quodam fertur ad iudicandum, ideo de honore detrahitur sapientiae. Sed haud scio, an uegetior hac re quidem, & semetipsa solertior quodammodo sapientia ipsa fiat: ac uti facem motus, sic illam mutatio, & uariatio accendat. Vt enim si idem mos perpetuo tenendus esset, & consuetudo eadem, facile esset unicuique inueteratam usu, & per manus traditam, uitae sapienter degendae retinere disciplinam: Sic quoniam mutandae saepe opiniones, ferendae uicissitudines, studia in diuersam partem conuertenda, prioris uitae ratio omnis atque descriptio saepe etiam repetere denuo fingenda est, habet munus sapientia non minus difficile, quam praecclarum, in uarias sese formas crebro commutandi: ut ad omnes euentus rerum, uarietatesque temporum promptam solertiam afferat, Floruit in gubernatione Reip. P. Scipio Nasica Pont.

ca Pont. Maximus: neque in ea solum sapientis uiri laudem, sed optimi etiam cognomen senatus iudicio, matre Idæa Pelsinunte hospitio accipienda, meruit. Atque is ipse cum subitis seditionibus turbata esset Respub. lenitatem illam suam pristinam, odio inimicorum incrudescere passus est; nec minus dissidentibus factionibus uictores suos esse uoluit, quam antea tranquillo Reip. statu, ornatos florentesque uoluerat. Lælius uero eodem illo tempore etiam proprio cognomine dictus est Sapiens: quia cum agrarijs prius legibus fautorem se præbuisset, simul ac præsensit multorum se odia in caput suum concitaturum, destitit ab incepto, transijtque ad eam partem, ut locupletes censeret in agrorum possessione esse retinendos. Flexit horum uterque consilia & actiones suas ad id, quod expediebat, quodque tempus ferebat: egere sapienter. Quod si lenitatem Scipio, constantiam Lælius tenuissent, præceptis forsitan huius uestræ paruissent Philosophiæ: sapientium quidem nomine, & laude caruissent. Vnus est ex omni antiquitate, quem maxime admirer, C. Iulius Cæsar: cuius tanta animi uirtus, tantum ingenium fuit, ut angustius theatrum gloriæ suæ orbem hunc terræ, quem incolimus, quam ipse meritus sit, habuisse uideatur. Hic non ad unam, alteramue laudem, sed ad omnia summa natus: cum etiam tum adolescens probari in foro eloquentiam uideret, adhibuit studium, in ea nemini ut esset secundus: ex
bellica

bellica porro uirtute gloriam sibi meditatus, & potentiam: magnitudine animi perfecit, & industria, ut non solum gentium omnium uictor, sed naturæ etiam esset, Oceano domito, atq; eo toto summotis nationibus, non solum inuestigatis, uerum etiam bello armisq; subactis: fluminibus, quæ neuiquam permeabilia uiderentur, iugo pontium deuinctis: infinitis spatijs terrarum celerius cursu, quàm fama peragrat. Atq; hic idem, domi & in patria, ubi intellexit priuatim quæri opes, Remp. in medio prædæ omnibus esse: operam dedit, ut cunctorū existeret princeps, imperiumq; sibi acquireret; ad salutem illud quidem, non ad perniciem ciuitatis, si per homines impios ea quæ cōstituerat efficere situs esset. In hoc ego homine maximam uim sapientiæ fuisse duco: & certè talem statuo esse debere, quem iandudum effingere conor sapientē, alto animo, acutum, sagacem, industrium, longè prouidentem in posterum, suam uirtutem impartientē omnibus, sibi præcipua & maxima appetentem, opes, imperium, auctoritatem, gloriam; non enim obliuiscitur sui sapiētia, nec suorum penitus commodorū curam abiicit, sed refert ad se omnia sapiens, consulitq; sibi potissimū: nec putat digniorem esse quenquā, qui commodis uitæ honoribusq; fruatur: habetq; illud in ore, opinor, Pacuui, Sapientem qui sibi prodesse nequeat, nequicquam sapere. Hanc ego artem, & disciplinam agendæ uitæ, sapientiam uoco, ciuilem quandā

popularemque Philosophiā, erigentem homines ad facta tum splendida, tum in multitudinem gloriosa: eosque magnos, potentes, nobiles, atque, ut uno uerbo complectar omnia, principes denique efficientem. Conferte nunc istam uestrā, si placet, quam in scholis quotidie declamitatis Philosophiā, ut hæc ab illa quid intersit, diiudicare possimus. Ac primum, tanquā uestibulo amplo, atque excelsio ornare illam cupientes, præponitis rerum cœlestium contemplationem & occultarum rerum, causarumque indagationem: ea enim est Physice, quæ primū tota incerta est, minimeque comprehēdibilis: deinde etiam si comprehendatur, prorsus hominum uitæ inutilis & superuacanea. Quid enim poterit gloriari se adeptum esse, qui illa cognouerit, cum non sua, sed aliena cognouerit? uerū cognosci non possunt. An ille mundi effector, & fabricator tanti operis Deus, tantis locorum interuallis à semetipso nos disiunxisset, si suas sedes, arcanaque consilia nobis nota esse uoluisset? Quid est aliud bellum indicere Dijs, more gygantum, quàm illuc niti ascendere, quò nobis aditus omnis penitus est interclusus? Atqui mihi uidentur ueteres illi haud illepidè de gygantibus fabulati, quò horum insolentiam, temeritatemque arguerent: quod ea re firmitus adducor, ut credam, quòd ut illi montibus tribus, tanquam gradibus, sic Philosophi trinis, antea à nobis memoratis Philosophiæ partibus, in altissima loca moliuntur ascen

ascensum: Ter sunt conati imponere Pelio Ossan,
 Scilicet atq; Ossæ frōdosum inuoluere Olympū:
 Ter pater extructos disiecit fulmine mōtes, Scripsit
 diuinè, ut omnia, poëta omnium maximus: nec tam
 ille ut gygātum, qui certè nulli id egerunt, quàm ut
 hominum suis ingenijs nimium confidentiū arro-
 gantiam refelleret. Quanquam non ingenij est, sed
 dementiæ, quæ nullo intelligi pacto queunt, in ea ni-
 hilominus mentis aciem ad intelligendum intende-
 re. Nam isti quidem ingenium si habuissent, primū
 quidem sciri ista non posse uel ipsi cognouissent, uel
 doctissimis hominibus, ac principibus disciplinarū
 suarū affirmatibus credidissent. Deinde ea omnino
 nihil ad se pertinere. Postremò quas ad res ingeniū
 adhiberi, & prudentiam oporteret, ad eas res adhi-
 buissent, in cœtibus hominum uidelicet, & cōcilia-
 bulis ciuitatum: ubi non in umbra, & cubiculo, sed
 in sole, atq; campo: non in argutijs, & conclus-
 siunculis, sed in agendo & regendo sapientia ipsa
 cernitur. Verum ad hoc genus uitæ præstabile atq;
 eximium, tãquam abortu naturæ quodam cum mi-
 nime idonei nati essent, confugientes in ocium & so-
 litudinem, ignauiae culpam & tarditatis, ad cœlestis
 scientiæ laudem transferre tentauerunt: cœlicp res,
 rationes, causas, freti ocij abundantia, formam, mo-
 tum, materiam ex qua constet, opificem à quo sit fa-
 ctus, finem quo intendat, inquirere: cum terrena, &
 quæ in manibus, quæcp ante oculos erant, perciperet

re non potuissent. Quod est ante pedes nemo spectat : cœli scrutantur plagas , Antiquus uersus in hosce factus ; sicut Thaletem unum è septem illis argutè lusum ab anicula legimus : qui cùm domo semel antelucanus egrediens, ut siderum quorundā annotaret cursum , in subiectam pedibus foueam, quam non animaduernerat, cecidisset: Quid, inquit anus ancilla acutè procax, à te expectandum Thales est, ut nobis de remotissimis rebus perceptum tradas, cùm ante pedes quæ sunt, ea minime intueare? Acris in illum obiurgatio : sed ualet in reliquos. Omnes enim qui huic arti se, & studio dediderunt, aut desperatione ducti, posse se inter cæteros suum locum , & statum obtinere , huc sunt compulsi: aut uanitate quadam ingenij , leuitateq; naturæ friuolam oblectationem hanc , & arridentem ocio , desidiaq; disciplinam , serijs occupationibus antetulerunt. Huiusmodi homo Anaxagoras fuit , qui percontanti cuidam , Quonam esset natus : Ad cœlestium contemplationem, inquit. Si oculis intuendā, nihil ille habebat quàm cæteri homines plus: Si mente & scientia comprehendendam , næ Anaxagoras ad rem nullam natus, si quidem ea sequebatur, quæ non poterat assequi: haud secus multò, ac mens ipsa illa, cuius idem ipse repertor fuit, quam infinito antea tempore cessantem , tandem admouisse manus tradidit, ad minutissimas particulas corporum naturalium in unum confusas secernendas ; quæ infinita

nita & interminabilis secretio, non tam Anaxagoram mentem arguit frustra suscepti laboris, quam Anaxagoram dementiæ; atq; hic ipse, quod liberius hisce cōmentitijs rebus uacaret, ne ue aliam in partem cura ulla abduceretur, agros quos fructuosissimos habebat, incultos dicitur reliquisse, nequaquā laboriosam mentem illam, quam tantopere adsciscerebat, imitatus; cum non laborem ipse modò, sed cogitationem quoq; effugeret laboris. An hoc conuenire sapientiæ existimauit, cum laborem mentis tantis præconijs efferret, se nihil laborare? & cum mēs alieni tantam curam gereret, sua ipsum negligere? Quanto sapientior eius auditor Pericles, hac maturè dimissa disciplina, ad regendam Remp. se contulit: in qua per quadraginta fuit annos, non Athenis solùm, sed in tota Græcia ferè princeps. Atq; hæc sententia, nullam sublimium rerum atq; occultarū nec sciri posse à nobis nec percipi, si autoribus nobis nūc demum prodijset in lucē, nō dubitaremus eam sanè cum asseuerare constanter, tum etiam rebus & argumentis confirmare fortiter. Verùm si qua eius tamen inuidia apud aliquos est, nil prohibet, opinor, quin eam à nobis depellamus, & ad eos ipsos, quos contra dicimus, reijciamus. Etenim, quod sacræ testantur literæ, à Rege superbissimo extructam turrim, cuius apex, & excelsitas in cœlū finienda esset: tum Deum ad disturbandum opus uarietates linguarum, & uersiuocales sonos, discrepantiasq;

pantiasq; uerborum immisiffse, ut aliud petentibus, aliud accipiētib; ijs qui fabricæ instabant, ab opere desisteretur: idem mihi optimè quadrare in Philosophos uidetur, quorū Deum cū misereret potius, quàm his iratus esset (nescit enim diuina bonitas irasci) de summis rebus acerrimis illos discensionibus inter se concitauisse, ut alius alium redarguendo, omnes ineptam curam deponerent. Enim uero quem primum testem ab istorum parte, contra istos eos ipsos excitabimus? Opinor illum quem uos principem, quem autorem, quem parentem Philosophiæ dicitis, Socratem. Quid ergo is, quid affert: Se scire hoc unū, quòd nihil sciret: atq; hanc unam sibi adesse sapientiam, quòd incerta pro certis non duceret. Nec uerò sensit hoc solum, sed palàm quoq; omni tempore prædicauit: nec prædicauit modò, uerum etiam re ipsa secutus est. Cum enim Archelai in Phisicis discipulus fuisset, eius, qui Anaxagoram audierat, totam eam penitus abiicit, contempsitq; scientiam: tum quòd certi in ea nihil inesset, tum quòd minimum cōduceret (ut ipse dicebat) ad beatam uitam, in qua una conquirenda potissimum homini esset elaborandum. Neq; adeò leuius ille Anaxagoram accusabat, quàm nos eundem paulò antè reprehenderimus: quòd (sic enim eum loquentem inducit Xenophon) altum quidam, & supra se sapiens, Deorum opera patefacere tentasset, quæ illi operta esse uoluissent, Empedocles

des uerò, cuius elegans de rebus naturalibus poemata, plus ingenij & uenustatis, quàm sapientiæ profectò continet. Interdum quasi furore incitatus, nihil posse percipi, ne sensibus quidem exclamat; nihil nos cernere, omnia in abstruso penitus abdita esse. Idemq; ait, ad rem præsentem quidem, & quæ occurrerit, consilium homini adesse: mutatis autem his rebus, in quas antè intuebatur, mutari & hominis sensum ac consilium: ut uideatur Protagoream rationem, quæ post exorta, & copiosius defensa est, his paucis uerbis innuere: cum quo sentiens Parmenides uetustus autor & nobilis, Quo quisque membrorum temperamento præditus est, inquit, sic habet mentem temperamentum illud sequentem. Exstat etiam responsum Anaxagoræ, Talia esse cuique quæ occurrant, qualia ab eo concipiantur. Tanta enim mobilitas, & quasi fuga rerum cunctarum à ueteribus illis animaduvertebatur, ut negaret Heraclitus bis nos in eodem lauare flumine: quod idem est ac negare, bis eadem nos uerè uti posse ratione. In quo factum illud Eratyli, qui cum Heraclitum reprehendens, ne semel quidem id fieri posse censeret, iam oratione in rebus enarrandis nihil utebatur, quòd negaret rem expectare moram dictionis posse: sed tantummodo sublato digito, capiteq; reiecto actum non esse agendum indicabat. Democritus uerò naturæ ueluti succensens, obuoluta dicit esse omnia, & in profundo penitus à nostris aspectibus

retrusa. Quanquam hîc quidem, quò melius, credo, illa cerneret, oculis se dedita opera dicitur priuauisse : cùm iam Empedoclem idem furor, ne diutius is frustra in quærendo operam sumeret, in crateras Actnæ præcipitem iecisset. Vtor singulis testibus, ijsq; spectatis : quorum si autoritati fides adiungenda est, nihil est cur inanem hunc laborem in Physicis, illis ipsis desperantibus, nos subeamus : Neque enim aliud est ueritatem inquirere, ut ait Aristoteles, quàm uolantia sectari : hoc est, ea quæ comprehendendi non possunt, captare cupere. Sin autem deroganda, his præclaris autoribus in primis nixa in lucem prodijt Philosophia. Quid secta una Philosophorum, & quidem ea nobilis Academia, siue ea uetus, siue noua sit, non ne hoc dogmate uniuersa, & tanquam fundamento nititur, nil percipi certò posse, nec rei cuiquam assentiendum esse? Cum enim uisa (ea Græci phantasmata) quibus mens pellitur, & ad iudicandum adducitur, talia prorsus à falso esse possint, qualia sunt à uero, non esse regulam, qua liquidò demonstratur, altera ab alteris quicquā interesse. Huius sententiæ princeps fuit, ut mihi quidem uidetur, Plato, atque ab ipso illo Socrate : sed hic primus rationem hanc dubitandi in scriptis prodidit, effinxitq; Socraticum morem, cuius admirabilis eloquentia mihi omni Philosophia uidetur præstantior. Sanè ergo is non tantopere Socratis *ἐπὶ τὴν* illam, nos sustentiam, si placet, appellemus,
nihil

nihil pro certo affirmandi, literis persecutus esset, si non eandem ipse sententiam tenuisset. Hanc à Platone acceptam, aliquot annis post Polemonis auditor renouauit Arcesilas : Quintus deinceps ab eo Carneades etiam acrius defensitauit. Hæc me labore hoc leuat, uel inuidia potius. Quod enim est à me positum, causas rerum occultas, & scientiam cœlestium non posse percipi, hæc non modò suscipit defendendum, sed dilatat etiam : & quidem amplius aliquanto quàm uelim. Tollit enim præterea etiam iudicia sensuum, neque relinquit omnino quicquam, in quo possit assensio nostra consistere. Quamobrè relinquamus hanc, qua ex parte fundit se latius, & suam litem facit, eam ipsam quoque manifestò insipientem : quod enim percipi non posse sentit, id ipsum illa uehementer, ut percipiat, elaborat. Quatenus uerò nobiscum facit, cum præsidio quidem utamur illius, tum autem non minus eorum, qui perceptionem admittunt, atque scientiam : quos inter si tot iam seculis cōuenire potuisset, ut de omnibus, aut saltem de primis atque præcipuis sentirent eadem, esset aliquid fortasse, in quo nobis quoque acquiescendum putaremus. Nunc quid de occultis rebus, atque obscuris dicam, cum in clarissimis tanta sit dissensio? Sole hoc quid lucidius esse potest? unde omne lumen, omnis claritas, omnis in cœlo & in terra est radiatio : atqui hunc ipsum, cuius aspectus maxime implet oculos nostros, non modò quid sit, sed ne

quantus quidem sit, horum adhuc concordī sententia potuit definiri. Epicurus bipedalem eum esse, aut non multò plus, uel minus: scilicet hic omnia suis oculis indulgens, quorum ut saluum teneat, incolū meq; iudiciū, audet negare etiā impudenti mendacio, sibi unquam cum torsisset aciem, duas è lychno flammulas uibrare uisas. Mathematici duos deuginti partibus maiorem quàm terrā: Num hæc exigua differentia est? Creuit impudentia: centum enim & sexaginta partibus sunt, qui uelint terram à sole superari. Adhibeamus Architectum peritum qui horum septempeda controuersias coërceat: uerum non metiendo, opinor, sed cédendo. Nam qua ex materia, quòue ex corpore factus sit, ausus solus est Anaxagoras dicere: ferrum esse illum igne penitus candens, ueritus credo ne si ad secernendum hunc quoque mens illa sua manus admouisset, solem in mundo non haberemus. Hoc fortassis Democritus neglexisset: Anaxagoras pertimuit: itaq; muniuit & duritie ferri, & ardore ignis: atque ne illum parum forsitan profecisse hac sententia existis metis, hoc nomine ab Atheniensibus impietatis est damnatus. Quid nobis omnibus magis esse potest persuasum (nam perceptum non audeo dicere) q̃ cœlum circūcirca nos torqueri; terrā in infimo mundi iacere immobilē? Extitit tamen Philosophus Syracusanus Nicæas, qui stare cætera cuncta cēseret, solemq; rerum omniū terram circū axem moueri, ex
cœq;

eoꝛꝫ fieri, ut eadem apparerent omnia, quæ circum
 uerſo cœlo eueniunt: Huic ut defuerit ſua ratio, te
 meritas certe pro ratione affuit: adeo nihil tam ab
 ſurdè dicitur, quod non aliquo autore defendatur
 Philoſopho. Iam cœleſtium orbium numerus num
 adhuc ſatis perueſtigatus eſt: ſinem equidem uideo
 nullum fore, ſi quod uſqꝫ adhuc factum eſt, ſingulis
 propè ſeculis nouus aliquis orbis præterea adiſcia
 tur. Nam de epicyclis aſtra ferentibus, ac de orbibus
 à medio mundi dimotis, quos eccentricos ipſi
 uocant, ſint ne, nec ne ſint, digladiantur per me licet
 cum Philoſophis Aſtologi: quorꝫ alteri ſtatos fieri
 motus ſine his, alteri cum his naturam ſtare poſſe
 negant. Atqꝫ hæc tam perſpicua in mundo & ma
 niſeſta quæ palàm feriunt oculos, auerſoſqꝫ etià in
 aliam partem, rerum pulcherrimarum ſpectaculo
 ad contemplationem ſui trahunt, ſi ignorata ſunt,
 & impercepta, quid erit de obſcuriſſimis rebus, & à
 ſenſu noſtro abſconditis dicendum: Omittamus de
 Dijs loqui, quo in genere nos Deum unū agnoſci
 mus, tribus perſonis, eadem mente, eodem numine,
 eadem natura, eadem poteſtate in abſolutam & ſim
 plicem unitatem redeuntem: non enim hoc à Philo
 ſophia, ſed ab ipſomet Deo, & Dei filio accepimus:
 irrideamusqꝫ in hac re tanta Philoſophorum ine
 ptias: delitias uidelicet Epicuri monogrāmos Deos
 conſtituentis, ſine corpore, ſine farto, ſola circum
 circa lineata deſcriptione, humanæ figuræ ſimiles:

Stoicorum quoqꝫ anum illam fatidicam contemnamus: Illud strictim attingamus, quòd sanè non cesserit nemo: principio incognito, quæ ex eo principio gignantur nequaquam posse cognosci. Quod ergo nam est rerum naturalium principium? num aqua, quod Thales posuit? quanquam ille ueluti diuinans, quòd siti atqꝫ æstu esset moriturus, conciliandre sibi tanto honore curauit aquam: An aër, ut placuit Anaximeni? uel ignis, quod Heraclyto? item finitum principium? ne, an infinitum? mobile, an? ne immotum? Video maximas dissensiones. Nam atomi Democriticæ innumerabiles quotidie mundos fortuitis concursibus efficientes, consumunt cogitationes nostras immensitate regionum, quas peruagantur, & turba corpusculorum. Materiam porro suam Aristoteles, quam sine forma ulla, & sine ratione esse uoluit, unde cognosci posset: quomodo ipse cognouit? Longum est enumerare singula: & patere tamè arbitror, ignorari Physica illis autoribus, quibus tractata sunt: quorum simul ut quis sententiam suam dixerit, non mecum illi quidem, sed cum cæteris Philosophis futurum sit negotium, clamore ac iurgio pro contraria parte tendentibus. Sapientia quidem in hac parte Philosophiæ tantum abest, ut aliquid insit, ut contra sapienter deliberet, qui hæc tanquam ingenijs nostris longè exuperantiora omitenda penitus ducat. Non enim profectò tantis sese à nobis spatijs Deus abiūxisset, neqꝫ tot aliud supra aliud

aliud circumduxisset, tam uasta & diffusa elementorum corpora, igne quoque postremo commutabilem mundum hunc uallasset, superinduxisset inquietos ambitus cœlestium orbium tot, atq; tantorum, cursuq; eos immenso, ac inenarrabili in gyrū cōcitasset, solidissima & firmissima compactos materia, si à nobis homunculis humi stratis, & in infimum locum deiectis percipi hæc omnia, & cōprehendi uoluisset. Sed fac cognosci: quid tādē quasi nostra interest? Chreme, tantum ne ab re tua est ocij tibi, aliena ut cures, ea ad te quæ nihil attinent: Iure igitur Socrates scientiam hanc reiecit, uel ut obscuram, uel tanquam nō necessariam: Philosophiamq; peregrinantem procul à nobis, & in cœlo errandam, credo hospitium quærentem, deduxit quasi manu in ciuitatem: uersariq; inter homines assuescit: eiq; præfecit muneri, ut de bonis rebus & malis ad uitam potius pertinētibus, inquireret. At enim ingenua est, & homine libero digna hæc speculatio: cur non curiosa potius, & ei ipsi molesta, cui te nimium studeas insinuare? An ego si quæ domi ago, & in cubiculo, ea curiosius quis perscrutetur, feram moleste? neq; uerū arbitrer pati, ut meis intimis rebus speculator immineat: & Deum persuasum nobis habebimus hac inani nostra curiositate delectari? Nam de principibus quid narrem? quorum ad Deum propius accedit imitatio? Regis Persarum ferunt speciem & maiestatem cuiusmodi esse, nihil ut illa

BIBLIOTHECA

FOLIO

MUSEI IN PALAZZO DI S. MARCO
VENETIA

illa augustius, nihil spectabilius nec cogitari quidē possit. Ipsum quidem Susis, aut Ecbatanis se continentem, abditum à multitudinis oculis, habitare regalem domum admirabili opere perfectam, cuius parietes ex omni parte auro, ebore, electroq; persulgeant: uestibula porrò domus multa extare, amplaq; sepris distincta pluribus, aliquot inter se stadiorum intervallo, muris præaltis, & æneis foribus munita, quorum custodes sint eximiæ dignitatis viri: è quibus principes & summates qui sunt, duces, dynastæ, satrapes in primo proxime regiam assident uestibulo, ceteri deinceps ordine suo succedunt, omnes magnifico cultu pro honoræ scilicet & dignitatis ratione. Ianitores deinde cum his, & qui oculi auresq; regis appellentur Græco uocabulo apta coagmentatione *ὑπάρχοντες*, quorum usu ac ministerio & uideat rex cuncta, & audiat. Tum autem dispositi suis locis, quæstores, scribæ, familiarum & uenationum duces, quicq; adeuntium dona recipiant, quorum quidem donorum innumerabilis quotidie ad regem confluat multitudo. Deniq; operum, negotiorumq; cunctorum quæ ad gubernationem regni necessaria sint, sui cuiusq; muneris curatores, atq; præfecti: ipsam autem uniuersæ Asiæ dominationem terminatam ab Occidente Hellesponto, ad Orientem Indis, per regna & nationes & satrapias tributam, præsidibus esse ornatam suis, qui se seruos magni regis cuncti confiteantur: tum infinitam

nitam multitudinem existere cursorum, tabellionū,
 speculatorum, nuntiorum: ac montanorū præcipuè
 igniū, quibus rerum nouarū signa, si quæ de impro-
 uiso res accidunt, & procul & propere dari possint:
 Quorum quidem omniū tantus sit ordo, & ea cele-
 ritas, ac diligentia, ut quod in ultimis oris imperij
 nouatum sit, id eodem ipsomet die, succedentibus
 sibi inuicem nuncijs, ignibusq̃, Susis, aut Ecbata-
 nis à Rege intelligatur. Ad hunc talem tantumq̃ re-
 gem, inq̃ eius aulam, secretumq̃ cubiculum si quis
 aspirare conetur, rimando & speculando singula cu-
 riosius, utrum ab eo initurus gratiam, an offensio-
 nem contracturus esse uideatur? Quæ ergo auda-
 cia est, nihil uereri Deum in eadē causa, in qua per-
 timescimus Regem? & rimari ac indagare eius ar-
 cana conari, quæ ne si oculis quidem intueamur,
 quæ & quāta sint, capere animo possimus? An non
 diuino oraculo est proditum, Cælum cœli domi-
 no, terram uerò homini esse datam? ut cum eos fi-
 nes, quibus circumscripti sumus, agnosceremus, ex-
 tra hos egredi, & ad sublimiora euolare uelle non
 contenderemus. Sed de huius scientiæ inutilitate,
 necnon uanitate, impudentiaq̃ eorum, qui tantum
 sibi ex ea arrogant, etsi plura poterant dici: tamen
 quoniam satis multa diximus, trāseundum ad mo-
 res est: in qua parte maxime Philosophorum se ia-
 ctat oratio: audent enim (quid est autem quod non
 audeant?) palàm de se prædicare, idq̃ cum sermo-
 h nibus,

nibus, tum in scribēdo asserere, ciuitates ab sese constitutas, leges humano generi datas, artemq; totam recte & ordine uiuendi à Philosophia & inuentam, & perfectam fuisse. Habeo hūce gratiam, magno enim errore sum liberatus: quod enim antea ignorabam Philosophum fuisse Romulum, qui hanc urbem, quam incolimus, omnium sine controuersia maximam, & multo præstantissimam, condiderit: id nunc horum beneficio scio. Velim tamen audire, si commodum est, quam in Philosophia sectam fuerit professus Romulus. Atqui huius ætati longè dispares septem illi, quorum nomen in Græcia floruisse diximus: necdum Philosophiæ uox usquam gentiū fuerat audita, cū Romulus singulari quadam, & penè diuina sapientia præditus, ex eo uide licet sapientiæ genere, non quod isti, sed quod nos suprà descripsimus, anno, ut est literis traditum, septimæ Olympiadis primo, Charopo Archōte Athenis, non solum condidit hanc ciuitatem, sed etiam optimis exornauit & legibus, & institutis, talēq; studium uirtutis iniecit, ut ab eo primo inductu, ceu aquæ percussæ in circulos solent, usque ad ultimos orbis terrarum terminos imperium populi Romani fuerit propagatum. Et quoniam argutulè uerba isti captant, in quo uno studio illorum omnis opera consumitur: teneamus stabilem distinctionem illam, rationemq; ueræ sapientiæ, quam nos antea edidimus, disiunctam ab horum inani, futiliq; sapientia: ne

tia: ne similitudine uerbi aberremus, ne'ue cum quid sapienter factum dicimus, id intelligamus Philosophè (ut sic loquar) esse factum : sed prudenter , sed strenuè, sed nauiter, ad laudem honorificè, ipsi illi qui fecerit, commodè & utiliter. Conantur isti quidam uno sapientiæ uerbo inuoluere omnia, sed resistendum impudentiæ est, atque è duabus diuersissimis unius uocabuli sententijs, sapientia nobis ipsaprehendenda est, illis sapientiæ uox quædam relinquenda : qui primum cum de moribus ordiuntur dissertationem, hoc ueluti fundamentum scientiæ suæ subiiciunt, uirtutem in actione esse : neque intelligunt homines stultissimi damnari ab sese primo statim inceptu artem suam. Si enim uirtus in agendo consistit, quid attinuit tot uoluminibus editis, cum de eisdem præsertim rebus plures scribant, reuocare eam ad uerba, & pro ipsa uirtute, picturam quodammodo uirtutis amplexari? Scribis de uirtute, diuidis in partes, species singulas definis : disputas in utranque partem, remq; positam in factis & in uigore quodam animi naturali, ad conclusionulas, & syllogismos traducere uis : atq; idem dicas uirtutem non in ratiocinando cerni, sed in agendo: quipotes magis tecum ipse pugnare? Tibi itaque ergo credamus affirmanti, uirtutem abs te petendâ esse, qui non uirtutem teste ipso te, sed simulachrum quoddam in tabulis descriptum obtines uirtutis. An Vlysses cui tantopere laudi datur ab Homero,

h : quod

quòd mores hominum multorum uidit & urbes, si nationes easdem, quas peragrandò obuiuit, eadem maria, in quibus toties nauì fracta periclitatus est, ex descriptione orbis terræ in tabula depicta contemplatus fuisset, moresq; & ritus uariarum gentium aliquo narrante didicisset, ipsam illam haud iure esset laudem à summo poëta affecutus: & nobis persuadebimus, ex uerbosis uoluminibus istorum, tanquã ex pictura, uirtutis officium & laudem nos posse consequi? Atq; hæc ego perinde loquor, ut si isti tamen aut de uirtute recte sentiant, aut in eo quod sentiunt inter se sint concordēs: neutrum horum est, & utrunq; nobis breuiter perstringendum. Virtutes uolunt esse mediocritates: Quæro ergo, quæ sit ista mediocritas: huius enim stabilem & certam si asserre queunt rationem, asserant aliquando, figantq; terminos, ac locum ipsum signent, ut ubi sit, & in quo consistat uirtus, possimus ad punctum constituere: sin autem mediocritatem istam suam inconstantem & uagam, ceu nauem fluctuante salo, anchoris quidem alligatam ne illidi ad littus possit, medio autem in spatio huc illuc decursantem, uariarum moribus, temporibus, opinionibus uolunt: nec eandem ubiq; neque unam semper esse: quid nobis dat explorati atque percepti, horum uolubilis de uirtute definitio? Sic enim, si recte recordor, inquit: temperantem esse, uerbi causa, qui his oblectetur, quibus oportet, & quãdo opus est, & quemadmodum

admodum decet: atq; hanc uirtutem mediocritatē
 esse, intemperantiæ ex una parte: ea enim est, quæ se
 in omnes passim ingurgitat; uoluptates: stupidatis
 ex altera, qua sensus hominis ad omnē gustum uo-
 luptatis penitus est obtusus. Quibus autem opor-
 teat temperantem uti, & quando, & quomodo, ni-
 hil certi nobis præscribunt. At hoc est illud, quod
 maxime quærebā: quo sine (autore te) nec usus uir-
 tutis ullus, nec ratio constare potest. Item cū libe-
 ralem in medio statuūt auari, atq; prodigi; fortem,
 qui ignauo, & audaci sit interiectus; quid me docēt
 de fortitudine, de liberalitate, de cæteris partibus,
 membrisq; uirtutis? me dixi? quid aliū quenkum,
 qui quidem sit illorum scriptis & oratione ad uirtu-
 tem paratior? Nam si rogem eos, amabō hoc mihi
 expedite, utrum'ne sentitis uirtutem sine Philoso-
 phia obtineri posse, nec'ne? Quid respondebunt?
 Posse annuent; confecta res est, profligatum nego-
 cium; quo enim nobis iam erit Philosophia opus?
 Negabunt? Quid fiet tot clarissimis ducibus, opti-
 mis fortissimisq; ciuibus, quorum egregijs testata
 operibus, nominis gloriam uirtus, cum ipsa penē
 æternitate adaquauit? Horatius Cocles cum liber-
 tati ciuium suorum, quam nuper expulso Tarquis-
 nio Rege cōparauerant, uim fieri à Porsena indignē
 ferret, ingruentem exercitum Hetruscorum in pri-
 mo ponte sublicio sustinuit solus, tandiu, quoad
 pons rescissus à tergo, aditusq; hosti ad urbis mœ-

nia interclusus foret: quo factò, proiecit se in fluuium, & uulnere accepto incolumis tranauit ad suos. Quæro ergo, num ille hac definitione fortitudinis à Philosophia inductus, tam memorabile facinus effecerit: an insita magnitudine animi & constantia naturali? Paulò post eiusdem Regis Porcenæ castra ingressus est Mutius, dissimulato habitu, ut eum hostem, quem Resp. uniuersa non poterat, ipse unus ferro à ceruicibus patriæ depelleret: cuius inuictam mentem cum elusisset fortuna, scriba pro Rege obtruncato, quasi repetens ab sese erroris admisi poenas, dextram foculo iniecit, uriq; immoto corpore est passus: hic quoq; in laude, & in uirtute nō mediocre profectò aliquid, nec ex istorum disciplina, sed omnia summa spectauit. Quid Marci Curtij illa de memorabili pietate dicam? qua compulsus in terræ hiatum ingentem, præcipitem se iecit, ut oraculo obtemperans, labentem patriæ salutem morte sua sisteret. Est ea quidem accuratè à te & grauiter laudata, Sadolete, hexametris haud ita multis uersibus: quorum lectione ita delector, ut memoriæ pleraq; mandarim: nec uenio ferè ad eum locum, ubi ille cōsecrat sese, deuouetq; Dñs inferis, salutem patriæ excipiens, quin misericordia fortissimi iuuenis mihi animus deliquescat. Sic enim sacris ritè peractis, inducis ipsum ad illum terræ discessum horribilem, tanquam ad aram uictimam ultro accedentem:

Ille

Ille autem (nam fata premunt, longasq; recusant
 Ferre moras) coram uacuū progressus in æquor,
 Ut fletit abruptæ titubato in margine ripæ
 Pallidus, inq; atram deiecit lumina noctem,
 Rettulit os rursus cœlo, sublataq; tendens
 Brachia, in has supplex exoluit pectora uoces.

Cernitis cōstantem & certum, ne ea quidem me-
 tuentem, quæ supra captum humanæ fortitudinis
 esse uideantur. Audiamus quid precetur:

Dij patrij, quorum auspicijs stat maxima Roma,
 Et pater omnipotens, & nostri sanguinis autor
 Bellator Mauors, Vulcane, paterq; Quirine,
 Vestalesq; foci, Ianiq; biuerticis ora,
 Audite hæc, sanctumq; precanti aduertite numen.

Deos testes inuocat, ad quos paulo pōst ab homi-
 nibus est discessurus. At quid nam est, quo inuocet?
 Si qua (nefas) uirtutem odit crudelis Erinny,
 Ad pœnamq; uocat, fraus hinc communis abesto,
 Vnus ego haud segnis dextræ, nec frigidus armis,
 Hanc animā inferno umbrarū regi, & Stygijs Dijs
 Deuoueo, lucemq; uolens, aurasq; relinquo.

Quid ita Marce Curti? aut quid tibi hac capitis
 deuotione expetēs? num domesticum aliquem uti-
 litatis fructum? Nequaquam, inquit:

Tantum dura mei fugiant discrimina ciues,
 Hanc spē, quā patriæ incolumis dant fata, sepulcri
 Et mortis comitem posco, ac mecū ire sub umbras.

Ergo hæc te spes una consolatur morientē, quod
 patriam

patriam relinquis incolumem. Quid Dijs inferis,
quam in te esse potestati uis? Exequamur deinceps,
ut uideamus nihil esse tam asperum, quod frangere
bene à natura constitutam, & maiorum disciplina,
non dictatis Philosophiæ, corroboratam animi for-
titudinem potuerit:

Tum uos infensi inanes, queis Romula uirtus
Displicet, inuidiamq; mouent ingentia facta,
In me omnes conferte iras, & quicquid acerbum est
In caput hoc quodcunq; atrox, sæuumq; parastis,
Vertite ab excidio patriæ exitioq; meorum,
Ipse luam.

Dignus cuius louem ipsum spectantem è Capi-
tolio caperet misericordia: etsi ei tum iter illud non
ad exitium, sed ad immortalitatem erat; Sequitur
enim,

— Simul hæc dixit, simul astitit olli
Conspiciusq; auro, & Mafsyli pelle leonis
Acre fremens bellator equus, quo tendere in hostē
Primus, & obstantes incurfu rumpere turmas
Suetus erat, subitaq; acies turbare procella.
Hunc ubi terga premens, dorsoq; exceptus amico
Impulit, & notis habilem tremefecit habenis,
Nil mortale putans, animiq; interritus heros,
Visa hominis maior facies, procul ære refulget
Sanguineo galea, & flammæ rutila arma coruscant.

Prouchor longius illecebra carminis: itaq; re-
deūdum ad institutū est, Hanc præclaram imaginē
pictatis

pietatis & fortitudinis, num è Philosophorū scholis
 putatis esse depromptā? Deprōpsisse te dices, Sado-
 lete: quanq̃ ego te arbitror ex poëtica facultate po-
 tius. Verū ille quidē iuuenis fortissimus harū rerū
 tū rudis, patrij moris peritus erat, quo omnis omniū
 erat ad uirtutem & laudem contentio, Non disputo
 hoc loco quā sapienter manifestā in mortē se obie-
 cerit: impetus fuit in illo animi ad gloriā singula-
 ris, cuius fructum nullum uiuus erat percepturus;
 piē quidem & fortiter certe. Quanquam huius si-
 miles permultos quondam tulit hæc ciuitas: quos
 si Philosophorum oratio, ac non habitus naturæ
 præclarus, atque diuinus, patrijs legibus obtempe-
 rans, ad uirtutem animasset, næ haud unquam hic
 locus orbis terræ imperio domicilium præbuisset.
 Quo ergo nos adiuuat horum ea, de qua iandudū
 loquimur, mediocritas? quæ aut inutilis est, quod
 incerta: aut irridenda, quia nulla. Quid? non ne
 uosmetipsi commemorare soletis, Stoicos nobilem
 in primis, uestra etiam existimatione, uestroq̃ iudi-
 cio, Philosophorum sectam, subtilius certe credi-
 tam, uelut ad examen, perpendere singula: sustulisse
 funditus omnem istam mediocritatem? magnisq̃
 clamoribus à Philosophis reliquis dissentire? At
 qui hi cū sūrpitūs euellunt ex animis nostris omnes
 affectiones, quod ijs nulla ex parte uolunt pertur-
 bari sapientem: adimunt profectò uirtuti campum
 hunc à ueteri Academia datum, in quo metādo, ca-
 i pere

pere medium sibi ipsa locum, & ita demum profiteri se uirtutem possit. Etenim si nullus extiterit animorum motus, nulla iracundia, nulla formido, nulla molestia: si nullus flagrauerit ardor cupiditatum, intestinarumque appetitionum: sed constanter & firmiter ab omni uel tantulo motu partis in animo ratione carentis, auersa semper erit & aliena ratio, mensque sapientis: neque ea magis appulsu perturbationum huiusmodi, quam saxum fluctu commouebitur: nihil erit omnino in uirtute, quod ex mediocritate spectari debeat: sed in alia quadam facultate & ratione existet uirtus. Si uero & hos ad animum sapientis pertinere motus, ac in eis ipsis mediocritate temperandis consistere uirtutem, & Peripateticis, & ueteribus Academicis fidem habendum: alia tamen commodior, alia hosce certior flagitanda definitio est: ut si doctrinam sibi sumunt uirtutis instituendae, sumant usquequaque, nosque certis uestigijs quasi manu deducant ad cognitionem perfectam: titubantemque istam mediocritatem ratione aliqua, tanquam uinculo constringant: ut minime illis obscuris, sed clavis & constantibus notis ea comprehendere a nobis possit: neque eam rejiciant ad tempora, & ad occasiones, quarum nunquam est similis neque eadem observatio. Sin autem quae sit in unaquaque re tenenda mediocritas, suo cuiusque consilio statuendum permittunt: uerendum, credo, erit, ne qui naturae bono & ingenij sui uiribus perspicere poterit

poterit quid sit in quacq; re tenendum, & quatenus: idem non intelligat fugiēda extrema esse, difficileq; statuatur ieiunitatem, uitare & crapulam, cum (in quo inest uirtus) quod medium inter utrumque est, elcīs & potionibus uti ad corporis ualeitudinem optimè sciat. Et tamen si tanti ista est mediocritas, eaq; ab his & ritè induc̃ta, & optimè percepta: cur ab ea tantum ipsi uerborum & loquendi profluentia discesserunt? an cæterarum quidem rerum modum, loquendi fines nullos esse uoluerunt? At ego nil uideo neque sententijs sapientium, neque communibus prouerbijis, loquacitate notatum magis esse: quorum enim est, Multiloquiū inesse stultitiam: non ne horum istorum, qui sapientia uerbosius tradenda cōmittunt in decretum ipsi suum? Seçtemur Philosophos, uirtutis ab his usum & disciplinā petamus, inq; eorum libris euoluendis tempus omne conteramus: ut cū uerba pro factis, uirtutem p̃ctam pro uera fuerimus amplexi, tum in eo ipso, quod turpissimū est (quid enim est graui & sapienti uiro garrulitate fecdius?) ne in nostris quidem definitionibus insistamus: simulq; asseramus mediocritatem, simul ipsi nimij simus: ut quod & uerba sunt, & uerborum modus nullus est, utraq; re à uirtutis præstantia, & grauitate desciscamus. Atque hac definitione labefactata, quæ tanquam arx est totius horum scientiæ, corruere quidem uirtutes cæteras extructas super mediocritate illa præclara cer-

nimus. Sed de ipsa Iustitia seorsum aliquid est dicendum : non enim hanc fortitudini , similiter & temperantiæ uolunt esse mediocritatem : sed mediocritatis potius in alio effectricem : ut si quis inferenda iniuriâ in superiore loco factus sit , multa dependenda ad æquum redigatur. Hic enim uero breuiter & expedite quæro, Iustum naturæne sit, an in legibus hominum duntaxat, & in opinionibus ac disciplina : si enim à natura est, quæ fuit multorum in Philosophia principum sententia, atque opinio, quodq; idem in primis sensit Pindarus, Legem, inquit, reginam mortalium omnium, & immortalium, agere ius uiolenter præpotenti manu: ea re facere se coniecturam hanc, quod Herculem legerit, nec emptas, nec donatas Gerionis boues abegisse. Si inquam præstantioris è natura est in inferiorem dominatio, & ad eius, qui plurimum possit, arbitrium iuris tota ratio flectenda ac moderanda est: qui primum erit, quæso, iniuriæ locus? aut quæ iniuriarum dabitur actio, quæue recusatio? ui enim dominante, omnis euestigio iuris regula, iniuriarumq; sublata est: deinde sequetur illud quoque, ut legibus scriptis parere ratio nulla sit. Quid ita? quia quod è natura est, idem semper & uniusmodi est: leges uero cum uariæ, & commutabiles, tum plerumq; inter se contrariæ: dissidentes igitur à iusto: ita si iustitiam naturalem tenere uoluerimus, quæ quidem uerè his & propriè erit iustitia, ius Quiritium legitimum, ac ciuile

ciuile omne negligemus. Non ergo in hac humana societate, neq; in his urbium cœtibus, quos nos legibus sæpe latis, eisdemq; & correctis, & immutatis, & antiquatis, & denuo sæpe rogatis, regi, gubernariq; perspicimus, uersabitur istiusmodi iustitia: sed alios extrà requireret homines, alias ciuitates. Nos uerò qui iure scripto æqualitatē illam ciuilem retinemus, à uera prorsus iustitia, cuius exemplum in natura quærendum est, alieni erimus? & hoc Philosophus dicere audebit? ac euertere ciuitates, quas à se potissimū uult esse constitutas? Iure ergo Athenis capitis sæpe damnati, sæpe acti in exilium, & antiquitus aliquot senatusconsultis ab Italia summoti sunt Philosophi. Si uerò, id quod usu & uita magis comprobatum est, Iustum nihil habet omnino cum natura commercij, sed opinionibus totum & consensione plurium in unum cœtum cœuntium conficitur: expeditior fuerit quidem de iusto & iniusto ratio. Sed huc nihil Philosophiam conuenit aspirare: non enim ad hanc quærendam agendamq; iustitiam definitiones aut præcepta Philosophorum, sed suæ cuiq; ciuitatis leges & patrij ritus erunt cognoscendi. In hac sententia Aristippus fuit princeps Cyrenaicæ sectæ, nihil omnino natura esse iustum, iniustum, turpe, honestum: sed hæc expendi omnia & effici opinione. Sensit hoc idem Archelaus Socratis doctor: cui in Physicis consummato, atq; perfectō fides habenda est, tanquam nullam in natura,

quam proferre posset, iustitiæ speciem intuenti. At
 eiusdem Socratis discipulus Aristippus: ut eandem
 de iusto, iniustoq; sententiam utriusq; interiectum
 tenuisse Socratem possumus suspicari: cum quod
 alteri tradidit, ab altero tulerit acceptum. Quan-
 quàm si Philosophiæ cum legibus, quod quidem
 communis utilitatis intersit, facienda est contentio,
 quid simile? ut fortem uirum exēpli causâ cōstitua-
 mus, definire fortitudinem esse habitum animi ferē-
 tem aspera, & difficilia constanter, quatenus decet,
 & quando, aliâq; similia multa, & legis iussa atten-
 dere. Miles qui sacramentum iustum dixerit, ad si-
 gna frequens esto, imperia seruato, acie ne excedito
 iniussu imperatoris: ne ue locum ab eo assignatum
 deferito, nisi teli petendi, aut hostis feriundi causa:
 qui harum rerū migrasit, mors pœna esto. Non ne
 à lege hac uobis fortitudo, à Philosophiâ oratio for-
 titudinis uidetur tradi? Eodem modo in cæteris.
 Est enim grauitas legis, & autoritas in iubēdo, atq;
 uetando: Philosophiæ uaniloquētia in hisce rebus
 omnibus ad disceptationes & uerba reuocādis, quo
 esse nil potest à uera uirtute alienius. M. Cato ille sa-
 piens, qui etiam ex sapientia hoc cognomen inue-
 nit, antequàm in hanc esset urbē Philosophiâ per-
 lata, cum Carneadē, & Diogenem Philosophos le-
 gatos ab Atheniensibus in causâ Oropi missos ad
 senatū, rem suæ ciuitatis audisset orātes, perturba-
 tus eorum oratione, quàm primū censuit dimit-
 tendos

tendos: iuuentutem enim à studijs militiæ ad eos audiendos cōuersam esse, simulq; innotuit, uelut oraculo quodam, Tunc orbis terræ imperio ciuitatem hanc spoliatū iri, cū in ea esse honos Philosophiæ cœpisset. Neq; ille opinione falsus est: omnes enim postea huius præstigiatrix, & tanquam ueneficæ introitu in urbem, industriæ nerui, & disciplinæ soluti sunt: nec antè desijt è uirtute agere quisquam, quàm de ea loqui didicisset. Sed quoniam nos quidem præclarissimum nomen hoc uirtutis à cognitione hominum & disciplina nō remouemus, quòd eo è communi uita, tanquam sole è mundo sublato, nedum agendi splendide, sed ne loquendi quidem, uia & ratio ulla patere possit: quod antè fecimus de sapientia, ut exponeremus, quidnam ea esset, sententiam nostram, idem nunc conabimur de uirtute: nec tãquam è Philosophorum schola, quorum ego nec probauì unquam, nec penitus noui artē, ab ipsoq; primo limine tum nouis atq; absurdis sententijs eorum, tum iurgantium inter se, rixantiumq; clamoribus fui repulsus: sed tanquam homo in hac urbe diu multūq; uersatus, in qua quod omnibus assensientibus uerè dixerim, tota mihi & agendi ritè, & iudicandi ratio cū inuenta fuisse uidetur, tum tractata semper atq; perfectā. Hāc igitur urbem ipsam si uerè, si iure, si meritò laudibus effequentes, præstittisse eam cunctis nationibus, cū consilij & sapientiæ gloria, tum uirtute atq; factis existimamus: rectè omnis

et̃e omnis fuerit ab illa in nostram disputationem
& sapiēt̃iæ, & uirtutis species describenda. Vt enim
si quis fingendi artem, aut cælandi comparare esset
meditatus, melius credo & facilius à loue Phidiæ
Olympio mensionēs, conuenientiās, lineamentaq̃
deduceret, quàm ex ullius statuarij, si opus ab illo
nullū proferretur, posset oratione: Sic nobis ad in-
dagandam, uel intuendam potius uirtutem ac sa-
pientiam, non Philosophorum inanis sermo, sed si-
mulachrum nobile præstantissimæ ciuitatis debet
esse propositum. Quod igitur urbs Roma, uel ciui-
tas potius, quæ hunc murorum cinctum, quam ur-
bē dicimus, incolebat, de principio sibi orbis terræ
imperium designauit, quarumq̃ rerum, atq̃ artium
usu, atq̃ exercitatione illud poterat comparari, eas
res omneis artesq̃ adhibuit in disciplinam, legibus
consecuit, honore aluit, præmijs corroborauit: iccir-
co nos sapientissimæ ciuitatis exemplum imitati, sa-
pientiam eam descripsimus, quæ esset earum rerum
scientia comparandarū, quæ communi æstimatio-
ne hominum maximī penderentur: eas porro res
diximus opes, potentiam, imperium, gloriā: quā-
t̃q̃ in uno fortasse imperio insunt omnia. Sed quia
non semper peruenitur ad summū, in quotoquoq̃
uirtutis & sapientię gradu insistere exoptandum
est. Quoniam uerò non in una sapientia opis tantū
est, ut à semetipsa efficere omnia ea possit, cumula-
teq̃ explere, & consequi beatissimam uitam, nisi ad
eius

eius opus, munusq; quod in prospiciendo est ac præspeculando, tum finē quo intendit, tum uias atq; itinera, qua ad eum finem peruenitur, natura acris & uegeta adiungatur effectrix consultorum, quæ fuerint deliberata ratione: iccirco ad suis omnibus & partibus eam, & numeris instruendam, quemadmodum in corpore oculis manus, sic uirtus in animo sapientiae necessario comes & administra data est, uis & efficientia quædam in animo cuiusq;, qui quidem sit ad res gerendas natus, uigorq; & diligentia naturalis, hanc Græci *δυσέτηα*, nos Latine, & quidem aliquanto significantius, nauitatem possumus appellare, insitam illam industriam peragentem impigre prudentiae decreta: cuius cum ingenij, consilijq; lumine societas & cōspiratio, nimirum illa chorum illum explicat, consensumq; uirtutum, quarum Philosophi duntaxat nomina, uiri fortes rem effectusq; nouere. Nam ut sese prudentia nauitasq; coniuncte uel ad labores, periculaq; dedunt, uel ad uoluptatē, uel ad pecuniæ usum, & tractationem: ita sua in quoque genere existit, elucetq; uirtus, tum liberalitas, tum fortitudo, tum temperantia. Ac ut in eodem exemplo insistamus: non sat fuisset profectō urbi huic, nec uidere, summē omnium esse expetendum cæteris gentibus imperare, nec uerō quibus id rebus commodissimē agi & confici posset, etiam prouidere: nisi uirtutem, hoc est, nauitatem, & industriā ad agenda quæ uiderat, adhibuisset: quam quod

adhibuit, & quidem ciuitatibus cæteris multo magnificentius, iccirco cunctarum sibi gentium peperit dominatum: imperioq; constituto, atque opibus omnium suæ potestatis factis, finem naçta quo intendebat, effudit demum ipsa ex sese plurimas, & maximas in omne genus hominũ utilitates. Siquis dem ex loco & solo hoc, ex his ipsis mœnibus, non tam substructione murorum, quàm antiquæ maiestatis gloria & religionis honore munitis, omnis humanitas, omnis prudentia, leges, iura, ritus sacrorũ, cultusq; uitæ lautior, omnes denique optimæ atq; honestissimæ artes in orbem longè & latè terrarum inundauere. Hac descriptione à nobis facta, quæ iam uera uirtus sit, quò ue ea spectet, tanquam ad finem quidem, & quid sibi porro expetat, arbitror uobis esse patefactum. Nam quem isti finem uirtuti statuunt, si modo seriò id agunt, neque illudunt expectationi nostræ, est sanè causa cur dimoueamus: aiunt enim uirtutis finem, ipsam esse uirtutē. Quomodo hoc narrant? non enim satis quid dicant intelligo: ut uirtus sibi ipsa finis sit: hoc est, ut quærat ea, & appetat semetipsam. Quî fieri potest? aut cur se iam naçta, uel agat quicquam, uel molietur ob adeptionem sui: neq; potius iam contenta, & plena conquiescat: ut prorsus nulla à uirtute, si ita se habeat res, profisciscatur actio? Nam quid ab se egrediatur aliquid operæ laborisq; propter se suscipiēs? aut cur è complexu diuellatur suo, quo rursus deinceps
de red

de redeat ad sese, cum iam in seipsa posita & locata sit: Nam quos nos illi fines proposuimus, non illi quidē idem sunt, quod uirtus: sed uota, effectiōnes, præmiāq; uirtutis, ad quæ duce & comite uirtute, peruenitur. Imperiū, & potestas, & autoritas, & gloria, opesq; ministræ earum cupiditatū, quas insitas in natura hominis, ad eum modum gubernat ratio, ut sine damno, dedecore uē optata nobis suppeditantes, uitam iucundam & beatam efficiant. In hac acie & lumen mentis omne intendit prudentia, iustitia uerò, si subtiliter tota & penitus introspiciatur, nihil aliud agit profectò, quàm ut comparata sibi inter homines autoritate atq; fide, honoribus ultro, & præmijs cumuletur. Nam temperantia uoluptatibus adhibet modum: non odio quidem, aut contemptiōne uoluptatū: sed ut sanitatem in corpore, tranquillitatem conseruet in animo: quorum altero assequimur ut de uoluptate ipsa liquidius iudicemus, quod ipsum ad gustum eius & iucunditatem cōducit plurimum: altero, ut diutius illa, & suauius perfruamur. Vna est uirtus fortitudo, quæ declinare aliquantum à lege sapientiæ, & laboribus quādoq; tolerandis, periculisq; alacriter subeundis, parum cōmodi sui rationem ducere uideatur: uerūm tanta est lux eius illius gloriæ, quam sibi habet propositam, ut quemadmodum in solis lumine colores cæteri discerni non facile possunt, sic splēdor laudis perstringat sæpe non solum fortunarum, sed salutis

etiam & capitis cogitationem. Nec uerò Philosophi non in fine ipso titubauerunt : ijdem enim uirtutis finem, uirtutē; ijdem beatam uitam uirtuti, ut finem, statutam uoluerunt : quod quidem probabilius dictu est : aliud enim necesse est finem, aliud eam esse rem, cui is sit finis. Sed de beata ipsa uita quid sit, aut ea in quo consistat, quid est tandem ab his communis omnium sententia quasi ueritatis lege sancitum, in quod intuentes diriger eodē rationes omneis nostras, & consilia totius uitæ conferre debeamus? O' confusam & perturbatam disciplinæ rationem, quæ ueritatis notionem professâ, in maximis errorum tenebris uersatur : & artē bene ac beatē degendæ uitæ se traditurâ pollicens, non modò nihil certi dat, nec explorati, uerum si quid à nobis uel cōmunibus animi conceptionibus, uel uī ipsa naturæ, quæ omnibus profectō in rebus ualet una plurimū, comprehensum est, atq; perceptū, id totum cōtortis quibusdā rationibus, & fallacibus plerūq; argumentis cōuellit ultro, & labefaciat: ut neq; unde deducti simus, neq; quod, pgrediamur possimus ullā in partē cōstituere. Quid inquam est ab his in re una omniū maxima, cōstituēdis uitæ nostræ finibus, hoc est, uiuendī iure, lege, more, ordineq; tradendo, fixum, firmum, ratumq; statutum, quod sequamur, quod & actionibus nostris, & cogitationibus antepoñentes, ritē recteq; uiuendī officiū omne expleamus? At quāta in finibus disceptādis tumultuātū certamina

Philo

Philosophorum sunt: quanti ipsi tumultus: quomodo uariæ & dissentientes, & controuersæ sententiæ: Voluptatem finem posuit Aristippus, & eam quidem, quæ sit corporis: quod cum dulci aliquo, & iucundo motu in sensibus perfundatur, summum tum in eo existere hominis bonum. Idem uoluptatis nomen in fini statuenda secutus est Epicurus: sed aliqua in re ipsa tamen est dissensio. E contrario grauem, & seueram honestatem opposuit Zeno, eamque uitæ beatæ dominam esse uoluit: spreuit autem penitus & abiecit uoluptatem. Neque tantum inter hosce contrariarum partium duces acris pugna est, sed promouet uterque acies suas, Cyrenaicas ille, Zeno autem Stoicas: non ut disceptantium numero causa definiatur, sed ut clamores & iurgia augeantur. At Calipho tanquam iudex blandior, litis fugitans, & se utrisque uēditare cupiens, uoluptatem cōiunctam cum honestate statuit esse finem: uacuitatem cum eadem doloris Diodorus Peripateticus: nam Hieronymi Rodij sententia cauta mihi magis, quam fortis uideri solet: ille enim una indolentia summi boni nomine honestanda, non tam adipisci bonum, quam uitare studuit malum. Tribus autem tanquam finibus contineri beatam uitam, & ueteres Academici, & princeps Peripateticæ sectæ Aristoteles uoluere: trinaque ab illis genera bonorum inuenta, quæ animi essent, & quæ corporis, & quæ fortunæ. Cōtrā Euclides Megarensis, ipse quoque à So

crate, è quo Megarici Philosophi : summum bonū esse quod esset unum, & simile, & idem semper ; nec tamen illud quod nam esset, satis explicauit. Quid aut impatibilitatē Pyrrhonis (eam Græci ἀπάθεια) aut scientiam Herilli, aut indifferētiam Arystonis : aut mentem, aciem uē mentis, qua uerum cernere tur, quā Menedemus intulit, & ab eo qui sunt Eretriaci appellati : in ponēdis finibus commemorem? Qui quidē fines innumerabiles penē Philosophis sunt : idemq; direpti sæpe Philosophorum inter se contentiōibus, sæpe ultro citroq; statuti, rursusq; commutati, neutiquam adhuc finium regundorum stabile iudiciū, nec certam mensiōis notā tenuerunt : quoq; magis tantas istorum insanias mirere, possēssione neq; uberi, & ea admodum litigiosa : at ita fusæ sunt eorum & discrepantes, ac ferē ad libidinem, contentiōis studio, de his ipsīs finibus bonorum effutitæ sentiētiæ, ut nemo mehercule sit, neq; ita orbatu animo, neq; oculis usq; adeo captus, atq; conuiuens, qui in quancuncq; partē temere fortuitoq; se mouerit, non incurrat in aliquam earum, quas de summo bono tractant Philosophi, opinionem, atq; sentiētiā. Quæ igitur grauitas, qui ordo, quæ constantia? quid in Philosophia ista uestra tale atq; eiusmodi, ut in ea accuratius uersati, aut quietiores animo, aut consultiore iudicio atq; scientia, moribus ornatiores, sapientia instructiores simus? Et hæc ea est (si Dñs placet) quæ nos se erroribus

ribus omnibus erepturam, in uiam ueritatis indu-
cturam, ad bene beateq; uiuendum erudituram pol-
licetur. Simile uero est eximere erroribus, & his ma-
xime inuoluere: offerre dubitantibus lucem uerita-
tis, & clarissimis ultro rebus omnium tenebras du-
bitationum offundere: tradere uitæ beatæ rationē
ac regulam, & in ipsa constituenda beata uita, sum-
ma cum miseria & pertinacia, turpissimis altercatio-
nibus, & maximis contentionibus conflicari. Quæ
quoniam me bona ex parte uobis demonstrasse ar-
bitror cuiusmodi sint, & quàm inania ab his, qui se
magistros uolunt, & doctores sapientiæ esse, non
suscepta solum, uerum etiam inconstanter, leuiter,
contentiose, nequiter & disputata & tradita: deq;
parte hac, quatenus quidem pertinet ad mores, sa-
tis est dictum: quæ reliqua sunt breui iam sermone
percurramus. Restat enim pulchella & concinna,
non iam illa matrona, sed meretrix Dialectica: De
qua quid est cur iam multa dicamus? Etenim ea si
corpus suum haberet, & propriam subiectam huic
artī materiā in rebus & in natura positam, in qua
se uersaret, formamq; sibi inde alicuius certæ excu-
deret disciplinæ, esset fortasse aliquid, quod contra
eam serio dicere possemus. Nunc autem quid aga-
mus? suscipit illa iudicis, disceptatricisq; personā.
cuius munere decuriat? Nullius: neq; enim in albo
prætoris ulla mentio: & suscipit tamen, uerum im-
pudenter; neq; adeo huius indignitate impudentiæ
stomachum

stomachum ut hominibus, sed ut risum moueat: ueri se & falsi ait esse disceptatricem, & de ea re laturā iudiciū. Quos inter: num Medicos, si quid incidat (ut affolet) controuersiae de genere morbi, & num mittendus sanguis, aut aluus ducenda sit: hic uerū illa djudicabit, aut falsum. Quo pacto: aut quid ad eam attinet de medecina loqui: An inter Mathematicos: quid eius ullam in partem interest, puncta, numeros, lineas, sonos, motus, interuallaq; cognoscere: nam cum duabus cæteris, quas nos paulò antè perstrinximus, Philosophiæ partibus, si quid haberet communitalis, aut commercij, nequaquam esset illa ab his partis suæ proprijs insignibus, & ipso nomine discreta. Quid ergo est: nudata rebus omnibus, exclusaq; doctrinis, ut est nimium ambitiosa, & in numerum procedere cupiens, format sibi ipsa atq; fingit articulam quandam uerborum scilicet, & eorū nouorum, ut aliquid saltē hoc pacto esse uideatur: terminos, propositiones, syllogismosq; fabricans, & syllogismorum figuras, tum simplicium, tum (ut uocat ipsa) connexorum: quas etiam memoria uidelicet, & docilitatis causa carminibus cōpræhēdit, sane quàm lepidis. Atqui uideamus quā rem agat: Omne animal est substantia, omnis homo animal. Quid ad te dialectice, homo animal sit necne: hoc Physices est, & eius disciplinæ, quæ rerum naturalium profiteatur notionem. Nihil, inquit: sed exempli causa infero, ut argumenti uis intelligatur.

telligatur. Ergo tu serias res exempli causa affers, ut friuolas amplectare? Agam, inquit, alia ratione, Omne, b, est, a: Pulchrè: Omne, c, est, b: Probe: ergo omne, c, est, a. Admodum. O' libidinē effræ natam garriendi: tant'ne est hæc perplexa uestra cognoscere? quorum perceptio difficilior est propter nouitatem nominum nimirum, & contortionem argumentorum, quàm sit cuiuslibet alterius scientiæ integra disciplina. Similia sunt illa: Si est, a, est, b: non est, b: non est ergo, a. Ne sit sanè. Quid enim quoniam quidem à ludo literarum discessimus, nostra quasi refert? Verùm tu grauis planè iudex, ueri disceptator & falsi, quid habes dicere, cur tua ista ars aliquid ueri nos doceat, cùm sit inanis tota, nec habeat quicquam in natura rerum consistens, quo tanquam fundamento niti possit? falsi uerò uitandi, quî nos efficiat cautos, cùm si quid tamen agit, illud potissimum agat, ut captiosis & fallacibus conclusiunculis, si cui quid perceptum est, & comprehensum, id inuito, ingratiscq; extorqueatur? Vnde enim Sorites? unde mentiēs? unde illud Corneum, præclara sophismatum, & cauillantium argumentorum nomina? nam ignauam rationem (ἀργὸν λόγον uocant Græci) optimè in hos conuenire non negarim, ueluti è qua omnis eorum uita dependeat. Sed quæro, num statutū etiam nunc nauis illa, X X X. remorum in portu Athenis, qua uectum in Cretam Theseum Minotauro interempto, septem illos nos

biles pueros in patriam reduxisse incolumes fama narrabat, sit ne ea ipsa, quæ fuerat Thesei, an prorsus alia: cum quod ex ea uetustate deperierat, deinceps fuisset refectum? Quin & alia hisce consentanea: Est ne tacentem loqui: nequaquam: at cum lapidem loqueris, tacentem loqueris: acutè: quid ergo uetat lapidem esse te, etsi loquaris tamen, sed quæ lapidibus digna? Item illud: Est ne sanctè iurantem peierare: nihil minus: atqui iuratus se peieraturum, ubi peierauit, sanctè iurauit: igitur tu, qui ueri tibi arrogas iudicium, horum testium, qui ut sanctè iurent, libenter peierabunt, fidem dicto adiungendam putabis? Nam mehercule illud festiuium: Quo Coriscum uerberari uidisti, hoc Coriscus uerberabatur: Na: at uidisti oculo Coriscum uerberari. Cernitis ut plena omnia ineptiarum sint, nihilq; ab hac disciplina solidum, nihil sit firmum; neq; aliud quid tamen, quod in usum prudentiæ aliquem, aut scientiam nos inducat, sed in ea laqueos tantummodo & tendiculas confici captandis ingenijs adolescentulorum: quibus si qua antea ordine statuta sunt, mox destituantur: ut Penelopen telam suam ferunt quantum texuisset interdiu, tantundem nocturno opere retexentem. Eadem cum essent nomina rerum causa indicandarum reperta, primum ipsa rebus omnino prætermisissis, in ipsis nominibus uersandis, ac citro ultroq; torquendis operam omnem sumit. Deinde etiam alia sibi fingit, tanquam ex argilla, & luto, quæ

to, quæ non rerum nomina sint, sed nominū. Tum autem toto isto in genere usque eò illudit tortuose, atq; ambigüe, usque eò sibi in eo uehementer placeat, si quem inexpectatò, & præter concessorum sententiam captionibus includat, inopinantemq; irreat, ut casum pro casu, genus pro genere, tempus pro tempore, nomen pro nomine permutet sæpe, & apertissimè atq; impudentissimè cauilletur, puerilem q; sibi ex hac re gloriolam & laudem intempestiui acuminis quærat. Quapropter melius Zeno, quanquam & hic Philosophus, attamen ille melius, quàm aut Menedemus, aut Stilpho, ipsi quoque probati in Philosophia & clari, quorum in his soliphismatis & argumentorum fallacijs omnis industria consumpta est. Etenim Zeno cum dialectico argumento esset ab adolescente quodam lacepsitus, atque uti responderet efflagitaretur: Amabò noli, inquit, ad studia me puerilia reuocare. Stilpho autem tantum in his nugis posuit, ut capta per uim patria, cum admoneretur à propinquis, si quid de bonis suis seruatum uellet, extra urbem ut efferret, responderit, omnia se bona sua secum ferre. Quanto hic arti suæ plus autoritatis contulisset, si illaqueasset argutijs Demetrium Regem, ne quod ille instaurat, Megaras urbem opulentam militibus diripiendam permetteret. Nam Menedemi fertur illud in primis: Alterum ab altero alterum est; prodesse, alterum à bono; igitur prodesse non bonum. Dis

gnus cui Rex Macedonum Antigonus, qui in hunc Philosophum plurima contulit, nunquam quicquā prodesset: ut quod non erat bonum, eo illum ne afficeret. Sed hæc friuola, eaq; innumerabilia, quippe in quæis tota ista ars & studium est situm, prætermittenda nobis sunt: finisq; faciendus, tum quod satis iam de tribus partibus Philosophiæ disputatū est, omniumq; inutilitas & uanitas demonstrata: tum ut ne in idem ipsi uitium garrulitatis incidamus, quod in his repræhendimus. Reliquum nunc est, idq; extremum, ut uideamus quid afferant, non dico isti, qui Philosophiæ palam omnem honorem tribuunt, qui sine illa arbitrantur nullius esse momenti uiuere: nam hi quidem sua stultitia dupliciter mulctati sunt, & quod ineptissimis in rebus tempus omne suum, & studium disposuerunt, & quod ne hoc ipsum quidem intelligunt, se oleum (ut dicitur) & operam perdidisse: Sed qui cum tantum Philosophiæ non deferant, affirmant tamen non esse illiberale hæc ipsa cognoscere: scientiam enim omnem in partem bonorum esse: ita Philosophiæ studium, ut nihil magnopere profit, tamen nihil obesse: Qui mihi uidetur non ea loqui, quæ sentiunt: sed quia si plena manu collaudet Philosophiam, sibi bilum metuunt, cum cupiant dissimulare, uereri ne ipsi quoq; ad Philosophorum numerum irrisione uulgi aggregentur, si qui præsertim prouectiore iam ætate hoc faciunt: nam pueris & adolescentulis (dicam

cam enim ingenuè quod sentio) hæc quidem concessa sit potestas Philosophos tantisper sectandi: omnis enim illam ætatem decet ludus, quòd non grauitas ab ea, non consiliū postulatur: quin habet aliquid quam indolem ingenij, aliquod specimen ingenuitatis ista ipsa in pueris, ut balbutiendi, sic etiam Philosophandi grata intuētibus naturæ incohatio: uerum ubi grauiiores anni accedunt, diesq; ipsa aliam uitā affert, alios mores postulat, perseverare in his rebus, & ludicris exercitiūculis serias res posthas here, summæ non solum ignauitiæ, uerum etiam amentitiæ est. Etenim nobis posita est ante oculos uita cōmunis, quæ nos incendere habeat studio, & cupiditate earum rerum assequendarum, in quibus cunctorum studia & cupiditates flagrare cernimus: Sunt honores, qui specie ipsa pulchritudinis & dignitatis alliciūt ad sese animos nostros, & aduocāt: Sunt imperia, in quibus constituti qui sunt, cum Deorum quasi similitudinem uideantur referre, fruuntur cultu multitudinis, & magnitudine potētiæ suæ: Sunt opes atq; diuitiæ, subsidium uitæ, ornāmētum ocij, uirtutis atq; prudētiæ necessaria supellex, solatiū in laboribus, auxilium in periculis, quarum qui possuntur, ij neque ullam ipsi frustra suscipiunt cupiditatem, & cæterorum quoq; cupiditatibus liberaliter inserviando, studia sibi hominum, & uoluntates ad quodcunq; libuerit perficiendum, adiungunt: Est autoritas, atq; existimatio, quam qui in ciuitate sua

obtinēt, fide sibi apud omnes comparata, facilius
 & tutius, tanquam inobseruatis uestigijs, quò inten-
 derint, possunt peruenire : est deniq; tota illa domi
 splendida, in foro illustris, ad populum gratiosa, in
 senatu grauis ratio uitæ, atq; descriptio : quæ cum
 sibi in omnes partes congrua & consentanea fuerit,
 cumq; ea se ingenij, & fortunæ munierit appari-
 tio, ut beneuolis gratiam, inimicis metū possit asse-
 re ; neq; aut propter debilitatem animi in aduersis
 rebus succubuerit, aut propter insolentiam in secu-
 dis immoderatus fuerit elatus : sed eum semper teno-
 rem, eam cōstantiam adhibuerit, ut neq; animo un-
 quam labefiat, nec consilio : admirabilem quan-
 dam speciem profert summi & excellentis uiri, quas
 lem nos omni iandudum sapientiæ laude decora-
 tum esse uolumus. Atq; hæc tot atq; tanta, quæ qui
 hominis prima & præcipua esse negant, homines
 mihi non uidentur ipsi, cum optabilia ipsa per se, &
 suapte ui expetēda sunt, tum hoc magis inflammāt
 mentes nostras ad appetitionem sui, quòd omnium
 studijs atq; uotis uehementissimè conquiruntur : in-
 citamur enim omnes profectò similitudine & æmu-
 latione quadam ad id certatim agendum, in quo ui-
 deamus ab omnibus certari, ut in eo maxima pror-
 sus uis naturæ eluceat. Quis enim in stadio curren-
 tibus subito cæteris, non cōtinuò ipse animatur ad
 cursum, ut etiā si se tenere uelit, nerui nihilominus
 uenæq; turgescant, & tanquam signum expectan-
 tes

tes pulsu uegetiore ad profiliendum concitentur? Quis aut in lachrymis circumstantium siccos, aut in plausu & lætitia merentes tenuit oculos? cui quāuis timido & insolenti sonitus tubarum, & Martius ille clamor prælium poscentium militum, non perfudit animum alacritate quadam, ut ad eadem arma tractanda cupiditate tacita inuitaretur? Quem aut proximorum metus ad formidinem, aut fiducia ad spem nō iniecit? ac ut breui compræhendā, id quod in fidibus lyrae uidemus accidere, ut si cōtentæ duæ eisdem tonis fuerint, alterno pulsu resonent inter se: sic cū in omnibus rebus, quæ natura eadem communicant, tum autem in hominum genere, in quo præcipue, tanquam in pulcherrimo & nitidissimo speculo natura cernitur, magna uis est similitudinis, eaq; maxime naturalis: cui qui repugnare conantur, nec eodem cursu ferri, eadem cum populo opinione atq; sententiā se permittunt regi: ij Philosophiam non sapientiā, ut ueritas ipsa cōuincit, sed amentia & peruersitatis amplectuntur rationem. Quod si hæc ipsa, quæ modo numerauimus, eximia atq; ampla, lusu quandoq; & temeritate fortunæ nō ad industrios & laboriosos homines, sed ad desides inertesq; deferuntur, non tantam tamen afferunt iucunditatem, ut si sint eadem studio & labore quæsitæ: mirabile enim est quantopere his delectemur, in quibus ipsi elaborauimus: & quā omnis magis nos afficiat uoluptas, quā aliqua molestia antececessit,

tecessit, & sollicitudo : uel quia omnis boni mal'ue,
suauis ac molesti iudicatio, in comparatione quadā
est : uel quod bona nostra, quæ ingenio autore no-
bis ipsi effecimus, chariora multò nobis sunt, quàm
quæ à fortuna accepimns : nihil quidem natura ut
sit fructuoso labore iucundius : sed quem in hac tan-
quam acie populari, in tanta uarietate & copia rerū
amplissimarum , quibus quidem intermixtæ sint
difficultates non mediocres, odia, pericula, contem-
tiones , inuidiæ , aptè & nauiter uersari oporteat :
profectò cernitis cuiusmodi cum esse necesse sit,
acrem, firmum animi, consilio cautum , celeres mo-
tus habentem , non solùm mentis atq; ingenij , sed
corporis etiam atq; oculorum : ut tectus ipse & ab
omni parte munitus , quatenus quidem expediat,
inimicis pericula , amicis commoda creare possit.
Protrahamus nunc medium in forum consuetudis
nemq; communem Philosophos istos uestros , ut
quam Philosophiæ debeant gratiā ab ipsa instituti
& aliti possimus coràm cōstituere. Ac primum hos
nō tanquam ex equo Troiano claros duces, sed uti
narrāt eos esse , qui sub terram aliquādiu fodiendis
metallorum uenis detenti sunt, squalleatibus & hor-
ridos , sordida barba capilloq; , cadauerosa (ut
ille inquit) facie esse reperietis , qui primo sui aspe-
ctu moueant admirationem , ut percontentur ho-
mines inter se , illudque Plauti habeant in ore,
Vnde est ista auis ? Et hercule , quoniam quidem
auium

auum mentio facta est, non maiores ad noctuam
 mirantium auicularum, quàm ad hos barbatos
 concursus uulgi fiunt. Expectatur itaque ab his no-
 uum aliquid & inusitatum simile habitus & colo-
 ris, & eius quam gerunt frontis, ac supercilij. At illi
 tanquam modò de tenebris extracti, ne rectis qui-
 dem oculis diem & lucem intueri ualentes, perinde
 ac cunctos paulò antè habuerint participes inaniū
 curarum & commentationū suarum, effutiunt eue-
 stigio aliquid, aut de scientiarum uarietate inter in-
 doctos, aut de prudentia inter fatuos, aut de iustitia
 inter eos, quorū nunquā futurum est iuris partem
 ullam administrare: & hætenus quidem feruntur,
 quod ad uultum quidem attinet, atq; uocem: nam
 odore corporis non sunt ferendi: uerum ubi ipsis
 uicissim aliquid earum rerum tractandum est, quas
 uita postulat communis, usque eò apparent absurdi
 in omni genere atque incompositi, tantosq; risus
 concitant, ut conuerso quodam, & præpostero mo-
 do, quæ paulò antè Philosophi species contractio-
 nem animi & tristitiam denunciabat, ea nunc rur-
 sum pro ridiculo & delectamēto omnibus sit. Quæ
 propter mirari satis non queo, quid Platoni in men-
 tem uenerit, Socratem doctorem suum sic uitupe-
 rare: siquidem in Gorgia quasi gloriari uidetur So-
 crates, quòd cum tribus sua prærogatiuam ferret,
 atque ipsi sorte contigisset, ut custos esset suffragio-
 rum, punctorumq; numerum ad consilium defer-
 m ret, se

ret, se quòd aptè id facere nesciuiffet, totius populi
risum concitauiffet. Atqui riserint sanè tunc illi haud
iniurià inscitiam ineptiasq; Socratis: ego quòd ipse
de se hoc prædicet, & uelut gloriàdo commemoret,
non solùm risu, sed maxima irrisione dignum pu-
to. Quanquā quid in uno insistimus Socrate, cū
turbam legamus Philosophorum tantum sibi as-
sumpsisse licentiæ, usque adeò à pudore, à modestia,
à communi usu hominum, ab ipsa lege præscriptio-
nēq; naturæ abfuisse, ut sine ullo rubore, uelut ani-
mo abalienati, ea palàm in foro ipso, in cœtibus ho-
minum facere & perpetrare auderent, quæ nos in
conclusis, & semotifsimis cubiculis uix audeamus:
quæ ne aperte commemorem (equidem pudore im-
peditior) cum illi homines planè lauti atque mundi
ita porrectis digitis ratiocinando concluderent, ni-
hil esse re uera turpe, nec cum rubore agendū, quod
necessitatem uel etiam causam haberet naturalem;
ita quorum nos propè parietum ipforum ac noctis
conscientiam formidamus, in ijs illi & populum, &
lucem uolebant habere testem. Verùm sit hoc ge-
nus quoddam ineptum & rude Philosophorum,
qui sine mente, sine ingenio, lingua tantum uolubis-
li & concitata, nec quando, nec quatenus, tanquam
qui in tenebris uixerint, nec uerò quid, aut etiam
apud quos pensi quicquam ducentes, ludos se ma-
ximos reddunt hominibus: iidem omnium prædæ
& contumeliæ expositi: quod quidem non iam li-
beri

beri hominis, sed abiectissimū mancipij est existimā-
 dum. Sunt alij odiosiores, qui dum uolunt concin-
 ni esse, atque urbani, primum isti ipsi Philosophiæ
 (cuiusmodi eacunq; est) non uerè, neque ex animo,
 sed ostentationis causa dant operam: domi otiosi
 & desides, in compitis lectioni dediti, semper ali-
 quid librorum in manibus habentes, commurmur-
 rantes ipsi secum, & tanquam ad ea quæ legunt
 acrius animum attendant, nunc collum subrigen-
 tes, frontemq; & supercilia conduplicantes rugis,
 tanquam scopulo in legendo, sic ambiguitate aliqua
 offensi, mox continuo exhilarati, nutu significantes
 quod obstructū aliqua difficultate fuerat, ingenio
 esse patefactum; interdum constrictis & compressis
 buccis admirationem in uultu deformantes, quasi
 præclarum aliquid inuenerint tum maxime atq; di-
 uinum: sæpe cogitatione tacita in obtutum oculo-
 rum defixi, suffurantes interim oculis, si qui fortè
 prætereuntium obseruet se, & diligētius intueatur:
 iidem in circulis & corona, ubi ad disceptandum
 aliqua de re est uentum, contentione pertinaci tan-
 tis rem agentes clamoribus, ut facilè appareat, nihil
 esse tam diuersum, neque tam discrepans, quàm à
 uita Philosophorum orationem: Hi ipsi cum se ad
 familiaritates hominum, præsertimq; locupletum,
 & ad conuiuia sodalitiū dediderint, tanta in
 utroque intemperantia feruntur, ut nec poscendi
 unquam modum, nec liguriēdi finem statuunt; sæpe

etiam madidi uino & semisomnes è conuiuio aufe-
rantur : atque dum se urbanos uolunt ostendere ;
quòd nulla salis neq; facetiarum norunt condimen-
ta, aut apertè & asperè maledicunt absentibus, aut
in præsenteis turpiter & conuitiesè inuehuntur: nec
uerò lucello aliquo oblato non omnia perpeti ani-
mum inducunt, quæ scedis assentatoribus, & leui-
bus parasitis sæpe sunt proposita : ut non oblitos
uultus solùm, colaphorumq; messem perferāt ube-
rem : sed aulas quoque interdum, quemadmodum
poëta ait quidam, in caput suum commearé patian-
tur. Horum nimirum turba fores Dionysij tyran-
ni refertæ fuerunt, cum ille nescio quibus propo-
sitis pecuniolis, Philosophorū undique greges atque
examina, & in his tanquam Regem Apium Plato-
nē ad sese illexisset: ubi tum, quæso, erat uirtus, ubi
continentia, ubi illa tantopere laudata & expetita
libertas? quam prodebant ultro ipsi profectò, cum
se ex Sophocleo carmine in domum potestatemq;
tyranni, hoc est, in seruitutem dabant : nempe tota
in libellis relicta domi, in queis omnis semper Phi-
losophorum sapientiā fuit : nullam eius partem in
animo, nullam in uita gerebant: itaque per abusum
contemptumq; tyranni, adigebantur subire ea, &
perpeti, quæ ne liberis quidem mulierculis ducere-
tur tolerabilia: ut & procumbere in faciem adorans-
tium gestu, & in cōuiujs nudi, uel muliebribus sto-
lis induti saltare cogerentur : quanquam erant ex
eo num

eo numero, qui iocis & cauillis eleuare conarentur
 tantam illam impositam Philosophiæ contumeliã:
 Tertium genus est eorum qui ingenio acutiore, ani-
 mo aliquantum sublatiore à natura instructi, cum
 se de principio uel parentum culpa atq; inscitia, uel
 fortuito casu aliquo ad Philosophiam contulerint,
 multumq; in ea tēporis, optimamq; partem ætatis
 consumpserint, nec sapientia sibi ex ea comparata,
 quod uerbis & syllogismis sapientia non traditur:
 nec usu, more, studijsq; hominum satis perspectis,
 propterea quod in illo inani studio occupati, serijs
 rebus operam dare nequiuerunt: ubi tanquam è
 somno expergesciti referre instituunt sese ad ciuiles
 occupationes, cōsuetudinesq; communes, profun-
 dunt ex se subito agmen ueluti omnium cupiditas
 tum, furentesq; ambitione importuna, ac summum
 in locum quoquomodo ascendere instituentes, non
 callide neq; dissimulanter (non enim astutè apteq;
 consilia exequendi, aut artem ullam nouerunt, aut
 modum) sed uastè, atq; perfractè perrumpunt, os
 omnia cædibus, incendijs, rapinis: nihilq; sibi faciunt
 reliqui, dum ad eum perueniant, quem cupiditatū
 duntaxat exatiandarum causa appetierint principa-
 tum: ut quidem nulla usquam maior, quàm ab hoc
 genere hominum pernicies atq; calamitas liberis ci-
 uitatibus & Rebus pub. inuecta noscatur. Declarant
 hoc ueteres Græcorum historiæ, quæ ex eorum nu-
 mero multos, quos sapientiū nomine insignes fuisse

diximus, ciuitatibus suis cladem & seruitutē prædis
cant intulisse: Quorum in primis unus ē septem Pe-
riander Cypseli nobilissimam ferē totius Græciæ
altam urbem Corinthum tam sæua tyrānide tenuit
oppressam, ut posteaq; cædes ciuiū maximas fecis-
set, matronas palam die festo atq; solenni omni mū-
do muliebri perornatas dispoliaffet, sacra profa-
naq; omnia ad suum commodum libidinemq; con-
uertisset, miserit ad extremum nauim onustam pue-
rorum nobilium, qui execandi donabantur, nescio
ad quem barbarum Regem: quæ postrema nimirū
ciuitati illi calamitas incidisset, nisi eos ipsos pueros
in nauigando Iunonis Samiæ numen, & religionis
illius cerimonias liberaffet. Quid illas deplorem, o-
mnium artium ingenuarum inuentrices Athenas:
quæ cum ē satis amplo potentia & dignitatis gra-
du in humilem locum essent deiectæ, cum multas
domi seditiones, multos exterorum hostium incur-
sus, plurimas inimicissimorum Regum & finitimo-
rum Philosophorum iniurias pertulissent, nunquā
tamen adeo grauer affectæ, neq; tantis sunt exitijs
& calamitatibus afflictæ, & perditæ, quàm cum ab
Aristone Philosopho in acerbissimam seruitutem
fuerunt redactæ: qui homo sceleratus & impius, o-
mnique bellua longè immanior, cum stupris, & ui ne-
faria omneis ferē familias nobiles dehonestauisset:
ciues qui uirtute atq; ingenio præstare uidebantur,
exilio partim, partim cædibus sustulisset, omnium
bona

An. An. 864

bona atq; fortunas prædam suam duxisset, permis-
sisset seruis Thracibus & barbaris possidendam ur-
bem, ad extremum obsessus ab exercitu Romano,
L. Sylla Duce, maluit ciuitatem omnium clarissimā
interire secum direptione atq; incendio, quā unus
ipse cedēdo liberam incolumemq; relinquere. Hæc
sunt præclara, atq; eximia Philosophiæ istius ue-
stræ documenta: sic ab ea uirtus hominibus & sapiē-
tia traditur: tales ab ipsius cura atq; lacte prodeunt
alumni, qui nec rectam ipsi uiuendi rationem ullam
tenent, nec si ad potestates & ad imperia efferantur,
cæteros sinunt tenere. In hac deniq; ars est, & ratio,
& consilium, & autoritas bene, beateq; uiuendi: è
qua qui progrediuntur, & se dant in conspectum,
aut tarditate ignauiaq; perridiculi sunt, aut scelere
atq; malitia nobilitantur. Quanquā quid ego de
uiuendi ratione Philosophiam insector: cum ipsa se
mortis commērationem esse dicat: utinam quidem
esset, sicut in Cleombroto Ambraciota fuit, quem
ferūt lectō Platonis libro de immortalitate animi,
uale soli dicentem (ut in Græco epigrammate est) in
mare sese ex altis rupibus præcipitauisse: eandem
uiam tenerent cæteri, ne ue commēratione tam diu-
turna indigerent, discederent aliquando è medio
nugaces isti, suaq; nos obtundere loquacitate desis-
nerent. Sed fortè expectant illud eis dum obijciam,
in quo maximè gloriari sunt soliti, infestam in pri-
mis & inimicam religioni esse istorum artē. Quod
medius sit

mediusfidius non faciam; necq̃ ullam in hos ex aris
atq̃ templis, sed suis ipsorum, & proprijs ex crimina-
nibus inuidiam colligam; simul locum haud præbe-
bo ostentandi ingenij, inq̃ eo gloriandi, quasi lon-
gè & multò plus uideant ipsi, quàm nos faciamus,
qui maiorum institutis & legibus facile acquiesci-
mus: iccircoq̃ ob eam rem imperiti ab his, & idio-
tæ appellitamur. Sed per Deos immortales, erit ne
aliquis ad spes magnas institutus, qui in hac uanissi-
ma, inertissimaq̃ scientia ætatem rectè conteri pu-
tet: qui ueras artes, studia grauiâ, occupationes illu-
stres, quibus ad cōmoda uitæ & ad dignitates adi-
tus sit, postferendas esse ducat fictis & commēitijs
iām non illis rerū, sed uolitantium quarundam opi-
nionum simulachris: fora relinquat, ut domi sit des-
ses: consuetudinibus uiuentiū careat, ut cū mortuis
fabuletur: ea quæ sunt, & quæ extant in promptu,
ingenio industriæq̃ parata, cōtemnat omnia, dum
quæ uel nusquam sunt, uel si sint, utilitatem tamen
aliquam hominibus afferre non possunt, inani stu-
dio confectetur: Quæ ego omnia tibi in primis, Sa-
dolete, providenda esse censeo: illudq̃ maxime ui-
dendum, ne in tua ista Philosophia, quam ceu so-
rorem osculari unanimum uideris, longius progre-
diare, quàm ut pedem postea referre facile queas.
Non ornat ea homines, sed cōtaminat; nec instituit
ad uirtutes bonum ingenium, sed corrūpit. Quòd
si tu necq̃ amicorum monitis, necq̃ eis, quas supra
aduersus

aduersus eam attulimus, rationibus facile cedis: etiam ne spem tuorum, quæ in te uno posita, & opinionem principum uirorum, quæ de teipso suscepta est, falli omnino sines? Habes optimum & clarissimum uirum patrem tuum Ioannem, qui cum ingenij memoriaque gloria, tum iuris ciuilis singulari quadam scientia cum præstet omnibus, haud profecto tantum in te erudiendo studij & laboris impendisset, neque te à se diuelli fuisset passus, nisi huius urbis, & curiæ commercio, honores domum te, & fortunæ præmia referre uoluisset. Habes patronum, ad quem te applis cuiisti, summa grauitate, summa sapientia, genere, honore, existimatione, copijs, sacri senatus principem Oliuerium Carrapham Pontificem Neapolitanum, qui admirabili qua est præditus prudentia, docere te possit, quæ sit uia ad nomen & ad decus in ciuitate obtinendum maximè accommodata: ut tibi exemplum legendæ uitæ idoneum quærenti, grauior non sit autor requirendus: quæ si ualere cuncta apud animum tuum sines, neque sanis eorum, qui te diligunt, & fidelibus consilijs obstrues aureis tuas, & auguror mecum certus, & tibi spondere non dubito, magnam in te ornamentum domui & familiæ tuæ, magnum amicis commodum, ciuibus tuis præsidium paratum fore.

HIC ILLE finem cum fecisset, nosque aliquandiu admiratione defixi silentium teneremus: G A L L V S, Quid est, inquit, Sadolete, ecquid tibi Phædrus uidetur, non subita neque improuisa, sed & accu-

rata & præmeditata oratione ad euertere Philo-
 sophiam accessisse? Quantum in illo copiae, quantū
 neruorū fuit? Equidem intelligo magnum tibi onus
 respondendi esse impositum, neq; adeo, quod tam
 difficile sit pro Philosophia, quam contra Phædrū
 dicere: sed tollendum id tamen, ne & nostra summa,
 quæ nunc pendet cum maxime, per te destituatur
 expectatio, & tu eam, cui te totū dicasti, quamq; ego
 etiam te autore complexus sum, hoc maxime neces-
 sario tēpore prodas Philosophiā ac deseras. T V M
 E G O, Id, inquam, Galle, tacitus mecum nunc me-
 ditabar: nam si aliās unquam in dicēdo fuit aliquid
 Phædrus, hodie mihi uisus est se ipso longē fuisse su-
 perior: nec uerborū solum ubertate, & sententiāq;
 quibus omnis eius referta & locuples redundauit
 oratio: sed quod earum Philosophiæ partiū, in quas
 inuectus est, omniū mihi uisus est esse peritissimus.
 Itaq; aut desistamus aliquid contrā, aut longius no-
 bis spatium ad cogitandum sumamus. M I N I M E,
 inquit Citrarius, neq; ego à te patiar deteriore in lo-
 cum, quàm nunc sit, Philosophiā tuam deduci: quæ
 si tua hac subita dictione defensa, & aduersus torrē-
 tem orationis, qui modo ab ore Phædri profluxit,
 stabilis & firma retenta fuerit, erit causa, cur de illius
 grauitate & præstantia amplè existimemus: sin ali-
 quid offenderit, ascribetur tempori & inapparatio-
 ni culpa, non Philosophiæ. Quamobrem aggredere
 quæso, & da te in certamē, in quo tibi, ut ego qui-
 dem

dem sentio, nec turpe est uinci, & perhonestum uincere. C O N A N D V M nobis est, inquam, quando quidem uos ita uultis. V O L V M V S, inquit Gal-
lus, neq; est aliud quicq;, quod uelimus potius. Sed quoniam æstus increbescit, nec satis iam nobis aduersus solis uim in harum arborum umbra præsidij est, ad uillam censeo reuertendum: ibi inferiorem ad partem spatium est, locusq; opacior, & exedra, huic diei tempori, & nostro ualde opportuna sermoni. H O C sic omnibus cum placuisset, paucis sanè passibus ad uillam nos recepimus.

I A C O B I S A D O.

L E T I A D M A R I V M M A F.

feum Volaterranum de laudibus

Philosophiæ, liber

secundus.



N O N me præterit, Mari Volaterrane, fore non paucos, qui, cum ego tantum laboris, tantumq; operæ in optimis artibus & studijs ponendum putem: plusq; statuiam multo in his, quam in ambitione honorum, & in conquirendis opibus esse elaborandum: grauius hoc meum consilium institutumq; reprehendant: ad eamq; me curamatque cogitationē potius opinione sua uocent,

ut cū in foro atque curia uersari cum aliqua autoritate cœperim, iamq; à summo principe consilijs fuerim interioribus adhibitus; eam uitæ sectam studiosius persequar, per quam ad spem honoris, ac fortunarum munitur uia, aditusq; facilis ad amplissimam dignitatem comparatur. Quæ quidem horum repræhensio uehementius me moueret, si non aut ab leuissimo autore proficisceretur populo: aut si uiderem, id quod minime intueor, eos qui ita egerunt, ac popularibus hisce opinionibus obsecuti, per summos labores, maximasq; contentiones ad concupitos sibi honores tandem euecti sunt, cum eodem populo in gratia & in existimatione bona esse. Nunc autem cū intelligam id quod omnibus est apertum, quid de istis sentiant homines, qui dum splendorē honoris duntaxat sibi ante oculos proponunt, ad eumq; unum studio omni inflammati feruntur, illud nequaquam attendunt, quod erat hominibus ueri honoris cupidis maximè animaduertendum, quanta indignitas sit, quanta abiectio animi, ac leuitas in affectando, & ambiendo: non est causa, opinor, cur magnopere conturber uulgi sermonibus, aut cur de ea animi constantia firmitateq; decedam, per quam neq; pecuniæ augendæ, neque honoribus consecrandis uolo esse addictus. Non dico hoc loco quod mihi & cæteris, qui accuratè uoluerunt attendere, perceptum planè, obseruatumq; est: eos esse plerumq; horum ambitiosorum exitus, ut nemi

ut neminem uel paulò temperatiorem, mediocris status sui, minus que inuidiosæ fortunæ poeniteat. Quanquàm fortibus quidem, & bonis, & sapientibus uiris, qui in quocq; honoris gradu collocati sunt, & positi, nullam maculam uult afferre oratio mea: sed tamen illud euenire ferme cernimus, ut nullo eorum sit quàm istorum, qui domesticæ inanes & uacui dignitatis, externam aliam quandam & aduentitiam dignitatem tantopere expetunt, cum angoribus animorum, tum uolubilitate, incōstantiaq; opinionum ac uolūtatum, uita perturbatur. Mihi uerò aliò rationes meas dirigenti, semper id uerissimum esse uisum est, quod est à sapientissimis proditum: re scilicet familiari antea commodè constituta, eisq; paratis fortunæ subsidij, quæ & ad subueniendum necessitatibus uitæ idonea sint, & ab inuidia omni infamiaq; remota, maiorem quandam nobis tum demum & longè diuiniorē sequendam esse uitæ rationem, per quam adniteremur, non ut honorum insignibus è turba emineremus, sed ut ad Deum proximè adiungere nos possemus: quod tamen nobis natura est ita insitum, ut qui in aliam partem ac rationem sua studia contulerunt, optimum hi sibi hominis statum inuidisse uideantur. Etenim quis est (modò idem sit qui ingenio uegetiore à natura præditus, animum quoq; habeat ab his terrenis fordibus liberum) cui cum cœlum in conspectu sit, & hæc cœlestia, quæ tanta mente ordineq; gerun-

tur, ut eorum solennem, æquabilemque in summa uarietate constantiam, nulla hominis ratio arte imitari queat: non præclara ipse cupiditate accedatur ad cognoscendum, & considerandum: cumque rursus aciem animi in hæc humana deflexerit, tumultumque aspexerit uagæ huius, ac fluctuantis, & cum tempestatibus omnium perturbationum ceu conflictantis uitæ, non alium sibi potius uivendi ordinem, alia consilia rerum gerendarum esse ineunda putet: quod quidem iam est proprium sapientiæ munus, cuius adipiscendæ Philosophia sola magistra est, aut nullo alio pacto ad eam potest perueniri. Quanquã de his quidem quæ ad Philosophiæ officium pertineant, deque eius artis diuinæ ac præcellentis utilitate, atque præstantia, satis à me explicatum esse arbitror in hoc secundo libro, in quo illa à me defensa est, cum esset oppugnata, & repræhensa à T. Phædro. Quem quidem ego hominem, Mari, ualde dilexi semper, idoneumque existimaui, cui hanc potissimum personam imponerem, atque eas tribuerem in sermonibus nostris partes, ut esset ille disciplinæ nobilissimæ accusator. Erat enim (ut tute nosti ac optime omnium quidem: quippe qui illi & municipio, & propinquitate, nonnunquam etiam contubernio solebas esse coniunctus) ad obrectandum discretis, & lacerandum aliquantum inclinior: nec tam maleuolentia ille quidem, mihi ut uidebatur, quam ardore quodam animi, & celeritate ingenij: quibus
rebus

rebus fiebat, ut nullum paulò facilius, idemq; asperius & mordacius dictum facile posset continere: cæteris quidem partibus officij, suauitatis, diligentia, cum optimo quodq; erat comparandus. Quapropter nos, quando ipse agnosci ex suis scriptis haud ita iam potest: quæ etsi multa, egregiaq; confecit, orationibus maximè pangendis, quas antea pronunciaffet: illa tamen nescio quo pacto effusa post mortem eius, distractaq; euanuerunt: iucundū etiam nunc nobis amici nomen, ab obliuione hominum uindicare sumus conati. Quod idē, si uita superpetet, de eis omnibus studiose faciemus, quorū nobis in amicitia ipsorū, ac familiaritate & uirtus animi cognita, & spectata erga nos uoluntas fuit. Genus quidem orationis, Phædrīq; cōsuetudinem discendi, quantum assequi potuimus, in his libris expressimus: Quos ad te, Mari, potissimum ut mitteremus, cū ingenium tuum, ac uirtus, excellensq; scientia artium optimarum, tum suauissimi mores tui, dulcisq; illa coniunctio & studiorum, & animorum, quæ summa inter nos beneuolentia nos astrictos reddit, suasilit mihi uehementer atq; hortata est: amo enim te in germanum modum, tuoque in nomine libentissimè acquiesco: tecq; in primis habere cupio meorum studiorum & cognitorem, & participem. Quare attende, quæso, num tibi in his libris Philosophiæ uis ac potestas satis diligenter à nobis uideatur esse exposita. Vt enim ad porticū sub uilla
peruenimus,

peruenimus, atq; in Xysto, loco sanè amceno id tēporis & salubri, aduersi confedimus omnes, cæteris in me unum intuentibus, sic ego exorsus sum:

QV A E fuerit Phædri nostri in accusanda Philosophia dicendi uis, qui orationis cursus, quæ copia, nil me referre nec cōmemorare attinet; ipsi uos paulò antè iudiciū fecistis: quippe qui eius orationem non uoce laudeq; uerborum, quod ipsum admodum iam uulgare & usitatum, sæpe etiam temporis causa suscipitur & simulatur: sed admiratio ne potius tacita fuistis profecti. Nam, ut laus illorum sit quæ quamuis rectè atq; concinnè, ex communi tamen, & penè quotidiano more fiunt: sic admiratio eorum, quæ hominum usu, ac facultatibus uidentur superiora. Sed quò huius uel oratio plenior, uel ingenij uis acrior, & uehemētior uobis uisæ est, hoc mihi grauius onus respondendi est impositum. Ad eas enim partes repentè defendēdas accedere me sentio, quas hic ut oppugnare atq; euertere facilius posset, assidua iandudum commentatione se instruxit: in quo neq; ingenium illius apparatus ni defuit, nec tempus ingenio: cū ego utroq; horū nunc quidem deficiam. Nam & tardior sum ad excogitādum, quæ sint accommodata causæ, & propter subitam, improuisamq; dictionem imparatior. Accedit illud præterea incommodum, quòd ei succedo statim orationi, quæ nō præteruolauit aureis uestras, sed in uestris animis & mentibus penitus infedit.

dit. Vt enim Corybantas ferunt numine illo percussos, etiam posteaquam tibiæ canere desierint, gerere usque tamen illarum in auribus concentum, & ad earum modos incitari: Sic non dubito, quin quāvis tacente iam Phædro, tamen eius ipsius in intimis mentibus uestris & uigeat adhuc, & loquatur oratio. Hanc uim dicendi fuisse in Pericle, qui princeps Græciæ habitus est, æquales temporum illorū poëta deprædicant: ut cum concionaretur, non solum tonare, fulgere, cedere fulmina: sed post dictionem etiam aculeos relinquere in animis auditorum putaretur. Quid ergo est? prodam'ne causam, & deseram? Minimè isthuc quidem: non enim uiri foret boni, & eius qui se iam diu Philosophiæ addixerit, idq; certo iudicio atque explorato fecerit: subito ab illa discedere, atque eam summo illius tempore destituere. Sed sequar officium, opinor, uestræq; unā auctoritati, qui hoc me deposcitis, obtemperabo: cum præsertim sperem atque confidam, uos onus hoc mihi quod imponitis, eosdem etiam esse subleuatueros. Nam si in aliqua populi concione, aut corona cuiusquemodi, dicendū mihi cōtra Phædrum esset, nā ego uerbo hiscere non auderem: non quod diffiderem causæ: quid enim uerius, quàm & laudare & defendere Philosophiam, cuius usus atque tractatio Deorum uitæ est similima? sed quia concitatos iudices extimescerem. Nunc uobis duobus doctissimis, prudentissimisq; iudicibus, in pace &

o silentio

silentio suum obtinebit locum ueritas. Itaque Phædro nostro eloquentiæ palmam dabimus, ut suum ueritati honorem non negemus: Est enim ueritatis tum noscendæ, tum agendæ etiam atque nauandæ studium profectò sapientia. Vtemur enim hoc in Philosophia uerbo, tametsi in eo Phædrus faciet nos admodum, & crebrò eluserit. Sed qui duas hæce res arcta naturæ cognatione inter se coniunctas, eloquentiâ dico & sapientiam, quando utraq; res perfectio quædam, & altera mentis uirtus est, altera orationis, diuellere primus & separare est ausus, siue Leontinus ille fuit Gorgias, siue alius quis: maximâ is profectò sementem malorum omnium in humano genere iecit. primus enim docuit, id quod omnium rerum est deterrimum, mentiri uirtutem: aut si omnino uirtus mentiri non potest, nec falsam eiusmodi personam sustinere, instrumentum certè primarium uirtutis, ipsam interpretem animi & mentis orationem, falsos suscipere uultus coëgit: ut cum à uera sapientia non esset profecta, a simulatione tamen, imaginèq; sapientiæ, quàm plurimos in fraudem & in errorem induceret. Ex quo linguæ, cordisq; dissidio, ingens hæc, quam cernimus, in omni uita secuta est perturbatio. Fraudes enim & malitiæ, omnesq; fallendi & ementiendi artes hinc exortæ, hinc se in hominum studia, moresq; profuderunt: omnis inquam hinc falsitas, omnis circumscriptio, & insidiæ omnes, ab hoc primo erroris fonte

fonte manauere. Nam cum ex duobus inter se quasi de regno decertantibus, alterutrum in nobis dominum constituere nos oporteat: siue rationem uelimus tanquam aliquem Deum, siue cupiditatem ueluti belluam quandam: non tantum in eo mali est (quanquam nec mediocre illud est malum) uerum tamen non usq; eò id pollet ad pestem, perniciemq; communem, oppressam plerumq; & perditam meliorem iacere partem, insolentem autem cupiditatē in animo dominari: quàm illud est & horribile, & exitiosum, linguam saepe instructam cupiditatum fallacijs, perferre foras mandata legationesq;, perinde ut à sancto & legitimo intus rege, ac nō ab improbissimo tyranno, ipsa uidelicet cupiditate, missa sit: quæ æquitatis & ueritatis fucatis coloribus, calidas suas machinationes depingat: quo labefactis bonorum consilijs, eorumq; fracta & imminuta autoritate, aditum sibi ipsa ad omnium fortunas patefacere possit. In quo mirari satis non queo, non intelligere eiusmodi homines, cum tantum uirtutis simulatione proficere se putent, quanto se plus arbitrantur uera uirtute esse profecturos. Sed ut ad naturam redeamus: nil potest esse tam copulatum inter se omni necessitudine, uinculoq; naturæ, neq; tam consentiens, quàm aut cum affectionibus animi uultus, aut cum uoluntatibus sermo: ut enim lætitijs mœroresq; intestinos frons atq; oculi, sic uoluntates & consilia lingua continuo refert: quæ si

officio fungi ritè atque legitimè, suumq; planè illud munus tueri uelit, non solùm uerè & incorruptè consilia mentis, atque decreta reddat necesse est, sed qualia etiam illa intus sunt, talia ea foris proferat, atque exponat: quod in utro defecerit, dedecus ibi statim existit, & claudicatio: hoc est, non integrum illa, sed mancum sui officij munus assequitur. Itaque & ampla magnificè differere illa debet, & copiosa largè, & alta sublimiter, tenuia subtiliter, misera dolenter: deniq; ut quo habitu intus ornatus animus, & quibus copijs instructus fuerit, talem eum extrà efferat, & repræsentet oratio. Hanc speciem eximiam perfectæ, absolutæq; sapientiæ, quæ in potissimis uitæ nostræ ducibus, mente, orationeq; uidelicet, & in eorum inter se concordia conspiratio: necq; consistit, si quis facilem esse & in promptu omnibus putet, nempe ille fallatur: Omne enim præclarum rarum: & quæ communia cunctis esse possunt, nunquam in magno honore sunt habita. Sed est tamen in ea consecranda, & adipiscenda ordo quidam, ac modus: ut si ad summum perueniri non possit, in eo quod quisque adeptus fuerit, cum quadam prudentia, moderationeq; uersetur: neque se amplius ostendet, quàm quoad idoneus est præstare. Hoc enim qui sic egerit, ut totam sapientiam non possideat, non minimam is tamen illius partem fuerit cōsecutus: intelliget enim quid sit illud, quod in quaq; re est decere: quod unum est præcipuè sapientiæ

sapientiae omni propositum: nosse enim, & tenere”
 quid in quaque re deceat, maxime proprium putatur”
 esse sapientis. Qui ergo ad summam sapientiam”
 omni studio contendens, aliquo in inferiore gradu
 restiterit, & mediocritatem in ea fuerit assecutus: uel
 cum in alterutra illius parte se exercuerit, alterius
 factus sit expers: ut si quis in cogitando quidem eru-
 ditus ac prudens, idem in eloquendo infans atque
 imperitus sit: aut contra, cum abundet orationis
 copia, magnarum tamen rerum cognitionem non
 teneat: is si finibus se suis continuerit, nec in ea par-
 te studuerit se iactare, cuius sit imperitior: sapientis
 ille laude & existimatione non carebit. Non enim
 exiguas in sapientiae laude possidet partes illa uir-
 tus, quae a temperatione, & modo, praclaro quis-
 dem uocabulo, est appellata modestia. Ac ut in aedi-
 bus atque templis, etiam si magnificentia absit, saepe
 tamen opere in paruo decor nihilominus elegan-
 tiaque artis apparet: Sic angustioribus interdum ho-
 minum ingenijs, exquisisque facultatibus, sapientiae
 aliquis radius potest illucescere. Si qui non maxi-
 mis fuerit ingenij opibus praeditus, is cohibuerit se
 metipso, nec ultra id quod potuerit, progredi erit
 conatus. Verum ut horum numerus existat ali-
 quis, qui mediocriter effecti sunt sapientes: ad illam
 quidem summam & absolutam laudem accedere
 sapientiae, paucis adhuc est datum: quorum nimi-
 rum nomen colimus tamque consecratum immortas

litati. Ac ut omittamus de eis loqui, quos non ex
ipforum scriptis, sed aliorum testimonio cognitos,
& Græcæ, & Latinæ nobis indicant literæ: ut de
parente totius Philosophiæ Socrate, de Anaxago-
ra, de Empedocle, Democrito, Pythagora, Varro-
ne, Nigidio, alijsq; compluribus: isti ipsi quos no-
uimus, quos mirantes legimus, quos in manibus
semper habemus, Platonem dico, Aristotelem,
Theophrastum, Ciceronem, & reliquos, qui ad ho-
rum principum emulationem studia sua contule-
runt: quales tandem nobis hi, & cuiusmodi uiden-
tur: non ne eximij, non ne admirabiles, non ne un-
dique atque in omni parte summi, atque perfecti?
An aliquid est in illis præterea quod requiramus?
quorum ut tabulæ egregiè pictæ luce atque die, sic
istorum incredibilis rerum prudentia, orationis lu-
mine longè fit illustrior: qui ita implent sensus, ani-
mosq; legentium docendo, & disputando, ut neq;
ad intelligentiam rerum quicq; mens nostra, neque
ad iucunditatem animi amplius auris requirat. Sed,
ut coeperam dicere, qui ad hoc fastigium ascendere
nequiverunt, si ijdem, in suo genere quisque, mode-
sti prudentesq; extitere, non caruerunt parte meri-
tæ laudis. Qui uerò cum totam sapientiam perse-
qui neglexissent, & ad captandas magis opiniones
uulgi, quàm ad ueritatem doctrinæ se exercuissent,
maiores tamen quàm erant, uideri studuerunt: hos
uideo ferme in duo genera esse distractos, Alij enim
rerum

rerum omiffa & pofthabita cognitione, in uerbis tantum ipsis, & in quodam loquendi artificio elaborauerunt: Alij præ studio percipiendæ doctrinæ, excolēda oratione minus funt exercitati. Quorum utrorumque non mediocris error, & ad inſpicuendam ſapientiæ uim, obtuſa atque hebes mens eorum extitit: quanquàm priores quidem illi maſlitæ, inſcitæ poſteriores magis funt arguendi: hi enim non tam aſtuti mediuſfidius, neque tam uafri, qui diuinarum rerum atque humanarum notitiam profeſſi, à cultu & elegantia ſermonis longiſſimè abſunt, quàm incomptè & ridiculè in liberaliores coctus ſeſe dent, ipſi uidetis: in eo quidem admodum nobis odioſi, quòd libris quotidie edendis, & conſcribendis, ſemetipſos nobis, & opínionibus noſtris intrudere conantur, uimq; quodammodo ſenſibus ſtudent afferre, quò de illorum bene ingenijs exiſtimemus: in quo imprudentia labuntur: non enim unquam mihi, neque cuiquam præterea (ut ego quidem arbitror) ingenuè inſtituto perſuadere poterunt, ut cùm barbara & lutulenta utantur lingua, genusq; ſcribendi adhibeant inconditum, & illiberale, iudicari debeant Græca aut Latina eruditione eſſe præditi: cùm neque id, quod ſapientiæ proprium eſſe diximus, uidere in re quaque quid deceat, in ipſo primo aditu ſui conatus intelligant. Nam quæ horum iſta eſſe ſapientia poteſt, quæ prima egreſſione è penetralibus ſuis, ut primum in
con

conspectum hominum proditura est, turpiter sese in oratione ipsa dare, progrediq; indecore ne anis maduertit quidem? Atque hi tamen, cuiuscemodi ipsi sunt, minus multo sunt nocentes, atque malefici, quam illi, qui ex ornatu solo, copiasq; uerborum, doctores se sapientiae populis sunt professi: maiore enim ij perfidiae instrumento ad euertendas hominum fortunas parati accessere. Rursusq; hi dupliciter: aut enim cum se ad Rempublicam gerendam contulissent, propter ubertatem, elegantiamq; sermonis, fide sibi prudentiae atque uirtutis in populo falso comparata, ciuitatibus suis pleriq; exitio fuisse. Quo in primis malo, & rhetorum orba ueris sapientiae dotibus eloquentia, non illae modo tot praestantium ingeniorum educatrices Athenae, sed cuncta olim Graecia plane concidit. Aut qui non tantum habuerunt roboris, ut se regendis & moderandis hominum coetibus iudicarent idoneos, ij fordidiorem etiam fallendi & decipiendi artem secuti sunt: ut cum per omnem uagarentur Graeciam, adulescentes ad se uanis pollicitationibus allicerent, quod his se notitiam gubernandarum ciuitatum, & illam praecipue artem dicerent tradituros, per quam scirent illi & tenerent, quemadmodum causa inferior (sic enim loquebantur) dicendo fieri superior posset: hoc est, quemadmodum falsitas ueritatem, aequitatem autem atque iustitiam iniuria ipsa superaret. Sophistae hi nominabantur: quorum quon

Sophistae

quondā multitudine & cœtibus uetus Græcia abundauit, nomenq; eorum aliquandiu in magno honore est habitum. Sed cū iisdem illi ciuiliū rerum peritiā, uirtutisq; & uitij profiterentur notionem: ipsi uerò moribus atq; uita à contemptissimo quodque nil differrent, spreti postremò ab omnibus, atq; illusi, dederunt locum Philosophiā uituperare uolentibus, ut id maximè secundo populo facere possent: in quos extrema in oratione, me quidem perlubente, inuectus est Phædrus: qui si has huiusce modi Philosophiās falsa appellatione in nomen sapientiæ temere inuadentes, sumpsit sibi uituperandas, adscribat licet ad iudiciū suum opinionē etiā meam: sin autem id molitur, & agit, ut omnino abiicienda sit, & repudianda Philosophia, non est nobis committendum, ut desertam illam & indefensam relinquamus. NANQVE hercule, inquit ille, hoc etiam restat, ut plureis iam pro una Philosophiās habeamus. NON ITA res sese habet, inquam: nec tu istam multitudinem artibus ipsis attribueris, sed facultatibus potius eorum, qui dissimiliter illas tractant, atque suscipiunt: omnis enim ars una in sese, simplexq; semper & eiusdem modi, non eodem tamen modo adhibetur ab omnibus: quod ne longè abeas, in tua ipsius arte potes, Phædre, perspicere: cū enim te oratorem nobis præbeas grauem, atque magnum, quod idem facere nituntur in hac ciuitate

permulti, quid causæ est, quòd te dicente concurrimus omnes undiq; attendimus, admiramur, tuæq; eloquentiæ fulmina quasi extimescimus: quod sentimus idem usu uenire nobis in Camillo Porcio: est enim ille ex tua & disciplina, & amicitia tibi in hac laude geminus, ac propè par. Laurentium autem Colaianum, & hunc stultissimum omnium hominum Pionem, qui obsoletis, & horridis confectandis uocabulis, laudem in his dicendi se affecuturum putat, etiam eludimus, atque aspernamur. Num tu hanc uarietatem & discrepantiam arti, ac non hominibus ipsis attribuis? Omnis ars, Phædre, quæ quidem digna hoc nomine sit, una ipsa in sese, & sui undique similis, dissimilitudine illorum qui eam tractant, dispares aliquando suscipere uidetur formas: cum ita, ut sit, uariè ex ea ingenia afficiantur, ab alijsq; rectè exerceatur illa ars, ab alijs perperam: & in his munus ipsa egregiè tueatur suum, in illis minus id possit. Quod cum similiter in principe artium Philosophia eueniat, quid obstat, quin tollatur omnis controuersia: & cum ego Philosophiam ueris laudibus extulero, tu malos Philosophos iure redarguendos ducas? NEQVA QVAM hoc sic abierit, inquit: ego enim illā ipsam accuso, quam tu necessum est confiteare, tot huiuscemodi nebulosum & nugatorum esse ueluti matrem. HOSTIS, inquam, Philosophiæ es, Phædre, asperèq; nimium exeres inimicitias. Sed quoniam uideo te nullam omnino

omnino uocem æquis auribus admittere, quæ nomen modò Philosophiæ cum honore aliquo pronunciet: aggrediar ad defendendum, si pauca antè de meo officio fuero præfatus. Etenim ego cùm plurimum te amo, idc̃q; merito tuo: multa enim signa uicissim tu mihi, neque ea obscura, amoris tui erga me tribuisti: & in ijs hoc recens, quòd Curtianum meum carmen humanissimis uerbis profecutus es: Tum mihi illud in te usu uenire experior, quòd uilius unquam uix familiaritate æquè sum delectatus, ac tua: nihil enim fieri te uno aut amabilius potest, aut falsius: quod si ita non esset, tuum tamen excellens ingenium, tua egregia uirtus, humanitas, literæ, non solùm meam, sed omnium tibi beneuolentiam facilè conciliarent. Quòd autem me sæpe & multum monuisti, ut dimisso Philosophiæ studio, ad grauiores res tractandas me conuerterem: probasti mihi in eo tu quidem studium & uoluntatem tuam; consilium uerò & iudicium non ita: non enim si tibi omnia amicitiae officia præstare debeo, quod faciam equidem semper, & faciam sedulo, iccirco tuis etiam opinionibus annuere sum obstrictus: assentatoris esset, non amici, sic agere: tibiq; ita obsecundare, ut cùm meam rectè ac commode tutari possem, tuam potius sententiam sequerer, atq; amplexarer. Illud cū dolore aliquo fero, quòd uideo esse in hac causa necessarium, ut mihi tu oppositus sis, quem refellere coner: in quo tu meliore

multo conditione usus es, qui tibi Philosophiā quā oppugnares, non me ipsum proposuisti. Quamobrem si redarguendi causa acrius agere interdum fuero coactus, quæso ut bona tua cum uenia facere id mihi liceat: non enim tui refellendi, sed eius confutandæ rationis gratia, quæ ex ore tuo modò Philosophiam ut euerteret, equis uirisq; connixa est: uehementius mihi nonnunquam erit agendum: quod tu in bonā partem accipies, mihiq; pro ueritate, tanq; pro patria propugnāti, hanc curam, & hoc studium etiam ascribes laudī. Illud item peto, si contigerit aliquo loco, ut mihi de re quapiam interrogandus sis, id quod uides in tam graui causa fore faciendū, facilem te mihi in respondendo, & clementem præbeas. INTERROGES licebit, inquit, sed parcius: nam ego audire continentem orationem malo. GERAM tibi morem, quoad potero, inquā. Sed ut nonnunquā opus est in ea disputatione, quæ ex contrarijs partibus defendatur, inueniundi uerī causa interrogare, & interrogari, refellere, & refelli, quòd aliter sæpe nihil expediri, nec ad exitum commodè deduci potest: Sic illud non solum Philosophia, uerum hominis etiam mediocriter eruditi prudentia indignum, utrumuis istorum cum iracundia, aut cum pertinacia efficere. Enimvero unde ego nam potissimum ordiar? aut quod initium meæ orationi sumam? an ab eo sapientiæ uerbo, in quo tu omni cum sale, cum Priscos illos septem, tum Philo

Philosophiam omnem eludendo exagitaſti: in quo etſi nos mirabiliter delectaſti, uel uarietate rerum earum, quæ à te ipſo proferebantur, uel lepôre ſentientiarum: tamen, quod pace dixerim tua, fluctuare interdum: curſusq; magis & copiæ, quàm aut diſtinctionis aut ordinis cupida, ferri tua mihi torrens uidebatur oratio. QUID ITA, inquit: aut quæ nam fuit iſta fluctuatio? QVIA, inquam, cùm temeritatem illorum, & arrogantiam reprehendebas, qui primi ſapientium ſibi nomen, & profeſſionem uſurpaſſent ſapiētīæ: nimiumq; ſibi eos, & quod ferri non poſſet, appetiſſe dicebas: ea re quidem, quòd (ut aiebas ipſe) nihil ſit omnium rerum neque in cœlo, neque in terra ſapientia diuiniſ: mirabilem quandam rem profeſſiò, & cæterarum omnium longè maximam, huic ſapientīæ uerbo conſtituebas ſubiectam. Rurſus ubi eorundem leuitatem & inſcitiam irridebas, qui profeſſionis ſuæ titulo inflati, & tumidi, præſtare cæteris ſe arbitrantur, propter illud unum ſapientīæ nomen, quod in reliquas omnes etiam abiectas & ignobiles conueniret artes, fabrorumq; ſapientiam in eo & Homerum teſtem adducebas, nihil huic uoci relinquebas ſubiectum, quod æſtimatione ulla, uideretur dignum. Ita cùm duabus diſiunctiſſimis in rebus, una eximia atque primaria, altera porrò abiecta atque ignobili, eodem ſapientīæ nomine uterere: quid mirum ſi fluctuare mihi oratio tua, nihilq;

stabile & firmum in animis nostris constituere uis
debatur? Atqui ignosco equidem: sunt enim ista
rhetorum: pompam quærunt & gloriam: nec tam
exactam in audientium animis earum rerum sciens
tiam, quas tractant, quàm exigui temporis postu
lant opinionem: non enim docere propositum illis
est, sed mouere. Itaque nullis certis in dicendo finis
bus continentur: quoque fusiores, & abundantiores
semper sint, ut litigiosi uicini terminos, sic isti uoca
bula, rerum notas confundunt: cumque unius uerbi
inuolucro plura complectentis, in quam commo
dum est, uis fuerint partem: tum ubertate & copia,
numeroque bene compositæ & iucundæ orationis in
auditorum animos influentes, uim sæpenumero
afferunt ueritati. Contra hæc omnia Philosophia,
rem ipsam aperit, ambigua distinguere uult, inuo
luta euoluere: hoc ipso tamen imbecillior, quod ut
serè acerrimæ inter sanguine coniunctos eueniunt
dissentiones, sic ista ab ea, cui germanitatis uinculo
coniuncta fuerat eloquentia, deserta, non modò mi
nus habet splendoris ad illustrandam, uirium ad
confirmandam uirtutem: sed eius ipsius eloquen
tiæ inimicissimos impetus uix ab sese potest pro
pulsare. Quo utique dissidio (ut antè dixi) magna
hæc, quam cernimus, in omni uita exorta est per
turbatio. Quod si mea uox unquam quicquam ha
buerit autoritatis: omni ope adnitar, ut omnibus
suis partibus & numeris perfectæ, integræque sapien
tia

tia, ingenuis mentibus restituatur. Ergo in nomine sapientiæ ambiguus Phædrus: Quid in ipsa re? Descripsit enim ipse sapientiæ quoq; formam ueræ illius atque eximiæ. Audio: Sed tamen eam totam è uulgi iudicijs esse aptam uoluit. Vnde tantum repente in uulgo autoritatis? Nam & hoc loco quaero, Dixeris illos septem, si populorum suffragio dicti essent sapientes, non habere eos causam iure gloriandi, propterea quòd stultorum de sapientibus iudicium nullum existeret. Quo pacto igitur qui de sapiente nec iudicare quidem possunt, horum iudicijs niti & opinionibus, ea sola iudicabitur ritè sapientiæ? Sic enim (si memini) positum abs te est: Quicquid in bonis numerarit populus, & quæ studia cunque magni fecerit, in his necesse esse apud prime uersari sapientem, si uelit esse sapiens: nec eum à populi studijs, & uoluntatibus uel tantulum discrepare. Quid habet igitur præclari ista sapientiæ, si nil aliud ipsa sit, quàm uulgi opinio? Nam nos quidem cum notionem sapientis, quam in animis nostris natura inseruit, ipsa nominis uoce excitati, cogitando pertractamus: proponimus nobis longe præstantius quiddam, quàm quod assequi, quo uel aspirare uulgi ipsum facile queat: speciemq; eam in animo informamus, in qua nihil temeritatis insit, nihil festinationis, nihil inconstantiae: quæ quidem uulgi & populorum uitia sunt notissima. Neque est quisquam uersatus inter homines, & qui ipse

ipse modò sibi notus sit, qui aliam formam sapiens
tis mente concipiat, quàm hominis grauis, atque
firmi, nequaquam pro temeritatibus uulgi sua stu-
dia regentis, sed ipsius ultro moderantis, ultro co-
hibentis populum, si populus autore eo uti ad ca-
pessenda rerum gerendarum consilia uelit, sin mi-
nus, sententiam tamen suam præstantis, non popu-
li. Quod de Phocione claro Athenis uiro memoriæ
proditum est: qui cùm reclamante populo Athe-
nienſi, dissuasor fuisset eius belli, quod post Ale-
xandri mortem aduersus Antipatrū, & Bœotios,
duce Leosthene, gestum est: resq; initio prosperè
Athenas renuntiarentur, essetq; ob eam rem in læ-
titia, & gratulatione ciuitas: interrogatus, ecquid
illa sic cecidisse molestè ferret, quæ contra eius sen-
tentiam suscepta essent? Nequaquam, inquit: uerū
tamen ego in sententia mea nihilominus perma-
neo. Satis declarauit eo responso uir prudens, non
ex fortuitis euentibus sapientiam, neque ex leuita-
te, iactationeq; populari, sed ex grauib, certisq;
consilijs pendendam esse. Et sanè quidem illius exi-
tus belli Atheniensibus extitit calamitosus. Atqui
talis nobis ob animum uersatur sapiens, qui frænis
sæpe quibusdam quasi contineat populum temere
ruentem in ea, quæ concupiuerit: non qui conuellas-
tur ultro ipse, & auferatur à populo: qua specie qui-
dem in sapiente, nihil nec cogitari potest indignius.
Tu contra, nouo de sapiente iudicio uteris, nihilq;
neque

neqꝫ rectum, neqꝫ graue existimas, quod non à populo prius probatum, adscitumqꝫ sit; ut tibi in hoc paulisper assentiar (nam quid uerius sit, mox uidero) Agè sanè, Sit munus primum sapientiæ studia uulgi persequi; Rationem atqꝫ tempus huius fungendi muneris quæro: non enim semper (ut tu ipse inquebas) modo eodem conuenit. Quid ergo? cum uulgus semper uarium incertumqꝫ sit, atque ut in euripis, & fretis undarum assidua est cōflictatio, fluctusqꝫ fluctum identidem & impellens, & reuocans: sic temeritas populorum incitata & uolubilis, contrarijs ueluti æstibus frangat sæpenumero, impediatqꝫ semetipsam: quod erit populo tempus iudicij faciendi, ferūdaqꝫ de sapiente uiro sapientiæqꝫ sententiæ? Tum'ne, cum repentino aliquo studioꝝ motu incitatus, ad appetendum aliquid feretur effusus? An post, cum repræhensio errore, uel etiam sola mobilitate pœnitens, repudiabit illud quod paulò antè intenderat? In hac inquam uarietate, & in his errantibus populi opinionibus & studijs, utrum tandem quasi æstum sequens sapientia, ius suum & nomen ritè obtinebit? ut de Q. Fabio Maximo legimus, eo qui bellum cum Annibale gessit. De quo Ennius:

Vnus qui nobis cunctando restituit rem:
Non ponebat enim rumores ante salutem:
Ergo magis magis atqꝫ uiri nunc gloria fulget.

Atqui gloriam ille istam fuerat adeptus, quod à

q populi

populi uoluntate dissentiens, fortunam Reipub. in discrimen prælii non adduxerat, ob eamque rem ab eodem postea populo sapiens est iudicatus. Quæro igitur, quando sapiens? cum populi & militum incitatis ad pugnandum studiis obfisteat: & quia minus illorum cupiditati obsequebatur, suæ famæ & dignitatis detrimentum accipiebat? At non hoc modo pendeat è uulgi opinionibus sapientia: An post, cum cunctorum uoce & concursu maximè laudatus est, quod leuia uulgi iudicia contempsisset, suumque ipse iudicium fortiter retinuisse? At hoc posteriore populi iudicio, id quoque est ab eodem populo iudicatum, nequaquam esse sapientis imperitæ multitudinis studiis obsequi, nec consilia sua ex populi opinionibus moderari. Ita inanis in omnem partem sapientiæ iudex est populus; minimeque idoneus, cui hoc tantum munus committatur: atque id decretis non solum grauium atque prudentum, uerum etiam suis. Verum hoc fortasse haud ita uult Phædrus, neque omnibus ipse populi scitis sapientiam adiungit: sed ea sola in hanc laudem recipit, quæ non mobilia & uaga, sed firma constantiaque sunt, nec ulla unquam uicissitudine permutantur: ac ne multis, ad ea bona nos reuocat stabilia atque rata, quæ semper populus maxima iudicat bona, diuitias, honores, imperia, uoluptates: huc enim conuersam omnem uult esse sapientiam, ac in his potissimum appetendis, cum populo eam ait consentire oportere: munusque

nusq; sapientis præcipuum esse, ut referat is ad sese omnia quæ concupiscat populus, partesq; suas in ijs longè principes esse studeat, neq; alium esse arbitretur, qui illis potiatur, se ipso digniorem. Quod si ita sit primum, quî conuenit, eundem populum, quem temeritatis & inconstantia plurimarum rerum arguas, atq; condemnes, repente una certa in re, & ea quidem maxima, idoneum statuere sapientiaæ auctorem? Quis hoc sic diiudicauit? Quis distinxit? Quis has ueluti prouincias sic partitus est? ut ex eodem autore quæ prodeunt, horum partim sapienter decreta existimari debeant, partim stultè. Deinde, si hæc semper fixa de diuitijs & uoluptatibus populi est opinio: quomodo tu non frustra illam nobis imaginè ante oculos effinxisti, qua paratum ad subitos excursus sapientem constituebas: cum quidam eum ueluti Scytham aliquem, aut Nomadam, cui nullum usquam certum domicilium esset, tanquam in rheda collocasti, ad profiliendū attentum: ut simul atq; populus nouo æstu aliquo cupiditatis effruescens, delabi quopiam, confluereq; cepisset, eodem ipse præcurrere & aduolare niteretur? Quid inquam opus fuit hac mobilitate, & hoc tanto excubandi, uigilandiq; negotio? & cur non protinus sapientem in ipso opum & uoluptatum regno constituissti, fruentem pacato animo eis rebus, in quibus, fructus sapientiaæ præcipue cernitur, nulla eiusmodi ancipiti cura distractum, tanquam rescissurus ali-

q : quando

quando populus decretum suum, & de huiuscemodi bonis sententiam mutaturus sit? Iam illud quidem, quod maximè ad rem pertinere arbitror, querendū in primis mihi statuo, Vnde tanta sit æstimationis hīsce bonis: Ex ipsis ne? hoc est, ab ipsorum conditione atq; natura, ut sint ipsa per se & sua vi æstimationanda? An à populo? eò quòd populus illis hoc tantum autoritatis attribuat? Si ab ipsis, quonam sapienti opinione populi multitudinisq; iudicio fuerit opus? An dubium id est, quin ipse melius & consideratius multò, quàm imperitum vulgus soleat, de eo quod bonum est, constituturus sit, & iudicaturus? quippe cū sapientiæ in primis sit, non aliena eam subsequi, sed sua ipsam iudicia proferre, quæ alij potius sequantur: aut ne nomen quidem suum ipsa retineat, si in iudicando alijs concesserit. Si uerò bona illa magni iccirco facienda sunt, quòd eadem plurimi sunt à populo, nullum erit illorum ueritate neque natura, sed tantum uulgi opinionibus bonum: ita in bonis existimatis & opinatis, non in ijs quæ uerè bona sunt, egregia ista popularis sapientia enitebit. Quid ergo illa, quæ uera bona sectatur, & in illis appetendis utitur iudicio non uulgi, neque imperitorum, sed suo: quo tandem nomine fuerit appellanda? Num ea quæso indignior habebitur, quæ sapientiæ nomen obtineat? & iccirco eam popularis sapientia anteibit, quòd hæc ueritatem bonorū amplectitur, illa ipsa

ipsa duntaxat opinionem : nisi fortè nullum omnino re & ueritate est bonum , omnisq; boni ratio ex sola opinione existit. Quod si ita esse suscipiatur, rursus Protagorea ratio inducatur necesse est, nihil re ipsa uidelicet, neque natura uerum , neq; bonum esse: sed quale cuique quid uideatur , id illi tale existere. Quæ positio Sophistæ in primis (ut tum habebatur) nobilis, diu & multum in Græcia factata, ad extremum doctissimorum disputationibus fracta , atque conuicta est. Etenim tum perspicuè est demonstratum, si ita se res haberet , primum, contraria in eodem & repugnantia simul conuentura esse, quod nullo modo fieri potest: quippe cum contrariè diuersis de quaq; re uideatur : deinde artem omnino nullam neq; scientiam habere locum posse : nihilq; interfuturum esse inter doctissimos & imperitissimos , neque inter eos qui omni rerum prudētia usq; se excoluissent, & eos qui nunquam animum omnino ad agendum quippiam , aut considerandum appulissent : Ita omni omnium rerum penitus sublato delectu, omnibus cōsilijs iudicijsq; peremptis, fore planè nihil quo res rei ulli momento aliquo antecelleret. Sed nos illis disceptationibus omisissis, quæ latiores sunt , quàm ut angusta & breui oratione concludi possint : ad ea quæ nobis sunt propiora redeamus; idq; dicamus , quod reuocantibus etiā nobis necesse est intelligi: si boni uerique ratio opinionibus duntaxat pendenda sit, pos-

pulum ipsum iure unum appellari conuenire sapiētem : Quippe cū plurium concors consentiēsq; opinio, singulorum sententijs sit anteponenda: Populus itaque solus sapiens . Quē ergo nobis constat ipsi, dum hoc communi loquendi more errorem, inconstātiā, uanitatē populis ascribimus? uerbaq; stultitiā & temeritatē significantia, in genere sapientissimo usurpamus? Num aut maiores fortē nostri aberrauerunt hi, qui rebus imposuere nomina? aut nos illa ipsa nomina perperam præpostereq; accipimus, alienaq; prorsus loquimur, cum ordinem, grauitatē, constantiā, ceterasq; huiusmodi uirtutes ab errore leuitateq; dissociatissimas, unanimes comites sapientiæ attribuimus? At enim æquius multo est unum concedere sententijs plurimorum, quā unius plurimos: sic enim dicbas: Quid cū plurimi ex contrarijs partibus dissentiunt, multitudinesq; ipsæ inter se sunt discordes: numero'ne semper, nūquam autem ponderare grauitateq; disceptantium lis dijudicabitur? Quid cū non hominibus solū, sed populis uniuersis diuersæ sunt sententiæ? Lacedæmone furari ingenuis adolescentibus est permissum: Athenis nihil minus. Contrā, Atheniensibus lege ocij erat mulcta: at liberale uel maximè id apud Lacedæmonios. Ex quo illud legati Spartani dictū, qui Athenis quendam damnatum ocij duci cū uideret, quæsisse fertur perstudiosè, quis esset ille, qui tam

libe

liberalem subiisset mulctam. In dissimilibus ergo duorum principum populorū opinionibus & sententijs, utram tandem ueriores & sapientiæ congruentiores dicemus esse? aut si non facile id est iudicatu, tuam scilicet, Phædre, sapientiam adsciscens tibus: constituemus quidem hoc certè, quod est necesse, hominem unum atque eundem Lacedæmone sapientem, Athenis stultum fore: ut cum secum foras extollere domesticam sapientiam nequiuert, in alienam ciuitatem, quemadmodum hospes, sic etiā insipiens introiisse dicatur. Verum ut congregiamur propius, ac de eo ipso genere bonorum, quod Phædri ista in primis aspirat sapientia, de diuitijs inquam, ac uoluptatibus uerba faciamus, quando horum bonorum iudicium omne ipse attribuit populo: si uaria existant hac quoq; de re populorum decreta, quid erit tandem statuendum? Lacedæmone durissimis Lycurgi legibus, quoad illæ uiguerunt, neque ad pecuniam, neque ad delitias aspirauit quisquam. Nemo igitur illis tot seculis in ea ciuitate sapiens: ne Romæ quidem, qua tu è ciuitate exemplū omnis sapientiæ & uirtutis in nostros animos transcribebas, primis illis CCCC. LXXXIII. annis diuitiæ admodum in usu, aut in honore ullo fuere: neque publicè id adeo, neque priuatim. Ac publicè quidem, Q. Fabio Pictore, L. Quintio Cons. nummus in hac urbe primū argenteus signatus est, annis quinque ante primum Punicum bellum

bellum: cum antea graui ære, inepto ad coaceruandum, ac seponendum, omnes uterentur: priuatim uerò qui argētum possidere comperti essent, hi neque legum pœnas, neque censorias notationes effugerent. Ita in hanc urbem aditus omni illo tempore sapientiæ interclusus fuit: nisi forte tum populi Romani opinione & iudicio, ex alieno quodam genere sapientia extitit, non uoluptatis & copiarum, ut nunc est, sed abstinentiæ, frugalitatisque magistra: cuius tamen moris ac disciplinæ temporibus optimis Pop. Rom. non pœnitebat, tum cum ab aratris accersebantur homines, quibus magistratus, curationes, imperiaque mandarentur, totaque Respublica committeretur regenda: quorum quidem consilijs, fortitudine, iustitia potissimum effectum est, ut hæc ciuitas ex minima, ad summum rerum humanarum fastigium perueniret: nam ab hac quidem populari sapientia quotus quisque est, qui ad gubernacula Reipublicæ trās-latus, officium suum, atque operam ualde probet populo? Quod si populum quoque uelim in hac ratione defendere, non ne id dicam, quod ab omnibus concedi necesse sit? non hosce cupidos & ad omnia progredientes, quibus omne in pecuniā, & in ambitione honoris positum bonum est: qui que quod plurimum in sua ciuitate possint, anxij semper, atque solliciti, omnes intendunt machinas, omni uia moliuntur: sed abstinentes, sed moderatos, sed graues, eos esse, qui

qui à populis præcipuè & probentur, & diligantur, quorum se fidei libens multitudo ipsa committat. Videtis campum, in quo exultare possit oratio mea. Sed mittamus: sitq; sanè & Phædro, & populo teste, opum & iucunditatum consecratrix sapientia: Illud quæro; in quo uim & facultatē istius sapientiæ ponitis? Vtrum si adipiscatur commoda fortunæ hæc, quæ uos tantopere extollitis: an si uiam, rationemq; commonstret adipiscendorum? Hoc est, Vtrum in euentu adipiscendi, an in consilio duntaxat insit sapientia? Si in euentu, atq; ut adipiscatur, quī iam distinguemus fortunatū à sapiente? aut cur non idem atque unum fortuna ac sapientia fuerit? Et quidem hunc honorem in scena & à Comœdia cernimus Fortunæ datum, Centum doctorum hominum consilia hæc una deuincit Dea Fortuna: atque hoc uerum est, perinde ut quisque ea utitur, ita præceller, atq; exinde sapere eum omnes dicimus. Bene ubi cui discimus consilium accidisse, hominem cautum eum esse declaramus: stultum autem illum, cui uertit malè. Nostis carmen profecto, quo, scenæ uulgicq; iudicio, in sede sapientiæ fortuna constituitur. Et ridiculus Pacuius, qui de Fortuna secus sentit: Fortunam insanam, & cæcam, & brutam perhibent Philosophi, saxicq; instar globosi prædicant uolubilem. quī enim ea poterit uolubilis atque insana esse, si cum sapientia semper coniuncta sit? Quanquàm Pacuius (quod ita Phædro

r uideatur

uideatur necesse est) nequaquam satis idoneis testibus Philosophis, fortunam in crimen & in uituperationem uidetur accersere. Sed persequamur, ut coepimus, hocq; urgeamus: si in adipiscendo & potiundo uitæ commoda sapientia tantummodo sit, nihil inter eam, interq; fortunam inter futurum esse, casuq; & fortuito quencq; effici posse sapientem: ut enim ad honores quis & ad diuitias euectus fuerit, ita sapientiam euestigio fuerit consecutus. Vbi circumspectio igitur, ubi consilium, ubi illa accurata & diligens consideratio, quæ habita est semper propria sapientis: qui se nunquā in præcipitem locum committit, certaque ratione dirigens appetitiones suas, diuitias & potestates sæpenumero prætermittit, quò se bona existimatione in populo communiens, ueras uitæ uoluptates, quæ ab honestate & innocentia seiunctæ esse non possunt, tranquillo animo consequatur: nihilq; unquam molitur, in quo subductis calculis non plus consilij & rationis insit, quàm fortunæ. Quòd si non tam in adipiscendo, quàm in acutè acriterq; peruestigando quibus ad fortunæ præmia itineribus ueniatur, sapientia magis elucescit: equidem non negarim hoc sapientia munus magis congruere. Adest enim, iam consilium & cogitatio, quæ sunt cognata & familiaria sapientis. Sed quid, si, omnia ipsa cum egerit, uehementerq; elaborauerit (quandoquidem euentum atq; fortunam præstare nemo potest) spe & conatibus

bus suis fuerit decepta: retinebit'ne sic elusa atque irrita, sapientiæ nomen, nec'ne retinebit? Si non retinebit, falsum erit in explorando, & indagando speculari sapientiã: rursusq; omnis sapientis approbatio à casu, & à fortuna erit repetenda. Si retinebit, poterit iam certè esse aliquis sine fructu ullo & sine emolumento sapiens. Quod neque tu Phædre ita uis, & ego maximè alienum à sapiëntia statuo. Quid enim, rem'ne unam omnium pulcherrimã & maximã, ad quam nostra uota & desideria præcipuè cõtendunt, possideri sine fructu, atq; adeò sine maximo fructu, in animũ inducere poterit quispiam? non cadit hoc in cogitationẽ hominis, nostrãq; id mentes penitus respuunt: potius quicquid uitam exornat atq; excolit, facitq; ut pacatè & splendide, & cum uoluptate uiuamus, totum consilio & sapientiæ refertur acceptũ: ut cui sapientia ipsa ad sit, ea illi inutiliter & sine maximo fructu nequeat adesse. Relinquitur igitur, ut iunctũ utrunq; & copulatum, sapientiã cõstituat: hoc est, ut uera, germanaq; sapientia sit, cum potiri fortunæ bonis, tum studio ijs nostro, industriaq; potiri. Quod sic recordor abs te fuisse positum, iucundiora esse munera fortunæ, quæ aliquis labor antecesserit & molestia, q̃ ea quæ sua sponte nec opinãti adueniunt: propterea quòd uoluptas omnis ex contentione ipsa molestiæ percipiatur uberior. Si inquã ita sit, suauioraq; sentimus, quæ cum labore quodã & sollicitudine animi, nobis ipsi expugnauimus, q̃

quæ ultro accepimus oblata : optanda est mala uas-
 letudo, ut eius prosperæ atq; bonæ lætitiæ amplior
 nobis adueniat. Falsò igitur est in cōmunibus uotis
 usurpatū, rem esse optandam nobis, non partam la-
 bore, sed relictam. Quanq̃ ista quidē leuiora sunt:
 illud porrò graue, grauiusq; animaduertendum:
 Quod si ab industria coniunctè & à fortuna effici-
 tur sapientiā, neq; alia conditio quæpiam modusq;
 alius apponatur: hoc est, quo cuiq; ordine, qua tem-
 peratiā, qua etiā à malis facinoribus abstinētia, ad
 opes & imperiā peruenire sit licitū : nil causæ fuerit,
 quin quæ ad quæstū maximè, & ad pecuniā apposi-
 tæ fuerint artes, eæ potissimū nomīne sapientiæ or-
 nentur. Erunt igitur sceneratores in hanc laudē uo-
 candi, erunt circūscriptores, erunt testamētarij. De-
 niq; quotquot sibi perīurio, & fraude, & malis arti-
 bus rem aut potentiā quærūt, modò assequātur id,
 quod cōcupierint, prouidi hī, & solertes, & sapiētes
 esse iudicabūtur. Quid ergo: hancine placet consti-
 tui sapientiā, & talem eam in hominum conuictus,
 commerciaq; produci, quæ populatoribus huma-
 næ societatis non solum impunitatem, sed gloriam
 etiam nominis sui proponat: non ne plurimū inter-
 erit, quo pacto quisq; ad opes, honoresq; perueniat,
 & qua ad fortunæ bona nitatur uia? Nam qui iustè
 & castè id egerit, idemq; ea fuerit constantia prædis-
 tus, ut maius sibi bonum in uirtute atque honestas-
 te, quàm in uoluptatum, opumq; affluentia consti-
 tuat,

tuat, cum sanè nos uirum bonum appellabimus, maximamq; illi fidem rerum omnium habebimus: sapientem uerò etiam, si cum integritate unà & cum iustitia, mentis præterea ingenijq; acumen habuerit coniunctum: quod omnino sapientiam in actione mentis, & quasi ingenij uigilia quadam constitui- mus: quæ si à uirtute & innocentia disiuncta sit, suisq; propriè consilijs absque iustitia ueritateq; nitatur, non iam sapientia, sed malitia sit nominanda: ut quæ celeres quidem animi motus, & ad uidendum quid expediat acutos: sed eosdem prauos & inconstantes & perfidiosos habeat. Quapropter decuit abs te, Phædre, sapientem tuum ex hoc genere constitui, qui polleret quidem mentis intelligentiæq; consilijs, uerum idem omnia tamen ad uirtutem, æquitatemq; referret. Quem tu nunc cuiusmodi, quæso, & quo ex genere nobis effinxisti? occultum quendam & cautum designasti artificem simulandi, dissimulandiq;, qui cum specie quadam splendida & liberali oculos nostros quasi perstrinxisset: intus autem copi pectore (ut ille inquit) arcana continuisset studia malitiæ suæ: tum ut sese ulla aperiret occasio, reiectis inuolucris dissimulationis, ad illa fortunæ bona prorumperet, quorum adipiscendorum gratia, nec uiolare ius fasq;, nec cæteros supplantare indignum arbitraretur: qui si non uastè ac præruptè, ut de Philosophis ipse dicebas: at elegantiore quadam improbitate magisq; concinna, præ-

riperet cæteris adipiscendi palmam. Vastrum inquā nobis hominem, & astutum, plenumq; doli ac perfidiæ descripsisti: atq; eum qui cū nullam ueram speciem sapientiæ nollēt, uirtutemq; ac dignitatem utilitate sola metiretur, præstare semper arbitraretur pudere magis, quā pigere: multoq; plus doleat non adeptus, quod concupiuisset, quā in impuritate aliqua facinorēq; deprehensus uerecundaretur. Detorquebas interdum tu quidem, & splendidas ac sonantibus uerbis umbram illi appingere uirtutis contendebas. Sed facilè patebat, totamq; se indicabat oratio tua: Dum enim inobseruatis uestigijs aiebas curaturum esse sapientem, ut quò intentius expeditius perueniret: non mediūsfidius lucem neque diem, sed noctem & tenebras quærebas sapientiæ. Quòd si huiusmodi sapientiam esse placet, quæ eos, quibus æmulatur, tyrannos imitetur: ut quemadmodum illi segregatos ab sese habent omneis bonos, seruorum autem & facinorosorum & barbarorum circum se comparant manum: sic ipsa ueris uirtutibus eiectis, fraudum insidiarumq; comitatu, ad opes sibi acquirendas stipata incedat: nimirum nobis prætereà nihil est dicendum: quandoquidem non parte aliqua, sed tota sapientiæ ratione dissentimus: nam ego illam ex alieno longè genere, prorsusq; contrario esse statuo. H I C GAL L V S, Nequaquam hoc uereare, Sadolete, inquit, ut quisq; nostrum (nam pro Cítrario tibi etiam

etiam spondeo) sapientiam cum scelere, & cum perfidia putet iungi: neque uerò Phædrus hoc perspicue posuit: uidebatur quidem interdum oratio eius abundans & concitata, labi huc, atque effluere. Sed nosti Rhetorum morem: mihi quidem ratio illa uehementer probatur, nec sine ueris germanisq; uirtutibus sapientiam, nec sine sapientia uirtutes ipsas existere: sapientiamq; ingenij & mentis actionem, non fortunæ euentum esse ducendum. Sed quid si iccirco plurimi sapientia sit, quòd ea nobis bonæ fortunæ effectrix, atq; administra est: non malis insidiosisq; artibus, ut tu modò improbabas, in quotibi planè assentior: sed uirtutum choro nixa comite, fidemq; & ueritatem ad omnia adhibens: ut sapientis sit honestis rationibus uitæ copias consequi: sapientiaq; effectus fortunata uita sit: num hoc quoque fuerit eiusmodi, ut alienum grauitate sapientia esse uideatur. Mihi quidem notio illa, quam in animo insculptam de sapientia gero, hac ratione etiam pulchrior, magnificentiorq; occurrit, si sapientem omnibus subsidijs fortunæ florentem atq; ornatum esse uideamus: addet enim hic externus copiarum apparatus, illius profectò decori dignitatq; permultum. DICUNTUR ista, Galle, speciosè, inquā, & aliqua ex parte etiā probabiliter: sed uidendum tamen est, ne conturbemus. Etenim si hoc ita intelligatur, ut sapientia fructus omnis in fortuna sit, & cum fortunam adepta erit sapientia,

tum

tum demum nomine illo digna censeatur; aut nihil ipsa omnino per se fuerit: aut, quoniam fortunam præstare nemo ne sapiens quidem potest, sine ullo commodo & emolumento adesse nobis sapientia poterit: hocne igitur tu ita uis? MINIME, inquit: Sed ego cum maximas per se utilitates in ipsa sapientia inesse statuo, tum arbitror uberius illam fore ornatam, si fortunæ quoque benignitas accesserit. FACILE hoc tibi concesserim, inquā: dum ne illud ita sentias, omnem uim sapientiæ huc intentam esse, ut fortunæ ea nobis conciliatrix sit. Sequitur quidem ferme fortuna sapientiam: rarumque admodum, & difficile factum est, ut sapiens idem & infortunatus sit. Ex quo dictum ab antiquis, Suæquenque fortunæ sibi fabrum esse. Sed tamen fortunarum consecutio appendix quædam bonorum consiliorum est: modicaque semper est, ritè æstimantibus, ad sapientiā fortunæ accessio. Namque ipsa sapientia maiores sibi multò opes, & præstantiore ex genere in se paratas habet: nec ex alienis generibus bonorum, sed ex se, & sua uim commendat nobilitatem suam: quæ si domesticis fructibus non contenta, alienis opibus perficere se cogatur, non iam nec libera ipsa iuris ue sui, nec ullius compos dignitatis fuerit: seruiet enim necessario fortunæ, totamque sese ad illius nutum finget, atque conuertet, ut suum bonum, quod habet in illa repositum, illius ipsius beneficio possit consequi. Quare si huius

fi huiusmodi sapientia sit, quibus ea, quæso, ornamentis dignitatis, aut quo honore libertatis poterit esse prædita? Nam ut seruire hominem homini discimus, non eum solum qui emptus pecunia & mancipio acceptus sit: uerumetiam illum, qui cuius ipse rei egens est, eam rem cogitur ab alio ambire, & mendicare. Sic cum propter fortunam sapientia expetenda sit, iam non ipsa domina rerum, sed pedisequa fortunæ existimanda est. Etenim quicquid amatur aut appetitur propter aliud, id non ipsum appetitur per se, sed omnis illi dignatio provenit ex eo, ad quod hoc tanquam intermedio itur atque contentur: ut postea finem, atque extremum quod optabamus consecuti, horum quæ adhibuimus tanquam adminiculorum ad potiundum & consequendum, iam ne reminiscamur quidem: eorum enim consumpta opportunitate, nulla reliqua in ipsis remanet dignitas, quæ nostros animos teneat. Sed nostrum omne bonum in illo summo agnoscimus, ad quod de principio iam tum tendebamus: sic ut portu adempto, nauigio non amplius opus est: & uictoria constituta, arma deponuntur bellica: Sic fortunæ operibus comparatis, inanis de cætero sapientia est. Igitur in hoc ordine, & tanquam curriculo quodam interuenientium rerum ad aliosque fines properantium, sapientia si constituatur: non ea spoliata solum suo decore, seruiat & ancilletur fortunæ necesse est: uerum cum fuerit ad fortunam peruentum,

s nullam

nullam iam ulterius partem commodi, neq; æstimationis obtineat. Quod est rursus illa sapientiæ notitia indignum, quam in animis nostris natura ipsa descripsit. AGE AGE, Gallus inquit, cogor enim tibi hac ratione assentiri, fortunam non esse sapientiæ dominam: quæ uideretur fore, si ad eam unam sapientiâ tota pertenderet: Sed quin sit sapientiâ ex comitatu bonæ fortunæ splendidior, hoc ne inficiari quisquam, & deterere dicendo ex animis nostris poterit? QUID possit, inquam, alio loco uidero: Nunc hoc sic habeto: Si acri acie mentis naturam rerum intueri uolueris, te non difficiliter animaduersurum, in tanta uarietate & artium & operum, quanta hominum labor atque industria quotidie efficit: nihil in eis rebus inesse dignitatis, quæ ad propulsandū incommodum duntaxat, & ad necessarios uitæ usus repertæ sint: quod huiuscemodî quæ sunt, seruiunt omnia necessitati: neq; habent in se quicquam soluti, & liberi: sed alienis astricta legibus tenentur. Quod enim fugere incommodum atq; malum à natura ipsa cogimur, idcirco sunt ista uel & necessitate expressa, ut naturæ præstò sint, uitamq; ac salutem hominis custodiant. Nihil autem coactum suapte natura est laudabile. Vbi ergo existit dignitas? ubi laus? Nempe in his, quæ necessitatis soluta uinculis, ipsi nostræ uoluntati sunt libera: Nam quoad laboramus & tendimus, ut subsidijs fortunæ conquirendis fulciamus,

& tua

& tueamur uitam noſtram, quoniam id non ſpon-
 te, ſed naturæ lege atque imperio facimus, hæcenus
 ſumus & laudis, & criminis expertes. Quod enim
 alieno gerimus coactu, neutram id in partem attri-
 buendum nobis eſt, quandoquidē nulla in hoc ani-
 mi noſtri neq; ex uirtute, neque ex uitio declaratur
 affectio. At cum ſuperēſſe incipit neceſſitatibus no-
 ſtris diuitiarum copia, & fortunæ quali quædam
 ubertas, materiæq; habemus ampliorē, in qua li-
 berè uerſari uoluntas noſtra, & ſuo ſe arbitrato ge-
 rere in ea poſſit: tunc ſi rectam rationē, conſiliumq;
 bonum adminiſtrandis fortunæ facultatibus adhi-
 bebimus, ornabit quidem fortuna ſapientiam: ſed
 propter eam cauſam ornabit, quia ipſa antè à ſapien-
 tia fuerit ornata: omnis enim illa directio, & prudēs
 aptaq; diſpoſitio, tractatioq; opum & fortunarum,
 ſapientiæ tota eſt: atque eadem ſapientia ea eſt, quæ
 in poteſtatibus & opibus, omnibusq; bonis, mune-
 ribusq; fortunæ, lumen illud accendit pulchri atq;
 decori: cuius non ſolū oculi hominum ad aſpe-
 ctum, ſed mentes etiam ad admirationem conuer-
 tuntur. Nam ipſa quidem fortunæ bona, ſi per ſe
 illa ſpectes, quid habent in ſe præclari atq; magni:
 quæ iacerent penitus inanimaduërſa & mortua,
 niſi actum tanquam animam à ratione utentis acci-
 perent: perinde autem ut quis utitur, ita efficiuntur
 & laudis participia, & uituperationis: ſi enim ordi-
 ne & ratione diſponuntur, nihil ſpectabilius: ſi per

inconsultam, cæcamq; cupiditatem effunduntur, nihil fieri potest turpius: ut cum ad homines indignos delata sunt, augeant potius & cumulent illorum indignitatem, quàm quicquam illis splendoris aut ornamenti afferant. Igitur quicquid ex fortuna est, quod superfluat, ultraq; usus uitæ necessarios sit, totum supellex est, & instrumentum liberæ uoluntatis: particepsq; hætenus & uirtutis & uitij: ex alio genere utile, quàm quomodo ea sunt, per quæ necessitatibus uitæ subuenitur: illa enim ad incolumitatem duntaxat utilia sunt: hæc ad amplitudinem, ad gloriam, ad dignitatem: cuius quidem pulchrioris, præstantiorisq; utilitatis amore & studio, liberæ in primis mentes & ingenuæ excitantur: plusque multò sibi statuunt in honestatis decore, quàm in salutis incolumitate esse repositum. An uos aliam esse causam, & rationem putatis, quam obrem non solum erectioribus animis qui sunt, uerum ignauiores etiam alij & demissiores, nisi illi similia brutis mancipia omnino sint, flagrent nimis acriter interdum studio rerum gerendarum: seseq; adhibendi in aliquod opus illustrius, sui'que ingenij periclitandi cupiditatem habeant insitam: nisi quod amplitudinis splendore illo ad amandum arrepti, cupiunt sese in illa luce constituere, & nobilioris fieri naturæ participes? uegetiore uerò qui sunt animo, ut quietem nullam inueniant, ut tanquam cestro quodam exagitati & perciti, The-
mistocleo

mistocleo exemplo, nihil aliud noctu interdiciq; cogitent, quam quemadmodum queant maiores atq; honoratiores cæteris existere: atque ardorem animi sui, quem compressum, atque retrusum ferre non possunt, in illustribus actionibus exponere, ac patefacere: hinc honorum ambitus, hinc magistratum, hinc omnis opum pecuniaeque cupido, suscepta quidem illa primo honesti decorique causa, ut in oculis hominum splendidi incedamus, ut aliquid ipsi esse uideamur: uerum post ob inscitiam ueri boni, errorumque ignaræ mentis, ad inanem oculorum ostentationem, improbioreque exaturandas cupiditates, quæ sita atque translata: quam nunc quidem sectandæ sapientiæ rationem, frequentiore nimirum magisque in populo usitatam, Phædrus omni sua oratione communiuit. Sed nos qui ex eo genere hominum uolumus esse, quod rarius quidem est, uerum multo præstantius: quodque amore diuinæ pulchritudinis incensum, dignitatem sibi præcipue proponit: ferturque omni studio ad illud potiundum bonum, quod naturæ ipsius instinctu ferè omnes, certo iudicio sanè quam pauci nouerunt niti. Si Philosophiam nobis ducem adhibemus, quæ se effecturam amplius pollicetur, ut sine errore ullo, sine offensione, optatum animi nostri ualeamus consequi: quis hoc nobis iure ascribet uitio, ac non laudi potius ducet, quod in cupiditate tanta, nos tamen ita contineamus, ut non impetum animi, nec quicquid statim

s 3 nobis

nobis expetendum occurrerit, sed certam consilij
& rationis regulam, cuius quidē sola Philosophia
magistra est, in dirigendis nostris opinionibus per-
sequamur? HIC CITRARIUS, Probè lo-
queris, inquit, & contineamus sanè nos, si modò
quod pollicetur, præstare idonea Philosophia est;
cuius tantam hanc uim iandudum expecto nobis
ut patefacias. TEMPVS admonet, inquam, &
res ipsa eò iam me uocat: nam adhuc quidem ueli-
tati magis inter nos sumus ego atq; Phædrus, quàm
iusto prælio cōgressi. Nunc quoniam legibus iam,
& ritu Philosophorum differendum mihi est, qui
captiones uerborum excutiunt, nihilq; obscurum
neque ambiguum in oratione esse patiuntur: nomē
mihi primò sapientiæ non definiendum nunc qui-
dem (alius enim erit magis aptus ad id faciendum
locus) sed in qua ponatur re, peculiariter est indi-
candum. Etenim cū duo sint à ueteribus illis uer-
borum & linguæ repertoriis facta uocabula, quæ
ad duas res in tota hominis natura multò præstan-
tissimas, significandas ualeant, prudentia uidelicet,
& sapientia: equidem non abnuerim horum duo-
rum uocabulorum usum ab optimis interdum au-
toribus promiscuè fuisse sumptum: quod (ut mihi
uideretur) & sæpius, & liberius facere solet Plato: Ari-
stoteles quidem, & prorsus cæteri omnes, ubi ad
germanas & proprias rerum declarationes fuit ue-
niendum, sic distinxerunt; ut prudentiam eis rebus
humanis

humanis præficerent ratione confilicq; gubernandis, quæ in motu & in uarietate semper eissent, nullamq; certam haberent in se, quapropter hoc magis, quàm illo modo euenturum quicquam esset, causam aut necessitatem: quam illi partem rerum opinabilem omnem uocant, habitumq; animi illis imperantem & moderantem, prudẽtiam: Alteram uerò partem diuinarum rerum & immutabilium, quarum perpetuus semper & uniusmodi esset status, sapientiæ uoluerunt esse subiectam: ut in ijs cernendis contemplandisq; duntaxat, nullo alio munere, districta sapientia teneretur. Hac diuisionis & nominum ratione, Græci eos nominauerunt prudentes, qui autoritate in publicis rebus & consilijs florere: quæ in illis magis locis ualuit nominatio, ubi minus roboris in legibus, & in communibus moribus minus firmitatis, maior autem uis in subitis populorum scitis, quæ psophismata appellant Græci, extitit. Qua de causa plures Athenis prudentes fuisse memorantur, quàm fuerint Lacedæmone: quòd ualidæ illic leges Lycurgi, atq; firmæ, minus ingenio loci & callidis consilijs dabant. In rebus autem incertis, & uariè se habentibus, maxime existere uideatur prudentia. Quod etiam Phædrum nostrum similitudine induxit, ut cõsiliorum hanc uarietatem, mutationemq; actionum sapientiæ ascriberet. Sapientia porrò est, ut ex communi hominum sententia cõstituamus hoc nomen: siquidem

dem uerborum usus & significatio à populo, rerū autem intelligentia à sapientibus est petenda; Sapiētia inquam est, ex qua eos etiam, qui huius, quam diximus, prudentiæ expertes & essent, & haberentur, in astrorum cœliq; & rerum illarum sublimiū ac mirabilium aspectu, contemplationeq; uersatos, sapientes nominandos Græcia censuit: cuiusmodi septem illos consensu populorum uocatos fuisse, literis proditum est: prudentem autem Periclem, & eum, qui fluctum Barbariæ è Græcia expulit, Atheniensem Themistoclem: Quam nos eandem sermone nostro patrio rerum nominumq; distributionem, acceptam à Græcis, secuti sumus. Quòd si ratio quoque reddenda huius distinctionis sit, nimirum ea esse intelligatur, quæ etiam est in communibus hominum sensibus posita: decreui enim, quoad quidem potero, non difficiles aliquas uobis, neque contortas, sed è medio sumptas, proponere rationes: ad quas percipiendas, non exquisita quadam doctrina, sed parua tantummodo admonitione opus sit. Est hoc igitur in omnium ferè hominum opinionibus insitum, ut unus sese quisque ad res gerendas autorem esse idoneum arbitretur: sibiq; persuadeat, si ad rectionem Reipubl. ipse adhibeatur, facile se & magnitudini rerum, & expectationi hominum satisfacere posse. Itaque nemo est ferme tam imbecillo animo tamque abiecto, qui non aliam quam partem prudentiæ, sua sibi ipse opinione arroget

roget: usque eò quidem, ut in genere illo non facile alteri cedat: & si alium uiderit honore atque autoritate in administratione rerum publicarum sibi antecellentem: felicitate quadam, non ingenio, se ab eo putet uinci & superari: qua rursus populari confusioq; existimatione, in idem uidetur fortuna & prudentia conuenire. Ac de prudentia quidem, ut uideris, sic sentiunt omnes: animiq; habitum hunc communem & uulgarem esse putant: hoc est, in communibus quasi principijs naturæ, omnibus hominibus insinuatum & traditum. Sapientiam uerò, cuius est nomen positum in altissimis rebus, quarum rerum cognitio à uulgo est longè semota, cuiusmodi cœli illa, & cœlestium rerum indagatio est: illis attribuerunt, qui in sola mentis atq; animi exercitatione uersati, res in natura abditas, ad quas populus ne aspirat quidem, inuestigare sunt conati. Itaq; sapienti unusquisq; de populo, in facultate illa & cognitione rerum sublimium facile cedit: prudenti, & perito rerum gerendarum haud ita cedit. Quoniam autem ars ista indagandæ, speculandæq; naturæ in suo munere occupata, curam rerum gerendarum non sæpe admodum appetit: suisq; oblectationibus contenta, quas & plurimas semper, & maximas habere solet, in hos populares æstus ambitionum & cupiditatum se ne committit quidem: iccirco & totum sapientiæ studium tanquam inane, atq; iners à Phædro conuictis agitatum est: & priscis item tem-

t

poribus

poribus, sapientes in societate hominum, & rebus publicis inutiles, infructuosiq; sunt existimati. Ex quo & Thales ab anicula, & Socrates ab Atheniensi populo, Crates quoq;, Anaxagoras, Democritus à suis ciuib; iure lusi uidentur. His sic demonstratis, accedamus propius ad declarandam Philosophiæ uim: quæ cum harum duarum rerum præstantium & singularium, sapientiæ, prudentiæq; uidelicet, siue eas facultates quasdam, siue scientias, siue habitus animi præclaros atq; diuinos, uelimus intelligere, notitiam & adeptionem, si se sequi uelimus, daturam nobis polliceatur: diligenter inspicienda ipsa à nobis est, & undiq; excutienda, an quod proficitur, præstare parata sit. In quo sensim tamen nobis & consideratè est progrediendum: ut quoniam excelsum fastigium constituere uolumus, habeant fundamenta soliditatem stabilem. Ac ut, quemadmodum cœpimus, ab insitis in animis nostris notionibus ducamus exordium, quas in nobis penitus hærentes, sed longa forsitan desuetudine obscuratas, aliquantum opus est extergere, & illustrare, quò facilius mentibus nostris illucescant: agnoscimus sic natura comparatū esse, ut omnium rerum, quæ gignuntur, & fiunt, præstantior semper sit usus, quàm cuiusque rei effectio. Exempli causa: Fabrica æraria, quæ lebetes, & cacabos, & labra, uasacq; eiusmodi plurima efficit, cuidam alteri arti deferuiat, & famuletur, opus est, quæ uasis illis utatur: siue ea

ars coquinaria, siue balneatoria sit: atque usque eò quidem deferuiat, ut suum in excudendis illis iudicium ipsa adhibeat nullum: sed tantummodo eius quæ his usura est artis lege ac præscripto moueatur: formam enim ab altera arte & modum efficiēdi accipit: neq; hoc solū, uerū id quoq; euenit, ut si æticeis uasis, ars quæ utatur nulla existat, ne ærariæ quidem fabricæ in natura rerum sit locus: tanta est uis & potentia ipsius usus, non solū ut præcipiat, & imperet efficienti arti: sed in numero etiam rerum ut illa sit, tribuat: quod una in arte demonstratum, ualet idem in cæteras: Etenim si non sit qui maritimis cursibus utatur, quæ sese ars pangendis nauibus addicet? Et si equitandi peritia nulla sit, quis frænorum & ephippiorum fuerit artifex? Denique ut in unum omnia comprehendamus, perspicuè intelligi arbitror: artes efficientes, earum quæ utantur nō solū ancillas existere, sed hoc ipsum omnino, quod sunt, & in natura locum & partē ipsæ habent, ab illis totum obtinere. Hoc similiter & eodem modo in natura tota est, in qua nihil est non ad aliquem actum usumq; creatum: sed est fortasse consilium naturæ in plerisq; obscurius: reuelemus igitur illud quoad potest & proferamus: atque ita, uti planè queat conspici. Etenim si esset aliquid in natura rerum quod nihil ageret, neq; ullum sui exhiberet usum: cū causa fuisset nulla cur gigneretur, ne genitum quidem fuisset: Siquidem nil absq; causa

t 2 aliqua

aliqua gignitur: quocirca esset id omnino nihil. Cur
 quicq; autem gignatur, causa ea est, quæ in fini ex-
 tremoq; generationis, uel gignentî arti, uel naturæ
 ipsi est propofita: Vt si dicamus, baccas arborum
 propter eam causam genitas à natura, uel ut ex illis
 pastus animantibus sit, uel ut arboribus plantisq; ad
 perpetuandam speciem suæ cuiusq; naturæ sit pro-
 gressus: uerè quidem dicamus alterutrum, & utrūq;
 etiam simul: nam & ad propagandū genus cuiusq;
 suum, & ad animantium uitam sustentandā, fruges
 & poma à natura creata sunt: sed hic tamen est finis
 naturæ aliquantò remotior: quod sic intelligi uolu-
 mus, ut naturæ quidem consilium & procreandi ra-
 tio, ad hæc ulteriora extremaq; perueniat: labor au-
 tem & operatio eiusdem non perueniat: ut enim pri-
 mum ad speciē suam quæq; res à natura perducta,
 & naturalem facultatem agendi ex sese, & operandi
 nacta est: tunc conquiescente ibidem naturæ opere,
 sua uī ipsa, & sua spōte deinde cætera molitur: quod
 in feris manifestissimè cernimus: hæ enim catulos
 cūm genuerunt, eosq; nutritu, & multa assiduitate
 confouerunt, usque ad eum terminum, quoad
 illi per sese niti, & sibi conquirere uitæ subsidia pos-
 sint: tum deferunt ac derelinquūt illos, atq; ad alia
 ipsæ sibi naturalia munera conuertuntur. Ex quo
 patet, naturam, cūm in quaq; re speciem illius rei
 propriam finxerit atque insignierit, ad peculiarem
 aliquam agendi facultatem finxisse rem illam &
 genuisse:

genuisse: quæ si nullum sui usum præstaret res aut haberet proprium, uel nulla ipsa specie insignita, nusquam etiam locorum existeret, uel illud frustra retineret insigne. Quid ergo referret, esset ne insignita, nec ne esset: uolo enim per hoc insigne accipi, illud suum cuiusque & singulare, quo differt à cæteris, uimq; & naturam habet sibi unī congruentem: quòd si nullam ad peculiarem actionem natum sit, quid, aut quale sit, ne cogitari quidem potest: Quē admodum de materia intelligimus, illa ultima loquor, in quam & intereunt omnia, quæ dilapsa occidunt, & ex eadem cuncta rursus efficiuntur: hæc enim quòd nulla specie propria insignita est, ne sentitur quidem uspiam esse, nullamq; suā habet actionem propriam: sed tantummodo efficientibus causis parata est, ut ex ea concreseat aliquid, atque gignatur: ubi uerò aliqua iam impressa forma, suum & certum genus in numero rerum accepit, statim ad actiones cōuertitur suæ naturæ proprias: quòd omnis est uis, omnis actio, omnis nitendū aliquid, operandiq; facultas, ex specie cuique rei sua peculiariter insita. Quamobrem, hoc quoque constituto, quicquid creatum & genitum in natura rerum sit, ad aliquem usum esse genitum, usumq; rei semper effectione potiolem existere, ipsumq; in causa esse, cur quæque res & gignatur, & fiat: uideamus dehinc, inter ipsos usus num discrimen aliquod sit, & differētia eiusmodi, ut aliū alio debeat duci præ-

stantior: quod quidem dupliciter necesse est ita esse: nam & rebus uti nobilitate imparibus, ad eandem actionem possumus: ut ad procurationem rei & priuatæ & publicæ, uel liberis hominibus, uel seruis: ad militiam ijs, qui aut stipendia multa meruerunt, aut tyronibus: in quo, non usus, sed res adhibita ad usum, discrimen habet dignitatis & indignitatis: Et sæpe in ipso usu per sese, cum res illa, qua utimur, eadem unaq; sit: ea differentia inest, quod & bene uti & malè eadem re possumus: sed quoniam nihil est neque ab arte, neque à natura ad eos fineis effectum, ut peruersè & præposterè in usum adhibeatur, sed ut aptè & conuenienter: sit, quod paulò antè dicebamus usum rei effectione semper præstantiorem esse, nunc sic nobis interpretatum, ut de laudabili & recto usu dictū intelligamus: hoc est enim id ipsum, quod contendit natura, & in eo uim suam omnem positam agnoscit: ut quodcunque gignitur ab ea, atque fit, id ad exequendum munus sibi congruens sit procreatum, atque factum: Quod si & rei, qua utimur, nobilitas, & usus illius rectus id efficit, ut quæ illo modo aguntur & geruntur, bene, præclarè, sapienter, utiliter dicantur geri: nulla nobis potest esse præstantior actio, neque ad naturam uitamq; accommodatior, quàm nobismetipsis, qui in ordine rerum, summum propè & nobilissimum genus sumus, rectè & commodè & cōuenienter uti: in quo & naturæ nostræ perfectio maxime inest, &

uera

uera uitæ felicitas. Ac nos quidem uocabulis abuti-
 mur, si quid fortè pronuntiamus in rerum natura
 se ipso posse uti, nisi quod ratione præditū sit : nam
 quæ inanimata sunt, nullo modo ipsa se ipsis, sed
 illis alia utuntur: quæ autem uitæ & sensus sunt par-
 ticipia, ut uideantur utentium imaginem quandam
 habere utuntur enim & baccis, & frugibus, & lati-
 bulis, & semetipsis ad conseruationem sui uolucres,
 atque feræ: itemq; in aquis quæ demersa animantia
 sunt, suos rerum sibi congruentium usus habent:
 non tamen usus illiusmodi laudem recipiunt, aut
 uituperationem, propterea quod non à soluto, &
 libero animi iudicio, sed tantum ex instinctu natu-
 ræ proficiscuntur. Qua etiam de causa, eodem sem-
 per propemodum fiunt modo: non enim uisis &
 imaginibus rerum, quæ occurrunt, atque offeruntur,
 resistere bruta possunt: sed permouentur & ces-
 dunt, coq; necessario feruntur, quod appetitus ea
 traxerit. At nos, qui rationis dono diuino atque
 mirabili, à natura ipsa locupletati sumus, non in ap-
 petitu potissimum insistimus, quærentes quid uel
 delectet duntaxat, uel profit, quæ duo nobis cum
 brutis communia sunt: sed sequentes nostræ natu-
 ræ diuinum ducem, ad illa expetenda in primis fe-
 rimur, quæ sunt ipsorum uel præcipua bona Deo-
 rum: ut decus, ut laudem, ut dignitatem, ut amplifi-
 cationem quandam nostrimet, & quasi ex homini-
 bus in Deos conuersionem, potissimum persequa-
 mur

mur: quorum quidem bonorum, neque participes nobiscum ullo pacto belluæ sunt, & nos in his versando ac proficiendo, id certè assequimur, ut perficienda ac perpolienda natura nostra, cognationem nostram cum Dijs arctiorem faciamus. Proprium igitur naturæ nostræ munus tum maximè obimus ac fungimur, cùm ad ea quæ sunt laudabilia & honesta, usum nostrimet adhibemus. Et est hic quidem rectus nostri usus, ad quem sumus facti à natura atque geniti. Sed quoniam ea ipsa ratio, quæ, ut tanti boni consequendi facultatem habeamus, uim nobis præbet: eadem etiam dat menti nostræ libertatem, & consecrandi huius boni, & aspernandi: neque ulla ad alterutrum necessitate nos astringit: ideo ad utram partem nos dederimus, iure nos insequitur laus, aut uituperatio: Quorum neutrum, si ad alienum præscriptum agere omnia nobis esset necesse, ad nos ipsos pertineret: sed eò potius referretur, unde illa nobis inuecta esset necessitas. Quamobrè, ut concludamus: cùm in solis nobis iure possit pronuntiari & asseri, nos esse unos, quibus conueniat nobis uti, quòd soli ex libera uoluntate id agamus: sit autem una quæque res nata ad id agendum, quod ipsi est rectissimum: uel in primis confitendum est, nos ad usum nostri rectum & laudabilem esse natos. Verùm ista laus nō simplex, neque uniformis, sed in duas partes principes distincta: suos deinde unius cuiusque partis & uarios habet gradus: non enim

enim in ijs quæ ratione recta geruntur, pulchrum & conueniens in omnibus idem est : sed plurimum interest , ut semper consilio mouearis & ratione, quos sineis tamen tibi proponas & intueare: finium enim diuersitas, differentiam quoq; actionum facit: in quo illud accuratè est animaduertendū, omnium rerum quæ sint, fiant, atq; gerantur, bonum in fini atque in extremo esse positum : quò cum peruenierit, res quæq; conquiescit. Porro bonum cum dicimus, id uolumus intelligi, quod cuique naturæ potest esse optimum : siue illud splendidis & magnificis uerbis exponendum sit, ut quod pulchrum, decens, honestum : siue commodis & uoluptabilibus, ut salutare, iucundum, utile : sunt enim omnia hæc uocabula cum bono ipso tanta cognatione constricta, ut diuelli non possint. Sed ad nos ut reuertamur : Pulchrum & bonum eorum, quæ recta à nobis ratione geruntur, in fini semper inest. Interest igitur, cuiusmodi sit ipse finis : qui prima, ut dicebamus, diuisione est duplex : quòd aut extra nos, aut in nobis ipsis est situs. Etenim cum quid suscipimus & molimur, si alterius cuiusdam rei extra nos efficiendæ causa id agimus, non in nobis, sed illa ipsa in re quam effecerimus, bonum omne hærebit: si uerò nostra actio nihil spectabit externum, sed in se ipsa conuersa, finem suum & ultimum intus continebit: tunc erimus nos ijsdem qui agimus, totius boni ac decori compotes. Superioris generis artes ferè sunt

omnes, quæ in subiecta aliqua materia, corpore & manu operando uersantur: cuiusmodi statuaría est, & ædificatoria: quarum quidem artium & similiarum cæterarum, facultas omnis & apparatus, non se ipsa finita est, sed ad aliud extra se tendit, & elaborat extremum, in quo suum bonum positum sibi sentit. Quæ uero ex uirtute geruntur, & ex animi quadam moderatione, quoniam se ipsis terminata sunt, suo ipsa, & eo insito fruuntur bono: neque id in alio, quid sit à se diuersum, exponere coguntur. Approbat hoc tacito suo, parum quidem in uulgus notato animaduersorū iudicio, natura ipsa: quæ in templis & ædificiis magnifice structis, simulachrisque affabre factis, facit nos nec opinanteis, oculos mentemque defigere, opusque ipsum intueri: ab eo uero, qui fuerit operis artifex, auertere, atque amouere: quod ratione ea fit, quia bonum artis in opere ipso, tanquam in extremo & fini, non in artifice inest: incredibile autem est, quantopere nos & amore boni natura ardeamus, & aspectu delectemur. Itaque nemo unquam fuit, qui non Iouem Phidiæ multo magis, quam Phidiam ipsum sit admiratus: at ubi actum aliquid est magnanimitate, temperate, prudenter, fortiter, cuiusque hominis talibus actionibus referta uita sit, in quibus præsertim adhibita fuerit constantia: quod non subiti animorum impetus, sed liberum, consideratum, perpetuumque iudicium factis tribuit dignitatem: tunc, quoniam bonum omne in eo ipso

ipſo inhæret, qui ſeſe in his ſæpenumero probauit, concurſus in eo fiunt, & ſpectationes, & admiratio eiufmodi, illa ut dicantur, Hiccinẽ eſt Telamon ille, quem ſpectabant, cuius ob os Graij ora obuertebãt ſua? Themiftocles quidem poſt explicatã maximis è periculis, & ſuo unius conſilio liberatam Græciã, cum ad Olympia acceſſiſſet: ac multitudo, quã ad ludos frequentiſſima conuenerat, dimiſſo certaminum ſpectaculo, ad eum unum intuendum cõuerſa omnis eſſet, maximum tum ſe laborũ ſuorum præmiũ percipere dixit. Et re uera, auerſis etiã nobis, & aliud cogitantibus, tacitè inſinuat ipſa natura, ut eas potiſſimum actiones appetamus, quarum ſplendor & dignitas in autore ipſo permanet: non in alio extrã opere quopiam eſt ſpectanda. Sed quorſum hæc tot & tanta? Nempe huc ut ueniremus, quod iam breuiter compræhendendum eſt: ſummam eſſe hominis præſtantiã ac nobilitatem, rectè ſemetipſo uti, ad eos quidẽ uſus, ex quibus decus, & dignitas, & pulchritudo: non in externa aliqua re, ſed in eo ipſo, qui utitur, hæreat & conſtituta ſit. Hoc ſi aliena lege, præſcriptoq; gereretur, & ad tenendũ uitæ ordinem hunc atq; curſum, ſine errore ullo natura ſola ſufficeret: non eſſet, opinor, cauſa, cur diſciplinam aliquam agendæ uitæ quæreremus: principijs enim naturalibus abũde ſuppeditati, ſuperuacaneis laboribus & curis non implicaremur. Si uerò hoc lumine obſcuro atque occulto, naturæ quidem ipſius inſ-

stinctu, ad magnas quasdam res appetendas agi, &
 stimulari nos sentimus: quæ uerò illæ res & cuius-
 modi, quo uel in loco positæ, & constitutæ sint, pro-
 pter ignorantiam minime sæpe animaduertimus: nos
 hiscæ tanquæ in tenebris errabundis, aliud pro alio fre-
 quenter accipitur: ex quo offensiones, & peccata, &
 præcipites lapsus, scopuli denique uitæ penè innume-
 rabiles existunt. Amabò si qua est ars, aut scientia,
 quæ se nobis caliginem hanc ab oculis erepturam,
 iterque rectam demonstraturam polliceatur, & ad eos fi-
 neis nos deducatur, qui maximè è natura sunt, & in
 quibus summa & absolutio uitæ nostræ contineatur:
 erit ne quisque tam abhorrens ab æquo, & bono, qui
 ad hanc uocem occludere aureis suas, tantique promissi
 magistratui ducere, & præterea exagitare
 contumelias audeat? Atqui hoc promissum, hoc mu-
 nus, hoc officium Philosophiæ est: illaque nobis hanc
 doctrinam pollicetur, ut nobis quæ optimè uti, & dis-
 rigere actiones nostras sine errore ullo possimus.
 Quid ergo est? Nihil ne hoc uobis uidetur: an cæte-
 rorum omnium longè maximū? nam reliquis quidē res
 bus cum utimur, agro, ueste, edibus, equo, mæcipio,
 neque omni tempore illis, & cum eis una nobis quoque
 ipsis utimur: nostri autem usus, cum plurimus ubique
 est, tum nullo unquam uel minimo temporis momen-
 to intermittit: siue enim laboramus, siue requiesci-
 mus, siue rusticamur, siue sumus urbani, siue publi-
 cam agimus rem, siue priuatam, siue cum alijs, siue
 soli

foli nobiscum, siue in ferijs, siue in ludicris sumus: nulla unquam est intercapedo temporis, quin alsis duè, perpetuò, sine intermissione ulla, nobis ipsis utamur: quod, cum in omnem prorsus uitam perma-
 net, atque pertineat, si prauè perperamq; agatur, miseram mehercule & infelicem necesse est à nobis degi uitam: contraq; si bene, ac prudenter, beatam atque felicem. Hoc totum igitur est, quod Philosophia profitetur: daturam se nobis uiam & rationem, qua nobis ipsis quàm rectissimè utamur: quod cum promittit, eadem nobis opera beatam uitam se daturam promittit. Atque hæc est illa una omnis sapientia, quæ nos similes Deorum immortalium, & eorum uitæ æmulatores esse facit: quæ sola constituit beatam uitam atque confirmat, si nobismet ipsi aptè, decorè, commodè semper utamur. Quam quidem ad excellentiã cognitionemq; diuinam, nisi lumen nobis Philosophia præferret, non modò aditum nō inuenire, sed ne uestigio quidem ullo duci ad indagandum possemus: ut sine sensu, sine gustu, sine sapore ullo præstantissimæ uitæ, futuri semper fuerimus, nisi ducem nobis ad uiuendum adhibuissimus Philosophiam. Declarat hoc, & magis quidem quàm uellem, communis hominū uita: quæ uulgò ignara suimet, seseq; in usum quemadmodum adhibere debeat, parum attendēs: in tantis uersatur errorum, & ignorantia tenebris, ut non incredibile modò sit, tantam uim mentis at-

que ingenij, quātam in hominibus natura inferuit,
 cæcamq; , & propè amentem aberrare rationem:
 uerū etiam miserandum. Quotus enim quisque
 est, ex eo genere etiam hominum, Phædre, qui sa-
 pientiæ illius tuæ præceptis instituti, diuitias & po-
 testates sibi potissimum asciscūt: qui cū sibi opti-
 mē consulere credat, dum bonum illud occulto na-
 turæ instinctu appetit, cuius formā & faciem pro-
 pter ignorantiam nesciat, non ruat præceptis in alia
 quod dedecus: eosq; æstus animi, atque angores
 contrahat, qui uitam efficiunt amarissimam? Ne-
 minem nominabo, neq; sanè necesse est: obruimur
 enim exemplorum copīa. Sed certè communis uita
 usque eò ueris bonis, & recta uiuendi regula, ac ra-
 tione orbata est, ut neque in cupiditatibus modum,
 neque in aduersis secundis ue modestiam sciat reti-
 nere. Cuius quidem erroris tam latè diffusi, tamq;
 uniuerſi, correctionē, sola Philosophia pollicetur,
 si qui reperiantur, qui se illi curandos instituēdosq;
 permittant. Sit igitur hæc à nobis, tanquam primis
 ducta lineamentis, simplex adhuc, & inchoata Phi-
 losophiæ descriptio: esse eam scientiam uidelicet,
 semetipso rectè conuenienterq; utendi: atque ita
 utendi, ut totius hominis usum, & uniuerſam in ho-
 mine rationem ipsa complectatur. Nam cæteræ ar-
 tes atque scientiæ, quæ nominatim alicui certo ge-
 neri addictæ præfectæq; sunt, & in eo uno uersan-
 tur, nō sunt hominis propriæ ut homo est, sed talis
 hominis

hominis, puta geometræ, aut statuarij, aut musici. Philosophia autem totum illud ipsum quod est homo, perficit, atque exornat: id porro integrũ quiddam est, & uniuersum, è quo ceu fonte ex amplissimò, deducti riuuli, in singulares deinde, & limitibus certis circumscriptas diuiduntur artes: in quas singulas tantum de homine ingreditur, quantum de ratione, quod multò quidem contractius, angustiusq; est, quàm totus homo, & tota ratio. Quare quæ uniuersam rationem scientia perpolit, ea meritorè ars artium nominanda est, & scientia sciētiarum. Sed quando primam Philosophiæ quasi formam delineauimus, ducendi nunc colores sunt, singulaq; illustranda: & omnes eius pulchritudines, quæ innumerabiles penè sunt, in suo lumine collocandæ. Diximus Philosophiam scientiam esse bene & laudabiliter semetipso utendi: in eoq; munere, si quis id aptè riteq; exequatur, beatam uitam præcipuè contineri diximus. Nunc istud ipsum munus præclarum atque eximium, quibus ab initijs nascatur, intelligi nobis oportet: nempe enim rectum nullius rei usum tenere possumus, nisi prius cognouerimus, quid illa res sit, & quam uim habeat, quasq; ad res agendas à natura sit parata. Itaque primo inceptu, statim ad præceptum illud reuocamur, quod in foribus Delphici templi inscriptum, quia superius ingenio uidebatur esse hominis, uni omnium Deo prudentissimo est attributum: Nos uidelicet
ippos

ipſos ut noſcamus. Et nimirum ſi commodè uti nobis ipſis uolumus, ab hac cognitione proficiſcamur oportet: quî enim poterimus rectum tenere iter, ſi neque naturam noſtram ipſi, nec quæ naturæ conſentanea ſunt, percepta habuerimus? Noſcendi igitur nobis noſmetipſi, & in id curriculum uitæ inducendi, in quod natura ipſa nos immittit. Quæ ſanè noſtrum cognitio, non ab exquisitis & abditis primò rationibus, ſed à communi hominum intelligentia petenda eſt: ſit enim poſteà increbrefcente ſtudio, & progredientibus rationibus, ut noſtri nobis notio in dies reddatur certior. Quæ ex his quidem in præſentia quæ ſunt in promptu, & omnibus patent, explicanda nobis eſt, in conſpectuq; ponenda. Perſpicuum enim eſt, idq; planè extat, treis eſſe in hoc inferiore mundo animantium naturas: quorum partim uiuunt duntaxat, idq; alieno munere, nihil ipſa aſſerentia ex ſeſe, quam ob rem hoc magis, quàm illud ſequi, & appetere uelle uideantur: quam uitam degunt cuncta ea, quæ tenentur ſôlo infixæ, eamq; uegetabilem uitam appellamus. Partim iam ſenſibus prædita, & ſuum aliquod nacta uiuendi iudicium, uim habent à natura inſitam diſcernendi quodcunque oblatum illis fuerit: idq; uel appetendi, uel aſpernandi, uel inſequendi, uel fugiendi. Tertium porro genus & reliquum eſt, quod cum ambo iſta contineat in ſeſe, ut & uiuat, & ſentiat: habet præterea præpoſitam hiſce omnibus,
& an

& antecellentem honore, atque imperio, rationem, supra quam nullus iam est ullo ex genere uitam hîc degentium, nobilitatis ascensus. Atque hæc tria simul copulauit in genere humano, intexuitq; natura. Sed duo hîc animaduertenda sunt, unum quod patet ex se, manifestumq; est, in his tribus scilicet naturæ quasi generibus, quod maximè necessariū ad uitam sit, id cæterorum esse indignissimum, maximeq; ignobile: quod iam cum superioribus nostris sermonibus congruit, quibus dignitatem à necessitate nunquam non segregatam esse diximus: & reuera seruum semper est natura id, quod obnoxium necessitati est: liberum enim ius suum nullum id habet, sed ad alienum imperium præstò est semper, nec ullo dignitatis suæ honore censetur: hoc itaq; unum non tam nunc quidem positum à nobis est, quàm à natura omnibus propositum, animam illam quæ uitæ soli sit attributa atq; addicta, quam uegetabilem appellamus, in toto animali genere longè subiectissimam atq; ignobilissimam esse, infimumq; eam locum obtinere. Alterum uerò duorum, quæ diximus, diligentius aliquanto nobis est attendendum: omnem uidelicet naturam, quæ non solitaria simplex uel sit, sed ex pluribus quasi rebus conflata consistat, genus habere suum, propriamq; generis appellationem, ex illa parte sui, quæ in quaq; re eius modi princeps sit: quòd in coniunctione plurium, uni semper naturæ traditus principatus est. Quod

cum ita sit, & in nobis longè dominetur ratio, principatumq; ipsa teneat: quicquid sumus ipsi, totum id accipimus & possidemus è ratione, ut sit ratio illud ipsum planè, quodcunque est homo: Sequitur deinceps, ut distinguamus quæ harum partium cuiusq; uis, quæq; facultas sit, seorsum primum & per se, deinde in iugatione cum alijs partibus copulatuq; exposita: Etenim aliud est, quod unaquæq; animæ pars per se singulariter agere nata est: aliud, quod in aliarum partium comitatu & coniunctione: quod naturæ simplicis, simplex est actio: conflata, mixtaq; coniuncta. Sed de mixtis mox: nunc simplicia illa munia, atque officia singularum animæ partium uideamus. Ac illius primum quæ sine cura ulla nostra, sine rectione uiuit in nobis ac uiuet, quam uegetabilem animam nominamus: ea enim est qua alimur, & sustentamur, & extenuamur, & augetur, accipimusq; habitum hunc, & figuram corporis quæ in nobis est, & fingimur carnibus, ossibus, neruis, cute, sanguine, & ad gignendum quod in eodem genere simile nobis sit, naturâ proni sumus: cui sunt animæ quædam membra attributa, quæ sine nutu nostro, & confidant, & excitentur, cæq; est una fundamentum & stabilitas animarum reliquarum: quæ nisi adesset, neque sensus in nobis, neque ratio esse posset: & tamen ipsa ita est necessaria, ut sit reliquarum longè infima. Atque hæc huius animæ pertinet potestas. Illa uerò

uerò sentiens, quæ aliquo iam cognoscendi iudicio prædita est, uim habet sibi peculiarem uidendi, audiendi, tangendi, olfaciendi, gustandi: atque inter hæc sensilia differentias notandi, contrariarumque in suo cuiusque sensili genere distinguendi; necnon rerum motus, figuras, magnitudinesque percipiendi, oculis quidem & aspectu quàm maxime, sed cæteris quoque sensibus nonnihil. Eiusdem est animæ officium, ea quæ sensibus semel comprehensa sunt, etiam postea quàm illa abierint è conspectu, interiore nihilominus animi facultate quadam, imaginibus repræsentare, & tanquam in thesauro in memoria recondere, aliquantumque ibidem temporis spatium custodire: quòd illis formis & imaginibus, ad inquirendum maximè aliquid, & ad declinandum, animalia moueantur. Tertia est ratio peculiaris generis nostri, quæ nullo alio in genere animantium cernitur: per quam nos omnibus mundanis rebus præfecti sumus, cuius munus proprium & primaria facultas est, intueri quidem illud primò, & per se, quod semper idem est, atque eodem modo se habens, quod necessariò immortale est, atque diuinum, in eoque tanquam in familiari & cognato genere uersari, ueritatisque ibidem pasci cibo, suauiore multo, quàm ambrosiæ & nectaris. Quando quidem in eis solis, quæ sibi perpetuò constant, & usquequaque immutabilia sunt, habitat ipsa ueritas, eadem in fluxis & continenter labentibus, tanquam

simulachris, & similitudinibus illuditur. Sed si ad
 hæc quoque, quæ non uniusmodi semper sunt,
 ipsam conuerti rationem oporteat, in ijs eius sit of-
 ficiū præscribere, ordinare, dirigere, imperare:
 quod huius naturæ præcellentis ac diuinæ solius
 est imperandi, & præcipiendi potestas. His sin-
 gulatim de unaquaque partium animæ à nobis sic
 expositis, ueniendum deinceps est ad functiones
 eas, quæ ex partium coniunctione inter se, copu-
 laturque existunt: quarum medijsfidijs incredi-
 bilis est multitudo: nec numero ea solum, sed mo-
 dis etiam, & conditionibus, multiformis, ac uaria.
 Sed nos genera duntaxat ipsa perstringemus: ad
 minutissimas partes explicandas non accedemus.
 Ex parte igitur sentiente, & uegetante, ambarum
 que inter se iugatione, atque complexu, primum
 cura & studium custodiendæ salutis, deinde uo-
 luptas, molestiaq; exoritur. De ea uoluptate nunc
 loquor, quæ maximè sentitur in ipsa coniunctio-
 ne molestiæ: ut sitientis est ideo cum uoluptate bi-
 bere, quia cum molestia sitiat: cuius quidem moles-
 tiæ ea est uis, ut cum primum desierit sitis, simul
 item desinat bibendi delectatio: hoc genus uolupta-
 tis (nam est aliud quoddam purius, atq; præstātius,
 quod nulla omnino admixtum molestia est, de quo
 alio loco fiet mentio) hoc inquā mixtæ uoluptatis ge-
 nus, quod etiā uehementius uideri solet, propter ap-
 positionē, adiunctionēq; cōtrarij. Dicimus ex hac co-
 pulatione

pulatione sensibilis, & uegetabilis animæ primò nasci, ut in ipsa quidē uegetabili situm, fundatūq; sit, à sentiente autem percipiatur, & iudicetur. Verūm habet id terminatas in animantibus cæteris uarietates: in homine uerò si rationalis anima huic curæ se submiserit, & ad sectandas huiusmodi uoluptates sit conuersa, crebrius idem multò & multiplicius factum, innumerabiles illas gignit cupiditates, quas uolitare in anima ipsa passimq; discurrere ac tumultuari sentimus. Hinc iræ, hinc reconciliationes in gratiam, hinc amores, hinc odia, hinc libidines, hinc ambitus, hinc suspensiones, obtreccionescq; hinc alacritates, consternationescq; animorum, & quæ quasi capita omnium huiusmodi perturbationum sunt, spes, metus, letitiæ, dolores. Sed nos his breuiter percursis, ad illam alterā complexionem, temperationemq; rationalis animæ cum reliquis duabus naturis, accedamus. Ex qua quidem copulatione non pauciores profectò q̃ ex cæteris effectus proueniunt: etsi ex alieno hi tamē sunt genere. Nanque ipsa ratio, quæ si pura sit per se, atque simplex, in eo, quod idem semper est, cōtemplando, perpetuò inhæreat: neq; sponte se usquā à diuina illa disjungat ueritate: indidem huc euocata, atque huic corpori nodo inextricabili, quoad in his fuerit locis, adstricta, comitatu importuno sensuum & cupiditatum, desciscat à semetipsa necesse est: & ad hæc infirma, instabiliaq; considerata torquea-

tur : quorum primo obtutu tanquam caligine oes cæcata atque conniuens, ut quæ ex illo illustri æternæ ueritatis loco, in tenebras repente uenerit, ad uocare sibi cogitur communes quasi administratos & suos, & sensuum, per quos item cōmune opus cum illis unà peragat, atque exequatur, fidem, opinionem, consilium, cogitationem : quorum fides quidem, mentis animicq; est assensio, assertioni credentis, quæ sine ratione quippiam confirmet : opinio autem intus concepta existimatio est, non sine ratione quidem, sed tamen infirma ratione subnixæ : quæ rem aliquam arbitratur aut esse, aut non esse, aut huiusmodi eam, aut alio modo existere. Ac in his duobus ratio consistit tamen, & requieta est, quod eo est contenta, quod quoquo modo sibi fuerit oblatum : in illo autem altero pari, consilio, cogitationeq; iactatur adhuc, positacq; est in motu : necdum eò peruectæ, quod affectat & tendit : est enim cōsiliū, quasi itineris & uia inuestigatio quædam, conquisitioq; adiumentorum, quibus id queamus, quod designauimus consequi : cogitatio uerò eiusdem ferme modi est indagatio : uerū non ea efficiendi quidem quippiam, sed tantū intelligendi causa suscepta. Hactenus informata nobis sit, & tanquā leui ducta penicillo agnitio nostrimet : quæ etsi propria Philosophiæ consideratio est, non maxima tamen uidetur indigere admonitione ad spectandum & percipiēdum. Nunc hoc rationale animal

mal, quod uocatur homo, tribus ex naturis cohærens, atque conflatum: quod fungi debeat actiones, & singularum naturarum proprias, & omnium cōmunes: fungicq; ratione, & ordine, si uitam eam uelit degere, quæ felix & beata sit: tradamus Philosophiæ instituendum, ac poliendum: ut uideamus si dictis eius atque promissis, facta etiam consentiant. Quid promittit illa autem? nempe scientiam se, & facultatem homini præbituram, qua is semetipso commodè uti, & ad omnia rectè exhibere se possit. Atqui nihil omnium rerum melius, neque præstabilius profectò est: neque ego solus hoc dico, sed tu quoque Phædre, & quicunque educti liberalius sunt: nemoq; potius omnium mortalium tam abiectò animo, tamq; infima & sordida conditione uitæ est, quin si diligentius consulat semetipsum, & cogitationes suas expendat, hanc huiusmodi scientiam omnibus anteponat opibus, atque fortunis: quippe qui ex ea se affecuturum omnia optata sua confidat, & ad suorum uotorum summam perueniturum. Veniat igitur in medium promissum hoc magnificum, & graue, ut excutiatur à nobis, & consideretur, in quo sic primum ordietur Philosophia. Etenim fingamus sisti illi à nobis & commendari, ac de manu in manum (ut aiunt) tradi hunc eum ipsum, quem cupimus huius tam eximiæ facultatis, & præclari suimet usus fieri compotem: illa enim, credo, ut primum aspexerit adolescētem, nostrosq; sermones

sermone audierit, hac initio statim oratione utetur: Equidem præstabo (inquit) quod pollicita sum, uiamq; bene & beatè uiuendi sine ullo errore tradam: sed opus est animo non repugnante: quam hoc fortasse non satis sit: ingenium adsit oportet, & ueluti oculi in corpore, sic in mente luminis acies, ad intuendam formam ueræ pulchritudinis à natura parata: quam postea ego quocunque fuerit opus, meo arbitratu dirigam, atque cōuertam. Sed quod dixi de non repugnantia, ob eam causam dixi, quòd ferè ad me qui accedunt, afferunt prauas secum è uulgo opiniones, quas nulla nostra ratio potest euellere: aut enim in aliqua populari sententia statuti atque firmati, uelut expetendas præcipuè esse opes, honores ambiendos, uoluptatem sequendam, ad omnem deinde uocem ueritatis obfudescunt: aut etiam si rationi se præbeant dociles, uno aliquo uitio, nonnunquam etiam pluribus contaminati atque imbuti, permulta secus faciunt, quam uera illis dicet, ac præcipiat ratio: Ex quo neq; illis magna ex me utilitas, & mihi grauis ex ipsis calūnia conflatur. Videor enim postea ob hanc præcipuè causam, sapientiam tradere, non rerum, sed uerborum: quod tamen secus est: mea enim disciplinæ institutio, ad res potissimum, & ad facta ipsa spectat: formatrix autem orationis hætenus quoque sum, ut sine fūco & fallacijs, cum optimis eam moribus, & cum præclaris animi cogitationibus uelim con-

gruere

gruere. Quòd si tu (ita enim prosequetur ad adoleſcentem conuerſa) ita ad nos paratus uenis, ut te nobis totum ſis permiſſurus, eiſcias è te ipſo oportet omnem opinionem alienam conſtantis & firmæ rationis: animumq; tuum mihi purum & purgatum præbeas, quo poſſim ego in eo diuinam illam ſpeciem, quæ à me una fingitur, atque exprimitur magnanimi uiri & uerè præſtantis inſcribere. Quid reſpōdebit adoleſcēs? primum pudore credo deſiciet oculos: poſt nouis quibuſdam ardoris ſtimulis, ad ſpem magnarum rerum intrinſecus excitatus, quod de Alcibiade ſcriptum reliquit Plato, ſiens ſeſe & ſalutem ſuam Philoſophiæ commendabit. Sequetur itaq; primā illam noſtrimet, quam diximus, cognitionem, altera præceptio: ut conſideremus attentèq; intueamur, cū trium illarum partium, ex quibus cōſtituti ſumus, ſingularum proprij & ſui fines ſint, in queis cuiuſq; earum ſit poſitum bonum: nos ex naturis illis omnibus in unam rem cōflatos, non poſſe unius tantum partis extremo & finī cōtentos eſſe: ſed quemadmodum treis animæ habitus & facultates obtinemus, ita tria nobis habere propoſita bona, quorum ſingula partibus ſingulis, coniunctè autem omnia uniuerſitati ipſi conueniant. Perſequamur enim uero quod cuiuſq; partis extremum, atque idem bonum ſit: quò melius deinceps queamus iugum illud, & uinculum totius communionis aſpicere. Illi igitur parti & animæ inferiori ac igno-

y biliori,

biliori, per quam sustentamur, & alimur, ceu finis,
 & ultimum incolumitas proposita est, quæ eadem
 salus & uita est intelligenda, genusq; illud boni,
 quod utile appellatur, in hoc genere animæ præci-
 puè est fundatum: utile enim potissimum id uoca-
 mus, quod ad salutem & incolumitatem uel dan-
 dam, uel conseruandam, uel restituendam etiam
 pertinet, quod inter reliqua bona maximè necessa-
 rium est: etenim est cæterorum tanquam solum, fun-
 damentumq; bonorum, quo subducto, atq; subla-
 to, reliqua non uideantur bona uspiam posse con-
 sistere. Atque huius quidem etiam boni participia
 illa sunt, quæ omni carent sensu: ut stirpes, arbo-
 resq;, & cætera eiusdem modi, quorum est natura in
 toto animanti genere longè subiectior: nihilq; in se
 continens, nisi quod necessitatis sit: ideoq; honore
 nullo, nec nobilitate prædita. Altera est natura iam
 sentiens, uimq; & facultatem habens huiusmodi in-
 sitam, ut affici quodāmodo rerum appulsionibus,
 idq; ipsa sentire, ac propterea moueri ad appeten-
 dum, uel ad aspernandum, possit: cuius finis & pro-
 prium bonum intelligitur uoluptas: certè enim nisi
 aliud quid præsit, quod moderetur, & corrigat, sem-
 per ut ad suum summum, summeq; expetitur bo-
 num, sensus ad perfruendā rapiuntur uoluptatem.
 Tertium porrò animæ genus, quod rationis parti-
 ceps, uel ea ipsa potius est ratio, cœleste atque diuin-
 num: cuius præ nobilitate ac præstantia, reliqua ge-
 nera

nera aut nullius quodammodo, aut certè ita parui
sint momenti, ut ne comparanda quidem sint: finem
suum & ultimum propositum sibi habet, si ipsum
per se solum spectes, scientiam & ueritatem: si cum
reliquis coniunctum, decus atque honestatem. Est
enim honestas, quam eandem dignitatem, decentiã,
amplitudinemq; appellare iure possumus: si acutè
inspiciamus, nil aliud profectò, quàm ueritas, cum
reliquis aliarum partium finibus, utilitate uidelicet,
uoluptateq; coniuncta. Vt enim luminis natura can-
dens ipsa per sese, & suo quodam splendore lucida,
si illustrãdis rebus admisceatur, colores eos excitat,
qui uarietate & pulchritudine decentes sunt: Sic uer-
ritas adiuncta hominũ studijs & affectionibus, cum
in agendo, regendo, comunicãdoq; expromitur,
illam in primis gignit, quam ingenuæ mentes tan-
topere mirantur, conuenientiam rerum omnium, &
dignitatem. Atq; his tribus finibus proprijs trium
partium iam cognitis, in quorum unoquoq; suum
cuiq; parti bonum est: uideamus nunc totum hoc
complexum, & copulatum, quod est homo, quos
ad fineis à natura directum sit, & quam uitam age-
re debeat, quoq; modo semetipsum in usum sui ad-
hibere, si ad extremum & ultimum suæ naturæ bo-
num sit peruenturum. Atq; horum quidem trium,
primum illud Philosophia duntaxat docet: reliqua
autem duo prætereà etiam tradit. Quid est autem
quod doceat? Nempe sicut nos coniuncti, & tempe-

rati ex tribus naturis sumus, sic tria illa bona in unū miscenda nobis esse, & capienda, si beatam, & expletam suis omnibus numeris uitam uelimus confesqui. Quid ais Zeno? Quid nouas uerborum con-technationes implicas, quibus nos captare, & illaqueare coneris? Bonum esse quod honestum sit: Assentior, & ex præstantissimo quidem genere confiteor esse bonum: At id solum bonū, prorsus nego: nisi aut unicum tantūmodo bonorum genus in natura rerum sit: quod cuiusquam quæso queat probari: cum omnibus rebus natura & specie inter se plurimum differētibus, suum cuique earum in fini atque extremo sit positum bonum, quod esse idem diuersorū non possit: & ni ita sit, frustra pleraque creata à natura, & nullos ad fineis effecta intelligantur. Aut si alia quoque bonorū genera sint, quoniam de hominis bono nominatim nūc quærimus, ex unica natura nos, hoc est, mente duntaxat & ratione, oporteat esse factos. Atqui alias prætereà naturas in nobis obtinemus: Vbi ergo repētē deserimus illarū bonū: quod si assequi possimus, intelligamus id certē ad aliquā partē nostri pertinere: Nisi fortē reliquarū partium bona stare, atque cōiungi cum rationis bono nō possunt: quod usque eò falsum est, ut in illis præcipue sibi accommodandis, & concordibus secum faciēdis, enitescat & elaboret nostra ratio. Sumus ergo ad ista tria bona & appetēda, & cōsequenda à natura facti: quorum quidē cōmunio bonorū, in ipsa partiū nostrarum

strarum coniunctione spectatur. Sic enim debemus exquirere, & consecrari singula, ut ad communitaltem tamen omnia referamus: atque hic illud peruidendum est, usque eò congruere tria hæc inter se bona, & uelut conflata esse, ut quāquam unum quodque illorum suo & proprio genere censeatur, societatem tamen cum reliquis generibus, & naturalem quandam intelligatur habere cognationem: nam & quod utile cui est, id suapte etiam natura conueniēs illi est, ac iucundum: & honestas suam utilitatem ac iucunditatem secum adiunctam habet: & cum uoluptate, quæ è natura sit, sua est utilitas, conuenientiaq; coniuncta. In quo perspicuè natura contra Stoicorum rationē decernit, illud uerè perfectum, & cumulatam hominis bonum esse, quod sit ex his tribus in unum quasi temperatum, atque mixtum. Sed nos cum suos cuiusq; naturæ fineis appellauimus, illis nominibus singulos indicauimus, quæ præcipuam, & principem in una quaque natura rationem boni declararent, ad quam cætera adiuncta bona pro accessionibus ducerentur: quemadmodum in sequentibus fiet manifestum. Etenim notatis iam, & constitutis finibus ad quos hominis uita, naturaq; contendit, aperiendus dehinc est communis penè cunctorum hominum error: quos ignaros, quatenus quicquam cōueniat, illamq; partium in nobis consensionem uiolantes & distrahentes, stultitia in uita, quasi furia quædam, incitat, atque

perturbat: ut neque placati sibi ipsi, neque cum cæ-
 teris concordēs esse possint: quos cum ab hoc tanto
 malo se abducturam Philosophia polliceatur, & in
 possessionem summi boni inducturam, perspicia-
 mus, quæso prius aliquantum magnitudinē mali;
 ut quantum deinde illi beneficium debeatur à no-
 bis, melius agnoscamus. Etenim si quisquam est, cui
 hæc tanta communis uitæ confusio curam aliquam
 injiciat noscendi, & contemplandi, unde illa & qui-
 bus quasi radicibus exorta, quotidie magis frutice-
 tur, & ingrauescat: is reperiet primū ignoratio-
 nem sui in uno quoque, deinde prauum ulum, qui
 nec rectus esse ignoranti semetipsum potest, hanc
 tantam errorū syluam profudisse, per quam exclus-
 sa luce ueritatis, totum ferme uitæ iter nobis impe-
 ditum atque cæcum factum est. Nam aut fines eos,
 ad quos natura generati sunt, nequaquam homi-
 nes mente, & intelligentia compræhendētes, ferun-
 tur fortuito, & temere: & ut ad unum aliquod stu-
 dium, quasi fluctu, delati sunt, ita inhereſcunt in eo,
 ceteraq; nosse & uestigare contemnunt: ex quo sta-
 tim diuellitur in nobis naturæ illa consensio, ma-
 iorq; pars nostri neglecta à nobis inaccurataq; re-
 linquitur: Aut qui plureis fineis tenere constituunt,
 ignari quid postulet illorum unusquisque, & quan-
 tum cuique tribuendum sit: inepta & dispari com-
 positione, non illos conciliant inter se, sed commit-
 tunt: ex quo seditiones graues, & prælia in animis
intus

intus excitari necesse est. Ac ut rem exemplis notior
rem faciamus, diximus utilitatem, uoluptatem, di-
gnitatem, humanorum esse desideriorum ultima,
copulata ipsa inter sese, quando & nos conflati ex
triplici natura sumus: ut cuique naturæ suum ultis-
mum sit, non illud quidem adiunctum omnino, &
separatum à cæteris, sed proprium tamen cuiusq;
atque præcipuum. Quid ergo? Non ne cernimus
ex hominum numero nonnullos, qui cum utilita-
tem nimis adamauerint, quod ad eam sunt, aut con-
suetudine diuturna, aut propinquorum imitatione
atque exemplo, aut æqualium hortationibus adduc-
ti, paruam uoluptatis eius quæ alieno ex genere sit,
nullam omnino dignitatis ducunt rationem: sed
ambo hæc genera reliqua in una sibi utilitate con-
stituentes, uni illi seruiunt uitæ, quæ animantibus
quoque reliquis & stirpibus communis est: cuius
fundamentum, & stabilitas in parte animæ igno-
bilissima consistit: reliquas uero naturæ partes, des-
serunt, atque despiciunt. Itaque rei faciundæ maxis-
mè addicti, & mancipati, nullum sordidum, neque
turpem iudicant quæstum, unde ad uitam utilitas
aliqua perueniat: ex quo infinita in illis quotidie ma-
gis pecuniæ cupiditas adnascitur. Atque hi sunt, qui
solliciti semper, & anxij, minutatim, & paucillatim
omnia expendentes, nati esse uidentur ad omne per-
ferendum dedecus: litigiosi, difficiles, scrupulosi: qui
ne irrisi quidem, & ludibrio habiti, animaduertere
possunt

possunt, quàm misera conditione uiuant: tantumq̃
 illud pertimescunt, ne quid ab ijs petatur, aut aufe-
 ratur: itaque & fugiunt bonorum cœtus, & à cons-
 uetudinibus hominum abstinent: nec audent quic-
 quam facere, aut dicere unquam fortiter. Hos tu ho-
 mines esse statuas, infimæ illi uitæ, & ignobilissimo
 generi bonorum addictos: ac tanquam spongas las-
 pidi, sic ipsos auro affixos, & pecuniæ? His è regio-
 ne alij, nulla neque uitæ, neque utilitatis habita-
 ratione, ad uoluptatem unam toti sunt delati: in eaq̃
 exquirenda undique ac perfruenda, summam sibi
 uitæ constituunt: cuius quidem uoluptatis, eius ni-
 mirum quæ populo & nota, & nominata est uolus-
 ptas, regnum in parte naturæ sentiente cōstitutum
 est: nam neque uoluptas est, nisi sentiatur, sensusq̃
 perfundantur, & deliquescant ex ea: Et memoria
 præteritorum, expectatioq̃ futurorum, quæ ambo
 in solis sentientibus sunt, productas tempore & spa-
 tio, facit sentiri uoluptates: quas sola instantis bre-
 uitas temporis inanimaduersas, & imperceptas trā-
 sire cogeret. Ergo ad uoluptatem qui sunt omni stu-
 dio conuersi, cum genus eius nullum repudient, nec
 prætermittant: in eo tamen genere plurimum adhæ-
 rescunt, quod ex sentiente ac uegetante anima con-
 iunctum est: quando id quidem omnium est acerrim-
 um, & ad concutiendum totum hominem maxime
 uehemens: est autem id positum in eo, ut cum
 pars illa uitalis & uegetabilis, quæ cæterarum par-
 tium

tium rudis & corporea maximè est, defectionem naturæ suæ, & maiorem aliquem discessum à temperamento patitur, in quo molestia iam inest, & quasi naturæ tristitia quædam non mediocris: si subleuetur, ad naturamq; restituatur, incredibili quadam uideatur sibi perfrui suauitate: quòd ut in comparatione nigri color albus, sic in adiunctione molestiæ uoluptas acrior sensibus nostris appareat. Atq; hæc huiusmodi in primis plebeia & sordida sunt uoluptates, quæ ab hominibus nequam, atq; ignauis potissimum expetuntur: quarum uim conditionemq; cunctarum, in una si placet specie, eademq; notissima, parumper consideremus. Est enim morbus uulgaris sanè, & omnibus notus, quem psoan Græci uocant, nos uertimus scabiem: cum sanguis intus biliosus & acescens, sparsim è cute conatur erumpere: & quacumq; funditur, propter acumen, stimulis pungit, inficitq; corpus, & inficiendo pruritus acris ciet, qui sunt quasi fermenta quædam & nuncij appropinquantis doloris. Huic malo, & molestiæ subuenimus scalpione, atque unguibus, uel asperæ rei alicuius fricatione, & attritu. Ponite uobis nunc ante oculos formam atq; imaginem huius prurientis: uidetis ne ut miserè ipse se exerceat, mixtamq; ex uoluptate, & ex molestia, indignantis simul & lætantis, exhibeat faciem? cumq; intrare eò digitis planè non possit, ubi maxime fodicat, & stigmatulatur uis morbi, quemadmodum cutem suam dis-

z laceret,

laceret, uocibusq; inconcinnis obganniat, anhelitus efflet graues, & mirandum in modum corpus, uultum, membrâq; iactet, atque distorqueat? qualem hunc, quæso, & quo ex genere hominem esse statueris? Atqui talis ferè est, attentè si inspexeritis, uniuersa eorum uita, qui se potissimùm dicant, & dedunt corporis uoluptatibus: alij enim in epulis, & ebrietatibus hoc idem efficiunt: alij in congressionibus corporum, turpitudineq; libidinum: nonnulli etiâ sitim medicamentis colligunt, ut sit potandi maior quædam iucunditas: plures sine fame & siti, & sine uehementi aliqua cupiditate, sola recordatione suauitatis adducti, uino, gulæ, libidineq; inersuiunt: qui semet etiam inuitant ipsi, excitantq; languentis: nihilq; prorsus præterire earum rerum uolunt, quas aliquando nouerint afferre delectationem solitas. Quod quidem proprium & præcipuû falsæ atque corruptæ in nobis rationis malum est: idemq; non necessariâs suscitans cupiditates: Nam cætera animantia quoquo pacto se gerant, cum contrarijs molestijs ad appetendas illiusmodi uoluptates compulsa sunt, naturæ tamen plerumq; finibus continetur. Homo solus corporis uoluptatem, non necessitate (nam ea quidē faceret sibi ipsa modum) sed ratiocinatione falsa demetiens, in eiusmodi genere cupiditatū, insatiabilis prorsus, & infinitus efficitur. Atq; horum duorum generum quæ memorauimus, auari illius dico, huiusq; uoluptarij, tanta est à

est à ratione recta animi & uoluntatis auersio, ut nulla bestia sit, quàm utrunq; est istorum, aduersus uocem ueritatis agrestior : nam neque castigatores ullos hi perferunt, & rectè suadentibus semper sunt inimici; ipsi uerò ultro eludunt etiam cæteros, suaq; cuiq; alibi studia, quàm in corporis uoluptatibus collocanda esse negant, propterea quia quicquid non manu & corpore teneatur, inane id totum, & superuacaneum iudicant esse. Sunt alij, nimis cupidi illi quidem, & studiosi uoluptatum, sed tamen in eo uisio aliquanto leniores, qui uoluptates potissimum eas consecretantur, quæ sensuum propriæ sunt : nec ita magnam habent cum illa corporea parte contractam rationem, ut qui musicis & cantibus assidue dediti, personare aures suas uocum, & fidium, & tiliarum cantu semper uolunt : aut qui oculis rapiuntur in omnem cupiditatem, ut signorum, tabularum pictarum, argenti uestisq; stragulae, gemmarum quoque & margaritarum studio propè infinito ducantur, domos autem suas ita refertas habeant atque exornatas, ut nil festiuius, neque concinnius ne cogitari quidem possit. Sunt etiam qui odoribus præter modum delectentur, & eorum innumerabilem undique conquirant uarietatem. In quæis tribus sensuum uoluptarijs generibus, luxuria præcipuè ea inest, quæ etsi libero homine putatur esse dignior, frangendis tamen & uiri, & uirtutis neruis, uim permagnam habet. Restat ut de ge-

nere illo tertio & præcellente dicamus, quod si peculiari suo solum munere fungatur, & in una contemplatione ueritatis positum ad reliquas partes aspectum nullum referat: homines efficiet squallenteis & mæstos, nil ferè habentes cum humanitate commercij: & ad omnia quæ occurrerint quasi obstupescientes. Sin autem cum sensibus sociatū atq; iunctum, illis ut ministret, & subseruiat, adductum fuerit: eò maximè adnitetur, ut popularem gloriam, & potentiam in primis assequatur: uimq; aliquam uehementiorē nactum, urbes, populos, regna sæpenumero euerteret. Sin autem animo fuerit infirmiore, & tenuioribus opibus, ad illa cōuertetur, ut nimio uersitu cultuq; corporis, aut alio quodā ostentationis artificio, cogat se spectari. Sed quid ago? sanus nescium, qui tantam errorum molem, quantam omnis uita fert, euoluere me posse atq; explicare sim ratus?

Hic CITRARIUS, Imò fecisti tu planè operæpretium, inquit, qui ista nobis ante oculos adduxisti, ex quibus faciliè deinde sit ad reliqua coniectura accedere: Video enim iam planè, & cum animo meo cogitans intueor: non hos solum, qui in unius partis finis præcipuè insistant, sed istos etiā qui cunctarum fines partium, atq; extrema cōsectantur, nisi apto cōmensu quodam, & bene examinata ratione id faciant, inæqualem eos, & confragosam uitam ducere, conficiq; semper solitudinibus & molestijs: ut non minutissimis corpusculis Democritiū inane, quàm

quàm huiusmodi dissidijs & conflictationibus animorum, refertior uita sit : quibus quidem rebus lumen afferri, atque ordinem, præclarissimam rem esse, intelligere mihi uideor: si tamen hoc præstari à Philosophia ipsa possit. ATQVI, inquam, pollicetur illa hoc quidem : Sed illud quoque, Citrari, intelligere te puto, ordinem istum, atque lumen, de quo narras, sine cognitione certa earum rerum, ad quas adhibitori nosmetipsos sumus, haberi planè non posse. QVID NI intelligam? inquit: an quisquam rerum earum, quas minimè nouit, prudens director esse potest? QVID SI, inquam, homo eiusmodi est, ut si se totum præstaturus sit, cuius rei disciplinam, ut antea diximus, Philosophia profitetur, omnia illa intelligat, & noscat necesse est: quibus cum, commercio, aut usu, aut cognatione aliqua est implicatus, num tibi uidebitur quicquam in rerum natura penè esse, quod non illi cognitum, & perceptum esse debeat? VIX uideor hoc posse inficiari, inquit. ATQVI confiteare hoc quidem necesse est: omnia enim prorsus illi noscenda, & compræhendenda sunt: uerûtamen modo quodam singulari atque suo: Est enim duplex rerum cognitio: Altera, quæ in partibus explicat se, atque dispersit: Altera, quæ in genere summo, atque uniuerso est collecta. Primam illam artes & opificia, & circumscriptæ terminis, limitibusq; scientiæ: secundam uerò cognitionem Philosophia sola comple-

z 3 cluitur

ctitur : atque ut dicebamus , talem præstare hominem, aut talem, huius esse, uel illius artis : ipsum autem hominem præstare quicquid ipse est, proprium esse Philosophiæ. Item dicimus nunc in cognitione talem esse rem, aut tantam, aut huiusmodi ad scientias artesque peculiare : id autem ipsum simpliciter, quod res quæque est, ad Philosophiam unam ut cognoscat, pertinere. Quid est ergo quod uehementius homines in errorem inducat & fraudem, quam inferioribus niti notionibus, superiores autem illas & primas non tenere? Vt puta, diuitias sibi bonum arbitrari, cum quid bonum sit, & quæ sit eius rei uis ac natura, in uniuersum non intelligatur. In quo quidem uno principe bono atque summo, eiusque cognitione & scientia, omnium deinde bonorum, quæ ex illo effluunt, posita & collocata est ueritas. An tu alium fontem bonorum ullum & noscendorum & tenendorum existimas esse, quam ueritatem? Veritas est lumen illud atque ordo, quem modò adhiberi rebus aiebas oportere. Quod cum animi oculis cognitione, intelligentiisque comprehendit, idque & actionibus suis proponere, & præferre sibi ipse coeperit : tum tutò uestigia ponere, tum uanos illos terrores, inanesque blanditias falsarum opinionum, quæ totam improuidam uitam perturbant, depræhendere, atque discutere, & se in arce ueri boni poterit constituere. Veritas enim est, quæ instruit nos & docet, quid quæque res, quantiisque sit, & quantum eadem

eadem nobis conferat ad uiuendum. Veritas est, quæ nos nostrimet gnaros & prudentes esse facit: nec solum primam illam & inchoatam, quam supra diximus, sed absolutam, & integram nobis dat nostrum cognitionem. Veritas, cum res nobiscum, nosq; cum ipsis rebus comparat, atque componit, modum ipsa una & dimensum illum tradit, per quæ res nobis, nosquemet rebus ipsis ita applicamus, & adiungimus, ut neque obruamur nimia copia earum, neque remaneamus ipsi uspiam inanes. Quid est, quod uerorum bonorum & intelligentiæ monstrat nobis, & adipiscendorum tradit facultatem? Quid nos ipsa uia & explorato itinere ad optatos fineis ducit? Quid potissimum facit, ut sine metu, & sine poenitentia rectis consilijs usi, pacatam, ac iucundam traducamus uitam? Nimirum omnium huiusmodi bonorum, & aliorum etiam maiorum, ac præstantiorum, quæ à notione uulgi magis remotæ sunt, origo nobis, & caput, & stabilimentum, est ipsa ueritas. Vt ambulare in tenebris sine lumine, sic periculosum, & præceps est peragrarè, & conficere uitæ uiam sine ueritate: & mehercule, si alterutrum è mundo tollendum sit, multò minore incòmodo diurno fidere, quàm ueritatis luce careamus. Quis enim falso bono potiri uoluit aliquando: aut quis unquam extitit, qui duos, & graueis in uita cum exantlasset labores, eo ad extremum præmio contentus esse posset, quod inanis & falsa utilitas

attulisset: Quapropter, Phedre, cum sapiētiæ omne iudicium ad multitudinis opinionem contulisti, hancine spreuisti Philosophiæ uocem, quæ ueritatis studium primum esse omnibus uult: rectasq; etiam opiniones, si quæ aliquando absque certa ueritatis cognitione existunt, cæcis comparat, casu rectum iter insistentibus: an est quod proferri indignius possit, quàm sapientiam nescire se ipsam, sed tantummodo quadam opinione de se niti? Quis hoc è uulgo infimus homo non facit? Ergo satis erit nobis, non quidem scire beatè uiuere nos, sed solum opinari uiuere nos beatè. Quot multos enim uero hominum, quotidie ista opinio decipit? Non est hac opinione contenta, non in hoc nostra conquiescit Philosophia: Scire nos id ipsum ac nosse se apprimè uult: Itaque tradit uias noscendi, & intelligendi, neque beatam uitam, nisi scienter illa animaduertatur, & agnoscatur, ullius nobis ad iucunditatem animi, esse momenti putat: non plus quidem quàm stipiti aut arbori, quæ ramis pomisq; insigniter adornata, suam ipsa uiriditatem feracitatemq; non attendat. Quòd si ueritas quoque definienda est, & tanta res tam paucis in cōspectu quasi ponenda: Dicimus, ueritatem aliam in ipsis rebus inesse, aliam autem in nobis. In rebus ueritas est, primum illud ipsum, quod quæque per se res est, quod tantum habet una quæq; res de natura, quantum habet de ueritate: Deinde, rerum ipsarum inter se con

se consensio & concordia, cum responsus quidam in his sit, aptaq; compositio: secunda quodam modo naturæ ueritas est: orta illa quidem ex superiore illa, & simplice: sed nobis, qui ab humilioribus scandendo ad alta nos attollimus, anterior, & primò obuia. Ad has porro naturæ percipiendas ueritates, cum se applicat nostra intellectio, ad easq; sese componit, atque exæquat: tunc naturalis illa ueritas, tanquam in speculo, relucens in anima nostra, imaginem diuinæ nobilitatis in nobis constituit: si & noscamus opera, atque consilia præpotentis Dei: & quoad homini licitum est, in consilijs item nostris illa imitemur. Ac ut præclaro hoc ab auspicio, & ueritatis tanquam fundamento, proficiscamur ad reliqua: percipiendum uobis illud est, trinas illas in nobis facultates animæ atque partes, ex quibus nostra omnis natura compacta sit, non posse ritè præstare commune omnibus munus, nisi in suo quæq; peculiari munere priuatim prius instructa & erudita sit: quod in illa infima parte statim fit manifestum: ea enim sola à cæteris partibus abiuncta, opus tueri suum potest: in sensibus quidem, quis non uideat, non posse hoc album atrumq;e, quod ad functiones uitæ pertineat, appeti aut uitari: nisi prius atrum cognoscatur, atque album? Quanquam de cæteris minus negotij fortasse sit: ratio quidem nostra, quæ illud ipsum est, quod sumus nos, domina & rectrix humanæ uitæ, per quā

A habe

habemus, atque obtinemus, non quod uiuimus dumtaxat (id enim potuit uegetabilis pars, quæ infimi generis & muneris est, præstare) neque uerò etiam illud, quod cum uoluptate & suauitate uiuimus: Est enim sensibilis in nobis facultatis in primis hæc oblectatio: Sed quòd decoram, & splendidam, & cum dignitate agimus uitam, præcipuū est in comunitate rationis munus, atque officium. Hæc igitur inquam ratio, nosse ipsa prius, & apprimè tenere debet, quid pulchrum sit, quid honestum, quid splendidum, antequàm illud in commercium reliquarum partium deferat: Et denique princeps omnis ueritas rerum illi percipienda est, antequàm eam exprimat, ac referat in ueritate actionum. Quæ cum totam ratio uitam hominis contineat, partesque illi cæteræ pareant, eamque consequantur: nimirum de ea nobis potissimum sermo habendus est, ut uideamus primum, qui rectus illi usus suimet per semetipsam & separatim à reliquis sit: deinde qui in reliquarum partium comitatu & coniunctione. Quod his duobus rite expositis, cunctam uim Philosophiæ, ut opinor, explicatam & perspicuam habitori sumus. Est igitur rationis, cuius nomen à rato deductum est, discernere ea, quæ rata esse debeant: hoc est, uera, firma, constantia: quam facultatem profectò in his mortalibus & fluxis reperire ipsa nequit. Quocirca ad ea conuertat se, & conferat oportet, quæ sunt perpetua, & immortalia:

quòd

quòd si etiam in his, quæ gignuntur passim, & intereunt, aliqua imago existeret perpetuitatis, qualis fortasse in ipsis generibus inest, quorum uniuersum semper permanet, indiuidua quotidie dilabuntur: in optima tamen, & constantissima parte naturæ illa quærenda est, ut ubi maximè lucet, ibi potissimum ueritas exquiratur. Est enim eiusdem scientiæ & facultatis, cum tractare de re, quæcunque illi res subiecta sit facultati, tum de ea summa absolutissimaque tractare. Cum igitur peculiare officium rationis sit, indagare ueritatem: in diuinis autem & sempiternis maximè existat ueritas: diuinorum indagatio in primis rationi est proposita. Hic me recens ista Academia non permouet, quæ percipi & compræhendi negat posse ueritatem. Neque enim illi ne istud quidem ipsum esse perceptum potest. Non est omnino de singulis argumentandi locus: Tantum contra dico, si ita res se habeat, quemadmodum autumat illa, & perstrepat: frustra & in nobis, & in natura ipsa factam & constitutam esse rationem: Vt enim suprà demonstrauimus, quod usum sui nullum habet, id non modo frustra est, sed neque ullo pacto esse potest omnino. Vt si intellectio non sit, ne ratio quidem existat: cuius officium cum sit intelligere, solum autem quod uerum est id intelligatur: adempta ueritate intelligendi, funditus tollitur è natura, &

exterminatur ratio, cui conclusioni constanti & firmæ quàm multa incommoda absurdaq; sequantur, profectò intelligitis. Sunt alij agrestiores, negantes utilem homini esse diuinorum cognitionem: quos patet nullam utilitatem agnoscere, præter eam, quæ tactu & corpore percipitur: At ea maxime bruta & aspernabilis præstantibus animis iudicatur utilitas. Sed ut redeamus, unde digressi sumus: Ratio semetipsa uolens uti, & separatim exequi munus suum intuendæ ueritatis, sensuum quidem adminiculo primum nixa est: initium enim illi primum animaduertendi, deinde pertentandi, ac paulatim altius erigendi se, atque attollendi à sensilibus factum est: ex admiratione enim eorum, quæ in natura sensili maximè spectabilia sunt, primum orta esse dicitur Philosophia: post uerò ubi satis his instructa, & adminiculata ratio esse coepit: cum ad principes naturæ causas, illasq; generales notitias, rerumq; rationes inuestigandas se datura esset, ne simulachris sensilibus distraheretur, quæ uaria & multiformia, sæpeq; inter se repugnantia, mentem, cogitationemq; obturbant: necesse habuit subsidio sibi aduocare artes alias quasdam, tanquam puriores exercitationes suimet: quarum usu tractationeq; assuefacta, posset paulatim extollere se, atque eminere, ut Arithmeticam, omnemq; mathematicam cognitionem: cuius ea uis est, eaque exerc

exercitatio, ut mentibus nostris rerum in corporibus iacentium, atque insitarum, naturam speciemque proponat, sine ulla corporis mixtione. In primis autem & maxime adsciuit Dialecticam, quæ ars nulli nominatim rei naturæ uel præfecta: ipsas tantummodo ratiocinationes per sese, & mentis quasi ex uno in aliud transitiones ac peragrationes, metiri, & perpendere, & æstimare nata est: quæ cui uis delictet ratiocinationi ratiocinatio conueniat, aptaque sit: quam quæ antecedit, aut consequatur: quid sit repugnans in illis, & ambiguum: quid distinctum, & illustre: quæ sit plurium inter se ratiocinationum contextio, aut etiam disparatio: & quarundam insociabilitas, aliarum ita arctè hærens connexio, ut diuelli non possit: his enim ipsa ratio in se prius examinatis, ac perpenſis, ubi uires suas domi iam perspexit, exploratasque habere cœpit, tum demum sic egredi in aciem, & ad contemplationem naturæ tuorum causa est accedere. Ac primo quidem ortu Philosophiæ, antiquitus (sicut monumentis literarum est mandatum) ex rerum illa cœlestium aspectu excitata ad cupiditatem cognoscendi, cum Solis & Lunæ, errantiumque syderum, nec non eorum quæ semper cœlo inhærent, motus, formas, pulchritudinesque spectasset, uicissitudinesque notasset anniuersarias, & cum admiratione maxima tantarum descriptiones rerum contemplata esset, ex ratis ordinibus eorum, perpetuisque cursibus, eadem semper inter-

ualla lege certa seruantibus, suspicari cœpit, esse autorem, & principem huic mundo quendam, cuius imperio & nutu mouerentur cuncta, & regerentur: Neque sola hac suspitione contenta, ad peruestigandum se dedit, si quid posset de eo firmi, certiq; concipere. Amoto igitur oculorum sensuumq; adminiculo, ipsum motum in sese, ipsumq; tempus, & quæ horum duorum considerationi adiuncta sunt, infinitatem diuisionum, æternitatem seculorum, diuersitatem naturarū, inquirere est conata: cumq; uideret nil tam cognatum esse cuiq; naturæ, quam motum proprium illi & congruentem, quod in eo primum natura rei cuiusque ostenditur: perspicere cœpit, ex dissimilitudine naturalium motuum, dissimiles item rerum naturas indicari: itaque & cœlum propterea ex alio genere esse intellexit: atque ista inferiora corpora sunt quatuor, quæ generationi supeditant: quod illud orbiculari motu deferatur: ipsa hæc recto. Et cum orbicularis motus perpetuus esse possit, rectus autem nequaquam: distincta à terrenis cœlestia mortalitate esse, & immortalitate intellexit. Porro autem cum motus omnis aliquid quærat, quod nō habet in se: idq; cupiat assequi, ex quo omne quicquid moueatur, haud planè perfectum, nec cumlatum omni bono esse intelligatur: ipsum autorem & principem uniuersi, unde omnis ista tantarum rerum, motuumq; descriptio ortum atque ordinem suum obtinet, unum & sempiternum, eundemq;

demq; prapotentem & prorsus immutabilem necessario esse cognouit: Ad quem intelligendum, riteq; comprahendendum, quando quidem sine eo nec ueritatis, nec ordinis, nec conuenientiae ullius, ipsiusq; decori notio ulla firma & stabilis haberi potest: cum in primis uocet nos, & acuat Philosophia: utinam eo tam facile aspirare possent mentes nostrae, quam nos id auemus, & cum ardore maximo expetimus. Sed si minus nominatim, & directe, aliis qua tamen circuitione, & exemplo, informanda nobis nunc est praecleara haec, & admirabilis Dei summi cognitio: cuius similitudinem in ea re capiemus, quae sensibus nostris una omnium maxime aperta patensq; est. Siquidem hoc Sole, qui fons diurni luminis est, nihil nec cogitari potest illustrius. Quoniam autem sicut omnis cognitio mente atque intelligentia nobis est comprahendenda: sic sensum quendam habemus, qui simili ferè modo naturam luminis percipiat: noscenda huius ipsius sensus uis, actioq; est, ut eam deinceps cum mente & actionibus mentis comparemus. Nam cum omnium sensuum facultas, ad ea quae cuiq; sensui subiecta sunt, percipienda, nata sit: in sensibus reliquis satis est adesse subiectam rem ut sentiatur: in oculo & uisione non est satis: tertiam enim quendam naturam adesse oportet, & eam quidem multo praestantior rem, splendoris, luminisq; uidelicet, quae ad hanc rem eam ipsam facta, creataq; est, ut uisioni ipsa sit adiu

adiumento: tantò fabricator ille cunctorũ sensuum Deus, uim uidendi cæteris pretiosorem finxit: ius gavit enim facultatem & uidentis rei, & uisæ, ut ad uidendi actum ueniri posset splendidissimo naturæ genere: nisi fortè uile & abiectũ est in natura quod nominamus lumen. Atqui huius tam ampli, tamq; præclari muneris, quod lucere est: itemq; eius, quod effluit, manatq; ex isto, quod est cernere, atque cerni, unum in cælo dominum autoremq; agnoscimus, per quem optimè ista, perfectissimèq; fiunt: quem nuncupamus Solem: nempe quia solus cælum atque terras lumine suo compleat, reliquaq; ab eodem astra mutuuntur lucem eam, quam possidēt: porro oculus ad Solem, tanquam ad suum bonum natura est conuersus: non quòd oculus quidem, nec quòd ipsa uisio efficiantur Sol: sed quia sensus hic unus maximè est solaris, uisq; ea omnis, quæ ad uidendum sit, ex hoc sidere tota hauriatur, & perfluat, usque eò quidem, ut & quòd intuemur Solem eũ ipsum, & quòd præterea reliqua cernere omnia possumus, totum ab illo cælesti lumine teneamus. Hunc igitur ipsum Solem, diuinæ illi essentiae & unitati, quæ cunctorum summa, & princeps causa est, fonsq; bonorum omniũ, & uerum ipsa solumq; suapte uis bonum, imagine quadam comparamus, similemq; ostendimus: ut eodem modo illa in intelligibili loco: Sic enim conuertimus, quod Græci *νοῦς* : Et sanè necesse est, fidentius uti uerbis in summis

mis rebus explicandis, & declarandis : quod etiam modò factum à nobis est, cùm essentiae nomē, Græco nomini, quod *νομα* est, Latinum reddidimus : faciemusq; in eo quoque, si necesse fuerit, ut uerbum infinitum, sine persona & tempore, nominis loco ponamus : quod cùm Græcis ipsis perquàm usitatum sit, uidetur quoq; nobis interdum esse concedendum. Sed ut dicere cœperamus, ita illa alta & longè eminens rerum omnium ratio intelligibili in loco, ad mentem habet se, & ad ea, quæ mente percipiuntur, quemadmodum in hoc uisibili sol sese habet ad oculum, & ad ea quæ oculis comprehenduntur : oculi enim si ad eas intuendas res conuersi sint, quarum colores non diurnum sidus, sed nocturnæ luces offundant, hebescent quodāmodo, & retunduntur : similesq; fiunt cæcutientium, & hallucinantium oculis, ea re quidem, quòd pura ipsi uisionis ne minimè tunc fruuntur : Si uerò eò se moueant & intendant, quæ sol illustrat : tum & clarè, liquidoq; cernunt, & eadem quoque claritas in eis ipsis inest. Igitur in anima eadem proportione est noscenda ratio, atq; attendenda : Dum enim anima ad id percipiendum intendit se & adnititur, in quo ueritas & ipsum esse è regione refulget : quod est, ut lux à Sole, sic istud ex Deo intelligibile quasi lumen : intelligit id planè atq; noscit, mentemq; sibi ipsa habere in se & possidere tum uidetur. Cùm uerò eò se conuertit, ubi tenebræ admixtæ sunt : in id quod gene-

B ratur,

ratur scilicet, & quod corrumpitur, quodq; sinu-
latis & fictis obtunditur imaginibus: tunc hallucinatur
nimirum, & quasi somniat: uarijsq; ultro ac
citro iactata opinionibus, mentis sibi ipsa, ac intelli-
gentiæ uidetur inops. Hoc igitur summè præcellens
ac diuinum, quod & rebus cognitis præbet ueritas-
tem, & cognoscentibus uim cognoscendi: caput
ipsum naturæ totius, & absolutissimam speciem om-
nis boni, in Sole nobis similitudine propinqua,
repræsentari cernimus: quod idem omnis scientiæ
& ueritatis est causa: ueritatis, inquam, in rebus qui-
dem factis, quatenus illas ut sint facit: nostra autè in
anima, quatenus eam lumine illo intelligibili, & ex
sefe, & ex rerum essentijs ab eodem ipso manantibus,
informat, atq; illustrat: qua quidem ex ueritate ge-
neratur scientia, quæ est rerum eodem modo sem-
per se habentium firma mentis intelligentiæq; com-
præhenfio. Sed ut in natura uisibili, oculum & lucem,
solares quidem uirtutes, & facultates conuenit ap-
pellare: Solem autem nequaquam, quod Sol utrisq;
his multò præstantius quiddam, atq; eminentius in
sefe habeat: sic in intelligibili genere, scientiam &
ueritatem, res nimirum bonas atq; diuinas, non ta-
men Deum ipsum atq; illud supremum bonū exis-
timare debemus: quippe quod admirabili quodam
interuallo uirtutis, amplitudinis, potestatis, his om-
nibus antecellat: magnificētiusq; multò sit, quàm
ut ueritatis, & scientiæ finibus possit includi. Atque
ut perg

ut pergamus etiam ad ulteriora, in eadem tamen similitudine insistentes, Sicut Sol ijs, quæ cernuntur, non solum facultatem hanc præbet, ut queant cerni, sed generationem etiam, & accrementum suppetat, & educationem: quod horum omnium generis rebus atq; alitis, Sol causa est, neque ipse tamen uspiam est generatio: sic his quæ cognoscuntur & intelliguntur, non hoc tantum ab summo adest naturæ bono, ut intelligantur, sed ut sint ea etiam, atq; existant, & ut suam quodq; illorum obtineat essentiam. Sed ut aliquando abeamus à similitudinis comparatione, quam præsertim uel leuiter indicasse affatim uobis sit, dico hoc munus esse menti nostræ peculiari ipsius officio attributum, ut in intelligibili percipiendo genere, & inquisitione ueritatis se exerceat: quam si in æternis, & sibi semper constantibus non perspexerit, neq; in illis ueritati familiarem se effecerit: næ illa in his uariantibus semper & disfluentibus, nunquamq; in eodem permanentibus statu, frustra uenari illam, & indagare conabitur: infirmisq; semper nutabit assensionibus, & ambiguis opinionibus distrahetur: uiam uitæ certè nullam unquam inibit, quæ æquo animo usque ad extremum patiatur se deduci: sed reuocabit crebro se, & retexet, sæpèq; in pœnitentias graueis, & mœrores, tanquam in scopulos saxaq; delata, faciet ueterum suorum consiliorum naufragium. Quod in illis magnis & præpotentibus uiris, qui in hac urbe

B : & Repub.

& Repub. quondam, alijsq; item in ciuitatibus ac populis, autoritate & gloria rerum gestarum flores uisi sunt, ferme omnibus contigit. Sed, ut sint, qui hanc præcipuæ, summæq; ueritatis absolutâ notionem ad communē hanc peragendā uitam haud ita multum esse necessariam putent: in quo etsi imprudentia labuntur, habent tamen paratam ex hominum quotidianis moribus, & studijs, erroris sui defensionem. Nos qui ueram hominis præstantiam, ac dignitatem è Philosophia quærimus, summumq; ex ea bonum nitimur consequi: si rerum altissimarum cognitione nos esse instructos uolumus, num sumus propterea iure reprehendendi? Atqui dicimus planè, sine ijs, ordinem rectè uiuendi teneri nullo modo posse: nisi enim prius ratio ipsa explicauerit semet, totamq; perspexerit, & domestica sui primùm, æternæq; secum ueritatis scientia erudita, tum demum accesserit ad considerandum hæc humana, eaq; tractandum, ac dirigendum, ars bene uiuendi perpetuò cōstare nulla poterit. Sed cum rerum earū, quæ in mūdo & natura sunt, causarumq; quibus illæ effectæ in lucem prodierūt indagatiōe omniū, & curā cognoscēdi Philosophia profiteatur: singularis est explicatio in suis libris atq; locis, cum ab autoribus cæteris, tum uerò in primis ab Aristotele petēda: non enim nobis propositū est in præsentia singulas res persequi. Illud propositū, ut quoniā ratio nostra non ad intelligēdum solum, quod ipsa per se

per se & seorsum facit, uerum etiam ad agendū atq;
imperandum, quod est illi in communitate cum cæ-
teris partibus officiū, genita factaq; est: istud ipsum,
in principe & moderatore omnium rerum Deo,
consideret prius, & intueatur, quod regere est & im-
perare: ut illius deinde exemplo & imitatione eru-
dita, diuinam quandam illinc magnificentiam, &
administrandis rebus facilitatem, ad hæc humana
& inferiora transferat: quod est totum illarū actio-
num, quæ positæ in consilijs sunt, non in operibus
manu factis: quarum quidem actionum splendor
omnis, & pulchritudo hæret in ipso homine, peni-
tusq; insita est. Etsi enim cælum hoc, totusq; iste
mundi ornatus, pulchritudine & decore præclaris-
simus sit, diuiniq; ordinis conuenientiam & uenus-
tatem, cum admirabilitate maxima, mortalibus
oculis ostendat: ut quod undique effulgeat pulcher-
rimorum luminū distinctione & copia, cursibusq;
propè immensis, & non enarrabilibus torqueatur,
usque eò quidem, ut satiari mentes humanæ non
queant spectando illud, atque mirando: tamen
pulchriora multò sunt, & magnificentiora Dei consi-
lia, quibus editum id in natura, & eiusmodi factū
est. Videndum est igitur hoc consilium, & tantæ
gubernationis ratio est noscenda: quò nos, qui par-
ticipes esse diuinitatis cupimus, ad rationem ean-
dem deinde, simileq; consilium, nostra & cogitata,
& acta accomodemus. Nec uerò dubium esse po-

test, quin decor, & dignitas, & pulchritudo, in summo Deo, omnibus rebus ortum causamque præbuerit. Est enim pulchritudinis, maxime conciliare amorem, appetitumque gignere congregiendi, & potiundi: quo quidem appetitu ex illa Dei specie honestissima in natura excitato, cunctus iste mundi, & corporum omnium apparatus, ad conquiendum Deum, ut suum bonum, se erexit. Pulchrum porro est, quod & in semetipso decens est, & commodum, atque utile cæteris. De illa pulchritudine nunc loquor, quæ mente intelligentiæque comprehenditur: cuius umbram quandam fert, hæc quæ in corporibus descripta est pulchritudo, tantam ipsa quoque vim possidens, ut non absurdè de illo rege uideatur dictum, speciem primum dignam esse imperio. Sed ut ad pulchrum princeps, illud quod est rationis & intelligentiæ, redeamus, Nemo unquam ueriores, digniores, appositiores pulchri ac decori speciem rationem uel expresserit, quam hanc, quæ sit in eo, quod est prodesse cæteris, sibi sufficere, & conueniens esse, quod utrunque in pulchro inesse est necessarium. Nam ut in corporum formis uidemus, quarum omne oculorum est iudicium, si qua pars corporis, à cæteris partibus sui dimensus, portione discrepet: non uerè illum, in quo insit uitium hoc, formosum posse appellari, propterea quod species in eo à conuenientia discessit, egetque alio quopiam, ut expleatur & perficiatur: iccirco & amabile minus est

est, & minus appetitur, quod necq; delectare admodum potest propter incongruentiam, neque adiuvare propter egestatem: eget enim & ipsum aliunde adiumento: sic illud simplex, & menti propositum pulchrum, quod omnes congruentias honestatesq; in se continet, nulla ipsum parte sui imminutum, nec indigens, contraq; omni bono ac decore cumulatum, atq; completum, concursus omnium rerum excitat ad obsequendum, & obediendum sibi, ut quaelibet res ad nutum præsto sit, cupiatq; illi nasuare operam suam: quippe quæ experiatur & sentiat pro eo, quantum illi se dediderit, & ad accipienda illius imperia se subiecerit, tantum se & iucunditatis, & commodi ad suam explendam naturam esse reportaturam. Hac igitur imperium ratione Deus, & hac facilitate regit uniuersa ac permouet: quod semper agit id, quod se ipsum primum deceat: deinde sit utile cæteris: & cum alijs bonum utilitatis impartiuerit, ipse suum retinet, quod est decori, dignitatis, amplitudinis bonum. Quò etiam fit, ut in effectiõibus naturæ & operibus, nulla uerior ratio, neque constantior reddi possit, quam ob rem quicque sic effecerit Deus, quàm hæc, quòd ita eum facere decuit, & quia rei effectæ illud fuit optimum: ut & à dignitate illius qui agit, & ex eius, quod agitur, emolumento ac commodo, ualida in primis fortisq; sit argumenti conclusio. In quo tamen ipso ubique, & præcipuè, decorum illud elucet, quod præcla

præclarum in se atque munificum, dupliciꝫ hac de causa amabile cæteris, facit, ut facile imperium sit in uolētibus, nulloꝫ nisu conatuꝫ ue laborioso, omnis rerum molitio gubernatioꝫ transigatur. Et hæcenus quidem Philosophia hominis rationem in suo & proprio munere continet, ut in speculandis naturæ operibus illam exerceat, eaqꝫ eam edoceat, in quibus origo est, & sedes, & domicilium ueritatis. Quæ quatenus in summis & sempiterna immutabilitate constantibus uersatur rebus, iure ac merito dicta est sapientia: fontes enim in illis sunt & scientiæ omnis, & prudentiæ. Qua uerò ad mutantia genitabiliaꝫ confertur, scientia naturalis, eadem Græcè Physice est appellata. Moralis autem, cum humanis dirigendis actionibus adhibetur. Qua tri-
 membri diuisione in Philosophia exposita atque monstrata, præclarè illa definitur rerum esse scientia, & diuinarum simul, & humanarum. Nunc quando iam satis, quod ad præsentem quidem nostram disputationem pertinet (nam ad rem ipsam, pleniorẽꝫ doctrinam non satis) de officio seorsum & per se humanæ mentis est dictum: quod in prioribus duabus illis Philosophiæ partibus, sapientia uidelicet, & naturali scientia, positum est: Restat communis totius hominis, non iam partis in eo separatim alicuius actio, atque exercitatio, moralis scientiæ propria: ad quam cum nunc Philosophia deductura est: rectumꝫ suimet in ea usum, ita
 illum

illum edoctura, ut nulla neq; uirtutis, neque officij pars, quæ ad beatam consequendam uitam pertineat, in hoc quoq; genere prorsus relinquatur. Et enim ab illis altissimæ ueritatis consilijs, & rerum æternarum speculandis rationibus, in quibus tanquam cognata illarum, atq; eiusdem cum illis nobilitatis consors, semetipsam mens præcipuè agnoscebat: fruebaturq; tum uero, & suæ naturæ munere, & sapientiæ nomine: deflexa ad animaduertendum conditionem necessitatis suæ, quod cum alienis & longè dissimilibus sibi generibus conflata, permulta obire simul cum ijs, atque unà agere cogeretur: primo quidem aspectu uehementer perturbata est: affluera enim tranquillitati, & ordini rerum sibi constantium, & nusquam ab eo, quod idem est, digredientium: ut uidit motus sociarum partium incertos, & uarios, nullum neq; modū, neq; ordinem suapte sponte retinere, eosq; cum importunos sibi, ac sepe numero molestos, tum inter se ipsos quoque rixari dissidentes: defleuit quidem illa primò conditionem status sui: quod à beata illa cura fruēdæ, & cōtemplandæ ueritatis direpta, in turbam sese & in factionē impediuiſſet: uerū tamen celeriter ad officium cōuersa, cum intueretur consiliū & uoluntatē summi Dei, non solum æquo, sed alacri etiam animo ad obediendū illi se dedit. Quid enim faceret secus, in illa serie rerū, ex quibus nexus est mundus, exercitata atq; alita? quarū admirabilis, cōtinensq; com-

C plexus,

plexus, paratus ubiq; ad obediendū Deo, apprimē
eam instruere potuerat, suū cuiq; rei bonū, in ordi
ne & obediētia huiusmodi, maximē quærendū esse.
Igitur in hanc deliberationē se cōtulit, ut quos diuī
na fors sibi dedisset comites, cum eis statueret pacatē
& cōcorditer uiuere. Atq; ut in re perdifficili & ar
dua, ad Philosophiā, quō solebat, confugiēs opem,
admonita ab ea ipsa est, ut agitationis & incertioris
agēdæ uitæ disciplinam, ab eis rebus acciperet, quas
stabiles & certas in natura cognouisset: regendiq; &
imperandi ordinem totum atq; exemplū, illinc huc
transferret. Quod quidem sic agere constituit: pri
mumq; illud animaduertere cœpit, expressam esse
in se, & in corpore eo, quod ipsa rectura esset, ima
ginem quandam tum præpotentis Dei, tum eius
mundani operis, quod creatum factumq; à Deo,
eiusdē etiam imperio & numine regeretur: ut quem
admodum Deus in summo omnium consistens, re
bus incitatis & mobilibus imperat, immotus ipse,
& semper permanens in eodem, globisq; corporum
cœlestiū alias præponit mentes, quæ in eum ipsum
intuentes, ac nusquam ab eius lege & ordine desce
dentes, moueant ceteriora corpora: ipsas uerò uar
ias & multiplices elementorum concursiones, con
flictus, illisiones, quoniam minutatim sub ordinem
certum redigere non licebat, illa uniuersa lege coër
cuit, qua paribus omnia librata ponderibus, & uim
inter se æquam obtinentia, finibus se suis singula
continent:

continent: neque aliud alijs supergredi, aut uiribus
& potentia preponderare est licitum: Sic mens ipsa,
tanquam alter in corpore humano Deus, stabili ue-
ritate semper nitens, reliquas animæ partes mouens
do corpori appositæ, suapte sponte ordinis finis
umq; expertes, ad intuendum eum ordinem, quem
uera in sese descripsisset ratio, reuocaret: formamq;
illis decori pulchritq; offerret: qua specie diuina il-
lectæ illæ ad amorem, studioq; accensæ eiusdem
imitandæ pulchritudinis, & participandæ, cum
suum etiã præsertim in eo commodum sentirent,
atque experirentur, faciliè rationi imperium, & nul-
la impeditum controuersia, relinquerent. Itaque
mens stupata egregio comitatu illarum cognitionũ,
quas in contemplandis rebus æternis antea perce-
pisset, sapientiã primũ deuocauit de cœlo, eamq;
nonnihil hæc quoque inferiora ut animaduerneret,
compulit: uocauitq; eo nomine prudentiam: quòd
hoc uerbum à peruidendo ductum, uoce ipsa indi-
cat, in res obscuras & suapte natura perspicuæ lu-
cis expertes, aciem esse ingenij, & mentis intenden-
dam. Porro autem sapientia in eo aliquandiu com-
morata, ut cupiditatum, & affectionum, omniumq;
earum appetitionum, quæ multiplices, ac uariæ in
animis nostris concursant, causas, sineis, naturamq;
cognosceret, cum uideret eas temeritate quadam
præcípites, subitasq; ferri, & ad ea expetenda, aut
refugienda, quæ per sensus interpretes, lætabilia,

formidolosa'ue oblata essent, sine modo discurrere: intellexit harum rerum causam esse comitatum illum, quo sentiens anima, cum uegetante coniungitur: quòd ex huiusmodi coniunctione plus illi parati abiectæ & ignobili, ab alijs sæpe partibus tribuatur, quàm sit æquum. Itaque prudentiam, quam ab se instructam consilijs, & rationibus ad res gerendas iam adhibebat, rectionemq; illi rerum humanarum in diuinis ipsa resistens, per manum quasi trahabat: admonuit, ut notaret, animumq; aduerteret, primam directionem humanæ uitæ, & fundamentum uniuersæ salutis, potissimum in eo consistere, si singulæ in homine animæ partes, suum unaquæq; & pensum, & precium obtineret: neque alteri altera de eius quicquam iure, honore'ue decerperet. hoc enim uno modo demonstrauit, concordiam, & pacem in animis constitui, uiamq; ad beatam uitam posse inueniri: si, quæ regendis, & in unitate continendis ciuitatibus, in primis necessaria est, prima in ipso homine iustitia extitisset: quòd ea uirtus uirtutum est sedes, & fundamentum reliquarum: per quam quisq; suarum rerum diligens curator, atque custos, aliena minimè appetit: neq; munus interrumpit alieni officij: quod ubi fit, ibi cum lætitia, & cum tranquillitate maxima uita degitur. Hoc igitur primum suscipiens prudētia, idq; exprimere ac proferre in agendis rebus studens, pensatis cunctarū in homine partiū cōditionibus & meritis, statuit parti illi

illi uitali & infimæ tantum esse tribuendum, quantum ad uitam, & ad incolumitatem sat esset: cumq; ea pars consilio omni orba, legem, lumenq; rationis non modo nullum habeat ipsa in sese, sed ne aliunde quidem possit accipere: quo etiam nomine contemptissima est partium reliquarum, & obscurissima: quandoquidem, quod nec sua, nec aliena splendeat ratione, ordinis & elegantie totum est expers: tamen quia necessaria ad consistendum est, stabilitatemq;, & uelutî solum, reliquis partibus animæ præbet, non mediocri studio à nobis conseruanda est: ut illo tanquam firmamento innixi, ad posteriora obeunda uitæ officia nos attollamus. Quam ob rem primum illi tempus, & prima curatio, supeditandis uitæ necessitatibus attribuitur. Quo nomine ea etiam sit alicuius honoris particeps: ut si nobilitate cæterarum postrema est, anterior sit tempore: usque eò mirabilis ille prudentiæ contextus, in temperando, ac constituendo concordî homine, omnia inter se uinculis amabilibus illigat, atq; constringit. Sentientem uerò animam, quæ non omnis penitus necessitate deuincta est, sed habet aliquid in se liberale & splendidum: nam & uoluptatibus fruïtur purioribus, & intelligibilem pulchritudinem illam, in aspectabiles oculis species, & sensilia simulachra quodammodo transfert: eadem mens à prudentia instructa, ut sociam, æqualemq; complexa, eius rationis, quam ipsa in se insitam, atq; innatam

continet, & ueritatis eius, quæ ex intelligētia rerum
semper in eodem manentium, illi percepta est, par-
ticipem facere conatur. Qua ex communione men-
tis atque sensus, ritè & ordine per prudentiam fa-
cta, dignitatis species illa, quæ una omnium rerum
humanarum pulcherrimum est oculis præclarissi-
mumq; spectaculum, in uita & moribus & actioni-
bus hominum exprimitur. Vt enim alio loco me
recordor dixisse, in copulatu & compositione re-
rum plurium, consensus ille, atque ordo, & æqua-
bilis omnium inter se conuenientia, intelligentiæ at-
que menti ueritas est: oculis & sensibus pulchritu-
do ac dignitas: ut dignitatem definire si uelimus,
rectè sic dicamus, translatam illam ad sensum & ad
oculos, esse ueritatem: quæ dignitas aspectibus sub-
iecta, cum tantos amores sui in omni hominum ge-
nere concitet, cunctumq; orbem propè terrarum
irrequietum, & sollicitum semper habeat: intra eos
fineis est ingenijs liberalibus permittenda, ut ne un-
quam prodat, neque deferat ueritatem: hoc est, con-
sentum & concordiam animæ partium ne diuellat:
in quo & ambitioni, & populari gloriæ, & huic im-
peradi cupiditati, qua homines proieciē nimirum,
& præter modum efferuntur, posita lex erit. Vult
igitur mens, partem hanc sensilem ita suis frui uo-
luptatibus, ut aliena commoda non præterrumpat:
& neque illud inferius animæ genus, suis defraudet
utilitatibus; neque rursus menti ac rationi ad cons-
tantiam

stantiam, & ueritatem omnia reuocanti intempesti-
 uis suis interpellationibus officiat: eademq; ratio,
 quæ totius hominis rectrix est, cum ad sua munera
 fungenda ipsa se confert, habet tamen semper alieni
 quoque temporis, & opportunitatis rationem: ut,
 ubi socijs, & cognatis partibus optimè prospex-
 rit, tum libera & uacua, diuinis illis iucunditatibus
 sese impleat: ita æquatis omnium officijs, perpen-
 sisq; muneribus, cum unicuique datur parti quod
 est illi consentaneum, neque alia de alia pars parte
 quicquam detrahit: regnatq;, quod ad regnandum
 natum est: paret, quod ad parendum: tum iustitia
 primùm in interiore hominè per prudentiam exis-
 tit: Deinde ex iustitia oritur temperantia, ordo qui-
 dam uitæ, & ornatus, ac moderatio appetitionum
 omnium, nō uoluptatum illa penitus contemptrix,
 sed ingenuis ex eo genere, & liberalibus uoluptati-
 bus modeste dedita. Quarta uerò & difficilima
 omnium uirtus, quæ est fortitudo, oritur quidem
 illa ex superioribus, sed non tam optabilis ea uiro
 forti est, quàm interdum necessaria: non enim labo-
 res, ærumnæ, pericula, mortes, ipsa per se appetun-
 tur: neque libens quispiam uitam & salutē projicit:
 sed ubi in discrimen uenitur, ut aut ista suscipienda
 sint, aut honestas amittenda, sine cunctatione ulla
 uir magnus atque præstās, honestatem sibi mauult,
 quàm uitam retinere. Quod contingere nequit, nisi
 in animis ita & uirtute, & disciplina cōstitutis, ut in
 illis

illis maxima sit autoritas rationis : quæ cum præscripserit aliquid, quod rectum esse, ac decere decreuerit, iusseritq; id agi, reliquæ ad obtemperandum partes præstò sint, imperiumq; rationis nauiter exequantur. Verùm cum uirtutes omnes reliquæ, tum in primis hæc, de qua loquimur, fortitudo, maximè alitur & corroboratur rerum æternarum scientia, & cognitione. Nam, nec qui infinitatem temporis mente compræhenderit, is ob cupiditatem uitæ paululum propagandæ, aliquid indignum fortè uiro admittet: nec qui immensitatem mundi, orarum, regionumq; fuerit animo peruagatus, regnū ullum tanti æstimabit, ut eius assequendi causa, iusiurandum uiolare, arbitretur esse fas: denique pulchri ac decori illa cognitio, cui firmè & probè fuerit mente concepta, hic cœlestibus opibus scientiæ & ueritatis locuples factus, atq; (ut heros noster Plato inquit) natiuum in anima aurum possidēs, nunquam profectò pecuniæ gratia sordidum quicquam, & illiberale efficiet. Ex quo intelligi potest, uirtutum omnium semina, quæ à natura in animis nostris fata sunt, ex una ritè ali, excoliq; Philosophia: neque sine ea unquam ad bonam frugem posse adolescere: cum, qui naturalibus uirtutibus tantūmodo, aut etiam more opinionèq; comparatis, nixi sunt: hi, ut unam in partem aliquam præclarè se dederint, in alia tamen parte non mediocriter sunt prolapsi. Plena exemplorum est historia: sed mihi properandum neces
sario

fario est : inclinatur enim iam ad uesperum dies. Talis ergo iste uir, quem Philosophia instituerit, recteque eum semetipso edocuerit uti, constitutis per prudentiam partium singularium terminis, ut aliam alia pars non supergradiatur, nec opprimat, regnum civile & patrium obtinente intus ratione: placatus sibi ipse atque concors, tranquillam & felicem deget uitam, diuinamque illam regendi artem adhibebit, quæ quidem omnium est potentissima & maxima: ut quod in eo præstat, eminetque, mens & ratio uidelicet, suum decorum ipsa in rebus omnibus agendis, præcipue atque semper, alienum autem procuret bonum. Quo uno modo potissimum, & inferiores partes sua sorte contentæ, tranquillè se habebunt: & propter decori illius in principe parte pulchritudinem, amore summo & studio ad parendum adducetur. Verum ita institutus hic quidem homo est, ut secum solus ipse possit, aut cum familia sua commodissime uiuere: qui iam in publicum producendus est, & in communes consuetudines deducendus: non contentatus antea in tenebris, ut modò Phædrus dicebat, sed in lumine illo celestium ueritatum, & ad exemplar illarum conformatione suimet exercitatus, atque prudens: Qui cum dictante ratione, & gubernatione illa summi rectoris Dei sic monstrante, intellexerit, non se sibi soli natum esse, sed & patriæ præterea, & ciuibus suis, partemque sui non minimam cognato quoque, & civili generi esse debitam; cumque se ipse so-

D ciabile

ciabile in primis esse animal attenderit, uirtutem uideritque eam, quæ maximè naturam hominis contineat, sine exercitatione, atque opere imperfectam existere: neque efficere posse beatam uitam, si non promatur ad res gerendas, & adhibeatur: quod iam & homines, quibus cum uersetur, & instrumenta ad agendum, quibus utatur, requirit ac postulat: in quo nonnulla pars nimirum attribuenda est Fortunæ. Cum, inquā, ista omnia noster Philosophus cognouerit, sine tergiuersatione ulla ad obtemperandum rationi sese dedit: prudenterque, & accuratè omnia circumspectans ubique præeunte eius consilijs Philosophia, instrumentum primarium conuiuendi & comunicandi, quo prima interni hominis effigies oculis spectantium obijcitur, atque proponitur, formabit aptè & compositè orationem: eamque tanquā alterā personam perinde excolet, ut si totum sese in illa sit expressurus. Curabit igitur ut commodè, ut distinctè, ut propriè possit loqui: uerbisque utetur lectis, ex cōmuni quidem sumptis loquēdi usu: sed tamen uiuidis magis, quàm sonantibus: copiam autē orationis hætenus adhibebit, ut aptè, & rotundè sensa animi sui, cum significatione mediocri interiorum motuum, explicet atque exponat: nam oratorios quidē illos animorum impetus, forensibus causarū patronis derelinquet: ipse uerò sedatè, & grauiter, leni gestu atque uultu, omnia persequetur: Atque ab hoc aditu talis & animi, & in agendo prudētiæ atque uirtutis, ad
conui

conuictus hominū, ad commercia, ad cōsuetudines
 intromissus : cūm quacuncq; se intulerit, quicquidq;
 gesserit, illud in semetipso exemplū summi & prepo-
 tētis Dei secum deferat, ut custodiat semper decorū
 suum, & alienū procuret bonum : quæro à uobis, &
 abs te in primis, Phædre, num huiusmodi cūm sit,
 uideatur cœtibus hominū regēdis, & gerēdæ Reip.
 autor fore idoneus? cūm præsertim ipse quidē opti-
 mē se rexerit: per Philosophiā autē inspexerit, quod
 in unoquoq; hominum diuersis ex naturis & parti-
 bus conflātū est, idem notari in ciuitate & distingui
 posse. Quam igitur uim prudētiæ edoctus à Philo-
 sophia, & in illis altissimis causis eruditus, in semet-
 ipso prius exercuerit, eandem trāsferet ad hominū,
 urbiumq; rectiōē : ac plebem quidem infimā, quæ
 maximē necessarias in ciuitate obit partes, ut uersetur
 in agris colendis, oneribus uehēdis, materia cæ-
 dunda, opere faciundo : infimæ illi in homine parti
 genitabiliq; collatam, pastu contentam, & cōiugio,
 procreationeq; liberorū: curabit, ut sit suis opportu-
 nitatibus instructa, omnemq; ab illa iniuriā remo-
 uebit, diligētia adhibita, ut ne illa unquam opere tas-
 men uacet, sed tempestiuus aliquibus semper labori-
 bus distringatur. Eademq; ratione, si quid illi fortē
 exuberare senserit, & superfluere, relicto semper
 quod satis sit, reliquum in publicas utilitates cōuer-
 ter: neq; secius tamen urgente aliqua calamitate, ei-
 dem egenti atq; oppressæ, de publico opitulabitur.

Genus autem alterum ordinis mediij, quod sensili in nobis animæ comparatum est, ut magis honoratū, quàm primum, liberalius quidem habebit, & cultius: particepsq; consiliorū ac dignitatis, quoad libebit, efficiet. Sed tamen quoniam sensilibus id oblectationibus maximè est addictum, inter quas dominantur hæ, quæ oculorum sunt, in externas illud & peregrinas mittet regiones: quò uarias in illis species rerum intuendo, mercesq; coëmendo, patriam, urbemq; suam, rerum spectabiliū, & earundē utiliū, commoditatibus refarciat: luxuria tamen semper, præcipueq; amputata: ne fortè sublatū studijs inanis insolensq; effectū, dum suis finibus egredi, & in alienos conatur inuadere, ueriores impediatur utilitates consensionis publicæ. Nobilitatē uerò, hoc est, ipsos optimates, qui non tam ex fortuna sint aut genere, q̃ ex uirtute pendendi, mentis in homine & rationis instar, uniuersæ ciuitati præficiet: quorū erit curatio, prouidere ac præcipere, ut omnia gerantur in Rep. rectè atq; ordine: partesq; in societate & cōcordia teneantur, nihilq; cuiq; desit, quod necessariū sit ac legitimū: quos ubi uacare ipsos operibus publicis cōtigerit, tū eos maius illud in se bonū atq; præstantius quod obtinent, in rebus item præstantioribus collocare disponereq; præcipiet: ut mentem, animūq; uidelicet, ad diuinarum rationum speculationem: opes uerò ingenij, autoritatis, fortunæ, cōferant, & conuertant ad liberalitatem ac beneficentiam:

tiam: omnibusq; modis nitantur & elaborēt, ut uirtutem uberrimē atq; amplissimē exerceant: in cuius unius studio atque usu, fructus beatæ uitæ, nec solum princeps illa & propria optimatum ordinis dignitas, sed utilitas etiā honestiore multo ex genere, & uoluptas ea quæ purissima est omnium uoluptatum ac suauissima continetur. Atque hæcenus quidem illa in Deo præstans, & eminens diuini rectoris effigies, à Philosophia cognita, in homine impressa, in cunctam postremò ciuitatem inducta, & translata est. Sed, ut ad eum, quem Philosophia hoc modo instituit, docuitq; semetipso rectè uti, reuertamur: aliquandoq; peroremus: Cernitis profectò quicquid in natura est, quod sit pulcherrimum, ac magnificentissimum, id totum in hac una specie hominis uerè Philosophi, mentibus uestris expositum esse. Nam primùm diuinum illud & longè dominās, quod unitatis, & ueritatis, & sapientiæ summæ est compos, extat præclare in hoc Philosopho, atque cernitur: unus enim & iste quoque cōcordia, & conspiratione suarum partium omnium, & in eodem sibi semper constans, diuinarumq; rerum ueritatibus instructus, nunquam à sapientiæ consilijs deferitur, nunquam uarietate opinionum distrahitur: sed quacunq; se insert, regulam illam rectè agendæ uitæ: id est, ueritatem, tanquam lumen de cœlo libatum, præ se ferens: res quantumuis obscuras ac disperfas, & in lucem producit, ut uideri: & in uni-

tatem colligit, ut mente compræhendi possint. Quodq; in Principe & Rege totius naturæ Deo maximè præcellit, eximiumq; est, quod ille diuinis bonis omnibus confertus, ac redundans, neq; alias opes fortunæ expectat, & suas ipse in aliorum largè effundit commodum: suaq; id solum interesse iudicat, uti quicquid agit, maximè ipsum deceat, cæteris idem iucundum utileq; sit: quod in hac pulchri & decori perfecta absolutaq; specie, omne imperium, omnis maiestas, omnis ueræ dignitatis atq; potentiæ inest ratio. Similiter id in nostro, qui cœlestium diues bonorum, mentemq; insignibus donis ueritatis illustratus, nulla effrænata cupiditate animi ad ea fortunæ bona appetenda proripitur, quæ præter subsidium necessitatemq; naturæ, extraordinarijs præterea cupiditatibus sunt proposita: magisq; id sibi studio & curæ habet, ut alijs sit ipse adiumento, & comodo, quàm ut aliorum opibus augeatur: solum autem suum & proprium bonum ipse id existimat, quod est aptum, conueniens, decorum, pulchrum. Ac quemadmodum propter decori eiusdem dignitatem atque præstantiam, facile est Deo in omnem naturam imperium: ut illi, sponte sua ac uolentes, cœlestes primum globi, siderumq;, & stellarum æterni ignes: deinde propiora quoque nobis elementa, stirpiumq; & animantium cuncta genera, sedulo, libenter, enixèq; obediant: quod amore pulchri illius incensa atque correpta, quod
in Deo

in Deo præstantissimè elucet, proximè se ad eum conantur adiungere, illiç quo ad licitum est, cupiūt inhaerere. Item hominis ratio pulchritudine simili prædita, nempe quo ad imitatio assequi primigenum & summum exemplar potest: eiusdemç honesti ac decori Philosophiæ beneficio particeps, primum interioris animæ partes studiosè sibi habet obtemperantes: ut amoris imperio, quod fortissimum est, & uehementissimum, non ui, neque metu, infirmis imperij custodibus, facilimè omnia & regat, & tueatur: deinde in commercia & societates hominum translata, ubi Rempublicam & ciuilem statuerit ad se pertinere (non enim Philosophum nos patre operario, neque rursus ex stipite aut lapide natum esse uolumus: sed ex eiusmodi sanguine, in quem liberalium artium cogitatio, & studia humanitatis, uideantur aliquando cadere potuisse) quos nam progressus uobis uidetur habitura? Non ne qui ab hac præclara disciplina profectus fuerit, ut primum agere cœperit secus, quàm ab egregia illa Phædri sapientia est præceptum, ut non sequatur, nec imitetur populum, nec se inconsultis ferri opinionibus sinat: tantumç absit, ut præcipiat alijs opum adipiscendarum palmam, quod ruentibus, tumultuantibusç cæteris, solus ipse stabili, & quieto animo permaneat: neque se ulla eiusmodi cupiditate permittat trahi: conuertet in se primò aspectus populi, deinde multorum sermones exci-
tabit

tabit, mirantium & percontantium, qui nam sit, & unde, qui tam robusto, & alto sit animo, ut non eisdem rebus ipse, quibus uulgus, moueatur: quod si quos etiam eorum, qui ad rapiendum, & congerendum, mala cupidine incitati se proiecerant (ut saepe fit) spes, aut fortuna grauior fefellerit: nonne hic, qui se continuit, ac repressit, plus multum uidisse, quam ceteri, sagaxque in primis & prouidus esse existimabitur. Et quoniam uita fert, rerumque & temporum exigunt inclinationes, ut periculum cuique sui, ex natura, & instituto suo faciendum saepe sit: qui hanc constantiam recte, ordineque omnia agendi, quam Philosophiam nominamus, ad omnes res adhibuerit: nec cuique rei plus minusue, quam quantum par sit, æquumque, tribuerit: fidem & ueritatem sanctissimam habuerit in uita, nusquam ab eo, quod deceat, honestumque sit, discesserit: eorum qui ad ipsius curam, fidemque pertinebunt, commoda in primis, ornamentaque prouiderit: maximum ipse sibi ornamentum retinuerit dignitatem: postremo in tota uita, in suis dictis, consilijs, factisque omnibus, similis sui undique, & semper sibi congruens, æquabilisque constiterit: quod nemo plane, nisi idem sit, qui est Philosophia sit eruditus, atque instructus, probe potest & ad amussim facere: uerendum credo erit, ne non omnium in se amores, atque studia, omnium mentes animosque conuertat. Admonebuntur (mihi credite) homines specie illa honesti, quæ in graui uiro
& con

& considerato eximia est: commouebuntur, impels
 lentur, primum, ut oculorum animorumque contui
 tus in illum unū cuncti conijciant: deinde, ut ament:
 postremo, cum tota illius uitae iam ratio delibera
 tioque patuerit, ac perspecta fuerit, ut se & sua omnia
 illius fidei, uigiliae, prouidentiaeque, studiosissime per
 mittant: qui enim poterūt agere secus, cum uiderint
 illum nil meditari aliud in uita, neque praese ferre,
 quam ut Deum, praecleara imitatione, in se ipso refe
 rens, suum decorū honestumque perpetuo custodiat:
 alienum autem procuret bonum? Species haec in
 quam praestabilis, planeque diuina, semper hominum
 mentibus atque animis dominata est: semper uolun
 tates omnium in potestate habuit. Quid deinde au
 tem, quid eueniet? Tantumne tu putas, Phaëdre, sa
 pientē tuum per astutias & simulationes, uasramque
 illam gerendam rerum calliditatem, honoris & for
 tunarum adipisci posse, quanta hunc fortunae & ho
 norum praemia, non dico consequentur, sed planē
 obruent? Etenim quae usquam natio est tam imma
 nis, & barbara: quis tam crudelis, impiusque tyrānus,
 qui non specie tali istius uiri commoueatur? ut etiam
 si eum diligere fortasse non possit, scelere ipse & fe
 ritate praeditus: hac tamē perculsus tam eximiae for
 ma dignitatis, incidat in admirationem? Nam qui
 sensu humaniore praediti homines sunt, summi, in
 fimi, ciues, externi, nequaquam ulli profecto se & sua
 fidentius commendabunt, quam isti ipsi: nec quena
 E quam

quam cupidius ad suas fortunas regēdas accerſent, quā hunc, quem uiderint in aliorum bonis cōmōdisq; procurandis, ſuum ipſum omne bonū & commodum conſtituentem, itaq; omnia ſuſcipientem ac gerentem, ut ſuorum laborū & operum, ad ceteros utilitas, ad ipſum autem fructus uirtutis atq; officiū, qui maximus in uera uita & uberrimus eſt, perueniat: coletur igitur, honorabitur, amabitur, ipſiusq; conſilio & autoritate gerentur plurima: neq; ipſe tam alienis negotijs ſe offeret, neq; expetet admodum publicis procurationibus ſe diſtringi: ſed quicquid eiſmodi ager, atq; ſuſcipiet, totum officio dabit atq; humanitati: ipſe uerō in illa beatiffima cura rerum cœleſtium & diuinarum permanebit, quoad poterit, contemplandarum: uitamq; eam in primis amplectetur, quæ maximè eſt natura eſt, maximeq; hominis propria. Siquidem non corpus, neq; animus reliquus, ſed mens ſola eſt id illud ipſum, quod eſt homo. Quapropter ueras idem etiā ac proprias hominis cōſequetur uoluptates: non illas animæ infimæ, quæ & brutæ maximè, & eadē falſæ inaneſq; ferè ſunt: neq; rursus eas, quæ in ſenſibus cōſiſtunt, uagas & errantes, & uarietate ipſa ſemper inſtabiles: ſed cū has utraq; modo rationeq; finitas, tum illas plenè & cumulatè, quæ arctè, & compreſſè, & peculiariter attingunt hominem, incipit cum ipſum penitus ſe infundunt, & illiquefaciunt, ſuntq; menti & ijs, quæ ex mentis officio geruntur, agnatè maximè & ſam

& familiares : quarum ut uerissîma, atq; purissîma, sic iucundissîma & suauissîma est perceptio . Quos circa homo præceptis Philosophiæ edoctus , ac semetipso in omnem partem recte utens , similem sese (quoad fas est) efficiet Deo : tum in uitæ ratione, dū quo ille modo omnia agit, eodem iste modo cuncta & aget, & exequetur , ut deceat sibi , semper prosit alijs : tum in perpetua animi lætitiâ , ac uoluptate. Qui si præter has cōmuneis Philosophiæ rationes, quæ similitudinem & imitationem præpotētis Dei insinuant nobis atq; proponūt, illa quoq; præterea maxima atque amplissîma eiusdem Dei beneficia in genus humanum cognouerit : quæ unî tantum generi, nominiq; nostro, qui CHRISTVM filium unigenum Dei colimus , & profitemur , propriè ac singulariter data sunt : quod in hac una religione & salus hominibus est , & uera beatæ uitæ in terris ratio, in cœlo immortalitatis adeptio : nedum per Philosophiâ, à pura & integra religione non deflexerit, quemadmodū tu, Phædre, dudum calūniabare: sed magis in ea etiā statuatur, & cōfirmabitur : ad eos enim amores, qui cōmunibus beneficijs Dei summi debentur, accedent alij magis peculiâres, & proprij, per quos fortissimè cum Deo erit colligatus. Non enim de leuibus sophistis in præsentia, neq; (ut opinor) de futilibus hominibus quibusdā: sed de cōsideratis, & integris, & cōstātibus, est sermo : qui omnia metiuntur cōsilio & probitate, neq; à maiore suorū,

E 2 de quo

de quorum integritate, & sapiētia optimè sentiant, decretis atque scitis ullo pacto recedunt: sed quò ingenio hominis, atque doctrina perueniri nō potest, de eo patiūtur Dei immortalis numine, & ueterum autoritate sanctissimorum hominū, facili sibi persuaderi. HIC paulū cum requiessem, Exposui uobis, inquam, quemadmodum quidem potui, & uim utilitatemq; Philosophiæ, & eius uiri qui ritè, ac legitimè Philosophetur, speciem atque formam: Quæ mea expositio sic uniuersè facta, satis ne respondere Phædri calumniæ uideatur, uestrum iam est iudicium. Mihi quidem & magnitudo rei, & breuitas tēporis, & mehercule, rem, si quo modo ea est, fateri uolumus, mei etiam ingenij ad tantum tollendum pondus exilitas, uehementer obstitit, quominus uobis omnia, quemadmodum quidem cupissem, potuerim exprimere: in quo non recuso, quin meæ tarditati culpam, non Philosophiæ ipsi assignetis. HIC GALLVS, Sane quàm probasti tu mihi, Sadolete, defensionem tuam, inquit: nec uideo, Philosophia quid possit esse diuinius. Itaque ego, qui in eam antea propensione animi ferebar: nunc planè illius amore totus ita ardeo, ut non sim eam unquā è complexu meo dimissurus: illud auco quàm maximè & quàm primū, ut ista quæ sunt à te disputata, in Commentarium referantur, quocys queam exēplū Vrbīnū mittere ad meos amicos, taleis uiros, quales tu quoq; in primis existis

mas

mas. SVM MOS & singulareis dicis, inquam, quorum conuentu apud lectissimam omnium scolarum Helisabetam reginam Vmbriæ, illa ciuitas atque adeò Italia omnis ornata est. VER O, nec iniuria, inquit: nō enim uspiam alibi terrarum, neque nostra, opinor, neq; antiquorum memoria, tot & taleis principes ingenij ac literarū, facilè uno in loco quispiam possit nominare, quot nūc Urbis ni præclarum cœtum constituunt: quippe cū illic adsit, & Petrus Bembus, maxima celebritate & nomine uir: quem præter eximiam omnis uirtutis & humanitatis laudem, uerè parentem, cum Romanæ ueteris, tum recentis huius Italæ eloquentiæ possimus appellare: & duo fratres Italiæ uel præcipua lumina, Federicus & Octauianus Fregusi, nobilitate, dignitate, prudētia, literis maximè illustres: itēq; spectatum ac nobile par Baldasarus Castillioneus, & Cæsar Gonzaga: qui militaribus ambo & bellicis uirtutibus insignes, ad illā fortitudinis laudē, optimarū quoq; & literarū, & artiū, non inferius decus, addidere. Quāquā ne singulos colligā, illā ego urbē hoc tempore, nō hominum cuiusquemodī domicilium, sed Musarū diuersoriū esse puto. A T E G O, inquit Citrarius, habeo statim queis cum cōmunis, familiareis hos nostros, quorum quotidianis cœtibus domus tua, Galle, celebrabatur, Camillum Porciū, & Blosium Palladiū: quorum ingenijs, spectabiliq; morū & sermonis elegātia, soliti sumus oēs

E ; apprimè

apprimè delectari: Etsi, quanquā uterq; utranq;, tamen alter eorū oratoriam magis laudē, alter poëtiscam est prosecutus: Tum autē Camillum Paleotū, & Philippum Beroaldum, hunc iuniore dico: Nam ille senior haud sanè usquequaq; doctorum iudicio idoneus est qui probetur: hi autem duo suis ingenij & uirtutum ornamentis, nō municipio Bononienſi modò, unde oriundi sunt, sed huic urbi tantæ, non exiguum decus potuerūt afferre. Nam Euangelistā Mathalenū, tuū familiarissimū, Sadolete, quemq; nos omnes plurimū ipsius merito, & quanquā doctus admodum uir est, humanitatis tamen ac libertatis causa præcipuè diligimus: quo ego gaudio sublatum iri puto, cū te operā hanc nauasie Philosophiæ, laudemq; ex eo cōsecutum esse intelligeret.

VTINAM quidem, inquam, talibus ingenijs, mea hæc opera & uolūtas iure probata sit. Sed quid ait nobis Phædrus? EGO'NE? inquit: te alieno quodā in hominū genere tuū istū sapientē, tanquā in somnijs constituissē. Nam his quidē hominibus, quibus cum uiuimus, mea sapiētia ad manū semper futura est paratior. Quæ cū essent dicta, surreximus omnes, aliquotq; deambulationibus ultro & citro factis, reliquum cōuiuio, uarijsq; sermonibus, Phædro in primis multa faceret, urbaniterq; dicere, hilarem & lätum consumpsimus diem.

F I N I S.

30453



1072



